

# Ka tisa-ni rigixxi'akana ge Jesús-ni, ka nu ben Juan-ni

Tisaha beyake benne attiba ankari'i

**1** <sup>1</sup>Attili lani kwe yiesi lo yu-niha, chi do benne anke tisaha nna len Tata Do Yebáha-ba doe nna la tisaha-ba nuha anke Diosi. <sup>2</sup>Lee nuha chi doe len Tata Do Yebáha attili lani kwe yiesi lo yu-niha. <sup>3</sup>Labie bixuin Tata Do Yebáha kini benie iyá tte nu se'e. Ganna ttixka anúba benneha do, la'ania nna iyába nu chi ukaha, labí uka nuha ganna ttixka. <sup>4</sup>Len benne anke tisaha tee elha nabani geri'i ttu dia lii nna benne anke elha nabaniha, benneha nuha anke xiani ge ka benne. <sup>5</sup>Xianiha nuha rudanie lhe'e chulhaha nna chulhaha labí udaana loe.

<sup>6</sup>Udo ttu benne biyú udhelha Tata Do Yebáha. Benneha utta lábie Juan. <sup>7</sup>Labie bisiabie kini utixxi'e ge benne anke xianiha kini anáchu de nu utixxi'a Juan-ni nna iyába ka benne tsia leke ge benne anka xianiha. <sup>8</sup>Laa Juan-niga nuha uke xianiha. ¡Ko'o! Suna bitaba benneha kini utixxi'e ge benne anka xianiha, <sup>9</sup>delába xiani nu gwalíga udanie ge iyá ka benne ki tte dákanie nuxa anka Tata Do Yebáha. Benne anka xianiha, benneha nuha chi bisiabie yiesi lo yu-ni.

<sup>10</sup>Chiba do benneha yiesi lo yu-ni nna labie bixuin Tata Do Yebáha kini benie yiesi lo yu-ni, ttaka ka benne se'e yiesi lo yu-ni labí chi ankabiakanie benneha. <sup>11</sup>Len ka benne geeha-ba bisiabie, ttaka ka benne geeha nna labí belabike bie. <sup>12</sup>Ttaka iyába ka benne belabike bie lhe gwa ugá leke gebie lhe, ka benneha nuha begwebie ke lo neda kini akake xi'in Tata Do Yebáha. <sup>13</sup>Ka benneha bisinke ukake xi'in Tata Do Yebáha,

labí aníha chi ankake tti ulikeha, nigaba kumu de aníha uka le ka benne se'e yiesi lo yu-ni akake, sinuki kumu Tata Do Yebáha-ba bedá lebie ukake xi'inie.

<sup>14</sup>Benne anke tisaha beyake ttu benne attiba ri'i nna udoe lenri'i. Uka xxatte benne si'i lasi lhe bele'ebie nu anka gwalí lhe. Ri'i bilenri'i nu xxeni ra leeha, delába nu xxeni ra lebie nu bete Tata geeha kumu de anke Xi'in ttu túbiru ge benneha. <sup>15</sup>Juan-ni nna utixxi'ana ge benne anke tisaha lhe unnena idisa, rana:

—Ge benne-ni nuha rinnea tti ria: “Benne delola dabie danalhe netiha, benneha xxenirula ra lebie tti neti, kumu benneha chila doe tti neti.”

<sup>16</sup>Kumu de labie anke benne tee iyá nu tse gebie, de nuha nna iyábari'i redí baari'i nu tse geeha, nu labí rudú siie rutebie geri'i. <sup>17</sup>Kumu bia bennabi bete Tata Do Yebáha lenri'i, lasi ná Moisés-niba bodha'ane nuha, ttaka elha si'i lasi geeha lhe nu anka gwalíha lhe, Jesucristuha-ba bele'enie ri'i nuha. <sup>18</sup>Tata Do Yebáha lanú nu chi bilenna benneha. Sunruba benne anke ttu túbiru Xi'inieha, delába benne due lenieha, benneha-ruba nuha chi bele'enie ri'i Tata geeha.

**Juan benne rugadi indaha rabie: “Neti labí ankaa Cristu”**

*(Mt. 3:11-12; Mr. 1:7-8; Lc. 3:15-17)*

<sup>19</sup>Aní bekabi Juan-ni ge ka bixxudiha lhe ge ka levita-ni lhe. Ka nuná udákana lhe'esi Jerusalén-ni, udhelha ka nu loni ge ka nu Israel-ni kana kini ugíakana gwannaba tisakana Juan-ni, rákane:

—Lu nna, ¿nú ankalu?

<sup>20</sup>Lee nna labí bedhea lebie, sinuki lhixxa rába utixxi'abie, ree:

—Neti labí ankaa Cristu benne chi ga'anani Tata Do Yebáha idhelhe.

<sup>21</sup>Lakana nna bedennaba tisakana, rákana:

—¿Núla ankalu ganna? ¿Si lu nuná Elías ak?

Lee nna bekabie, ree:

—¡Labí neti!

Nianna redeakane:

—¿Si lu nuná profeta benne chi ga'anna isiaha ak?

Lee nna bedekabie ree:

—¡Labí neti!

<sup>22</sup>Nianna rákane:

—¿Núla nuná ankalu ganna, kini anáchu ri'itu kixxi'entu ka benne udhelhake ri'ituha? Lu nna, ¿si lagwa gwagixxi'a gelu?

<sup>23</sup>Juan-ni nna bekabie ree:

—Neti ankaa benne rekia lo yu bisiha, rinnea idisa attiba ra profeta Isaías-ni: “Gwalolixxa neda kini dha benne anke Xxanari'iha.”<sup>a</sup>

<sup>24</sup>Ka nu ugía gwennaba tisaha selakana lhe'e ka nu tee lákani fariseo. <sup>25</sup>Nianna tti unnaba tisakane, rákane:

—Ki ganna labí ankalu Cristu lhe nigaba Elías lhe nigaba profeta nu chi ga'anna isiaha lhe, ¿beakala nna rugadilu ka benne inda ganna?

<sup>26</sup>Juan-ni nna bekabie gekani, ree:

—Neti tti rugadia ka benne inda, suna indaba rixúti. Ttaka lagwi gebale reki ttu benne. Benneha labí ankabienlee.

<sup>27</sup>Labie nuha delola dabie danalhe neti. Benneha labí elha ralhaa idhasia lo ka gwaracha geeha.

<sup>28</sup>Iyá nuní uka lhe'esi Betania daka attu ladu yoo Jordán ata reki Juan-ni rugadie ka benne inda.

### Jesús-ni anke neru to, Benne udhelha Tata Do Yebáha

<sup>29</sup>Utteyú dilaha bilani Juan-ni Jesús-ni dabie ata dueha, nianna tti ree:

—Ne benne anka neru to udhelha Tata Do Yebáha chi daa naa kini kuabie ka tulha ge ka benne se'e yiesi lo yu-ni. <sup>30</sup>Ge benne-ni nuha rinnea, tti ria: “Benne dabie delola danalhane netiha, benneha xxeniru ra lebie tti neti, kumu chila do benneha tti neti.” <sup>31</sup>Nigaba neti ttuha



(San Juan 1:29)

<sup>a</sup> 1:23 Isaías 40:3

labí chi yua nuxa anke, ttaka daya rugadia ka benne leni inda kini anáchu ka benne Israel-ni nna uinbiake bie.

**32**Rigixxi'agaba Juan-ni ree:

—Biláti Espíritu ge Tata Do Yebáha ugwadie dabie yebáha attiba radi ttu becha, bisiabie betedhobie ikie. **33**Neti ttuha labí chi yua nuxa anke, ttaka Tata Do Yebáha benne udhelhe neti kini ugadia ka benne leni inda, benneha ree neti: “Benne ilenlu chadi Espíritu kia-ni nna etedhobie ikie, benneha nuha ugadie ka benne Espíritu kiahá.” **34**Neti chi bilátie nna rigixxi'aya deki labie anke Xi'in Tata Do Yebáha.

### **Ka benne sisi'a tte uduloke gwanalhake Jesús-ni**

**35**Beyeki sáha nna dedhú Juan-ni niha attu libe len chupa ka benne rudhetinieha. **36**Tti bilánie Jesús-ni rekie niha, nianna ree:

—¡Ne benne anke neru to udhelha Tata Do Yebáha reki naa!

**37**Tti biyienin ixpa ka benne rudhetinieha nu reeha, nianna tti diake danalhake Jesús-ni. **38**Tti bodeki lo Jesús-ni nna bilánie danalhake bie, nianna ree ke:

—¿Bí regilale?

Lake nna bekabike, ráke bie:

—Rabí, ¿gála reya'anlu? (“Rabí” dienna innána maestru.)

**39**Labie nna ree ka benneha:

—Gwaltá gwalulanni.

Nianna ugíake gwalannike ata doeha. Kumu chiba anka ttiba retin ttapa nuha, laxkala niha-ba use'eke lenbie axtaba ulha sáha. **40**Benne labie Andrés betsi Simón Pedro-ni, delo chupake biyienkanie nu ra Juan-ni, benneha nuha ugíabie gwanalhe Jesús-ni. **41**Andrés-ni nuha lade'a tte gwatilee betsie Pedro-ni, nna ree benneha:

—Chi gwaxxakatu Mesías-ni. (“Mesías” dienna innána Cristu benne chi ga'anani Tata Do Yebáha idhelhe.)

**42**Nianna tti chebie Simón-ni ata du Jesús-ni. Tti bilani Jesús-ni Simón-ni, nianna rabie na:

—Lu lálu Simón xi'in Jonás, ttaka nnanna eyatta lálu Cefas. (“Cefas” dienna innána Pedro.)

### **Jesús-ni uxie Felipe-ni lhe Natanael-ni lhe**

**43**Beyeki sáha bebeki le Jesús-ni tsiabie daka Galilea, nianna beti'e Felipe-ni nna ree benneha:

—Utá, betenalha neti.

<sup>44</sup>Felipe-ni anke benne lhe'esi Betsaida, delába lhe'esi ge Andrés-ni lhe ge Pedro-ni lhe. <sup>45</sup>Felipe-ni nna beti'ana attu benne lábie Natanael nna rana benneha:

—Chi gwaxxakatu Jesús ge Nazaret-ni, xi'in biyú José-ni. Ge Jesús-ni nuha unne Moisés-ni lo bia bennabiha lhe ge benne-nigaba nuha unne ka profeta ge Tata Do Yebáha lhe.

<sup>46</sup>Nianna ra Natanael-ni Felipe-ni:

—¿Lhe'esi Nazaret-ni, si gwaria tsa ttu benne unie ttu nu tse?

Nianna ra Felipe-ni benneha:

—Utáruga, belanni.

<sup>47</sup>Tti bilani Jesús-ni Natanael-ni chi diabie ata dueha, nianna ree:

—Ne ttu benne gwalíga anke nu Israel daa nii, Benne-ni labí gwen lasi rinnebie.

<sup>48</sup>Natanael-ni nna ree Jesús-ni:

—¿Gála benbialu neti xa tata?

Jesús-ni nna bekabie gebie, ree:

—Attili lani gaxi Felipe-na lu, neti chila biláti lu tti relu xan ya higuha.

<sup>49</sup>Natanael-ni nna ree Jesús-ni:

—Maestru, lúligaba ankalu Xi'ini Tata Do Yebáha lhe lu ankalu benne rinnabialu ka benne Israel-ni lhe.

<sup>50</sup>Jesús-ni nna bekabie ree Natanael-ni:

—¿Si de xpeya lu chi biláti lu relu xan ya higuha, si de nuha nna ria lelu kia? Adírula xxeni anka ka nu si ilenlu tti ka nuni.

<sup>51</sup>Lhe rágaba Jesús-ni:

—Netiru ria, debá nnanna lhe nu si daa lhe ilenle iyali yebáha nna ilágabinle ka anjeli ge Tata Do Yebáha tsapi chadike xaliekia, neti benne daya yebáha.

### Jesús-ni ugíabie dha'a lhe'esi Caná

**2** <sup>1</sup>Beyonna ubisaha nna utta ttu dha'a lhe'esi Caná ge Galilea-ni. Niha-gaba du nan ge Jesús-ni. <sup>2</sup>Biyaxigaba Jesús-ni lenie ka benne rudhetinieha tse'eke dha'aha. <sup>3</sup>Tti chi bebisi vinuha, nianna ra nan geeha bie:

—Birua vinu tee.

<sup>4</sup>Jesús-ni nna bekabie, ree:

—Nana, ¿beaka netila ralu nuná? Neti labí chi bisia ura kia.

<sup>5</sup>Nan geeha nna rabie ka nu se'e gwexxua ya kwe'eha:

—¡Gwaluni iyába nu innábi!

<sup>6</sup>Niha se'e xxupa ka re'e ankakana ge íyya. Rita'a inda lhe'ekani. Lhe'e ttu ttu ka nuha rita'a ttiba ttu gayua (100) litru inda. Ka nuha rixúni ka benne Israel-ni ki riga'ake inda lhe'ekani tti reyarike arlo Tata Do Yebáha. <sup>7</sup>Jesús-ni nna rabie ka nu se'e gwexxua ya kwe'eha:

—Gwalodisá ka re'e-na inda.

Ka nuha nna bodisá t'bakana ka re'eha inda, <sup>8</sup>nianna tti ra Jesús-ni kana:

—Nnanna nna gwalika'a latti nuná nna gwatagwe benne bananie dha'a-ni.

Nianna denkana nuha nna begwekana benneha. <sup>9</sup>Benne bananie dha'aha, kumu labí yue gaxa gwaxxíkana vinuha, sunruba ka nu se'e gwexxua ya kwe'eha yúkana, kumu de lakana gwattekana indaha, laxkala tti bennixxie inda chi beyaka vinuha, nianna tti uxie nubiyú rutsá náníha <sup>10</sup>nna ree na:

—Iyába ka nu runi ttu dha'a, lade'axa ruga'akana vinu tseru nna iki deliba ganna chi u'uya xxatta ka benne yu'u dha'aha nuha, la'anialiba nna chi ruga'akana vinu nu labí tte anka tse. Lu nna nnannaliba ruga'alu vinu tseru-ni.

<sup>11</sup>Nuní sisi'a tte milagru ben Jesús-ni lhe'esi Caná ge Galilea. Len nu benieha bele'ebie nu xxeni ra lebie. Ka benne rudhetinieha nna ugía leke gebie.

<sup>12</sup>Iki de nuha nna ugwadie die lhe'esi Capernaum lenie nan geeha lhe ka betsieha lhe ka benne rudhetinieha lhe. Niha use'eke sunruba ttu chupa ubisa.

### **Jesús-ni rochesue ka nu se'e gwetto'o lali'a yotuha**

(Mt. 21:12-13; Mr. 11:15-18; Lc. 19:45-46)

<sup>13</sup>Kumu de chi dabigana isia laní ge ka benne Israel-ni nu tee lání Pascua, Jesús-ni nna ugwapie die lhe'esi Jerusalén-ni.

<sup>14</sup>Lali'a yotuha gwaxxake ka nu rutto'okana ka ku'una lhe ka neru lhe ka becha lhe. Anágaba ka nu rotsea belhiu lhe, niha-gaba se'ekana. <sup>15</sup>Nianna tti bilhe ttu tuu. Len nuha bochesue kana ro'o yotuha itupa lenkana ka neruha

lhe ka ku'una  
rutto'okanaha, nna  
ka nu rotsea belhuha  
nna bedhíe belhiu  
gekaniha lo yu  
nna berixxi lobie  
ka mexa gekaniha.

**16**Nianna rabie ka nu  
rutto'o ka bechaha:

—Gwalebea ka  
nuná nii nna bittu  
uinle lisi Tata kia-ni  
yo'o ata raka i'íya.

**17**Ka benne

rudhetinieha nna gwadú tteba leke nu ra lo ka yetsi ge Tata  
Do Yebáha ata dia ra: “De raka xxattati ge lisilu-ni, de nuha  
nna ruyú xxattaa elha disa.”<sup>b</sup> **18**Ka nu loni ge ka benne  
Israel-ni nna rákane:

—Lu, ¿bíla ttu seña ule'elu kini ula'a deki gwalí rapalu lo  
neda uinlu nu ruinlu-ni?

**19**Jesús-ni nna bekabie gekani, ree:

—Gwaluttampa yotu-ni nna delo tsunna ubisaba chi  
elhidhaa na.

**20**Ka nu loni ge ka benne Israel-ni nna rákane:

—Chua bixxi xxupa (46) ida bisá ka benne ulhidhake  
yotu-ni, lu nna delo tsunna ubisaba ralu chi elhidhalu nuní.

**21**Ttaka Jesús-ni laa gwalíga ge yotuha nuha rinnebie, sinuki  
gebe nuha rinnebie. **22**Iki deliba chi beyaka benbie lagwi ge ka  
benne chi uttiha, la'anialiba nna gwadú le ka benne rudhetinieha  
deki chiba unnebie ge nuha, nianna tti ugía leke ge nu ra lo ka  
yetsi ge Tata Do Yebáha lhe ugíagaba leke ge nu ra Jesús-ni lhe.

**23**Laka reki Jesús-ni lhe'esi Jerusalén-ni tti raka laní  
Pascuaha, ixé ka benne ugía leke gebie de bilákanie ka  
milagru runieha. **24**Ttaka kwinaba Jesús-ni labí ruxxen lebie  
geke, kumu chiba yue gasina ruin iyáke. **25**Labie labí riyasanie  
nuxa kixxi'ane gaxasina ruin ka benne se'e yiesi lo yu-ni  
kumu chiba yue gasina anka lhe'e lastoke.



(San Juan 2:13-17)

<sup>b</sup> 2:17 Salmo 69:9

### Jesús-ni rinnebie len Nicodemo-ni

**3** <sup>1</sup>Udo ttu benne la'ania anke fariseo, lábie Nicodemo. Uke ttu nu loni ge ka benne Israel-ni. <sup>2</sup>Benneha ugábie ttu lo rela gwalannie Jesús-ni nna ree benneha:

—Maestru, ri'itu yutu deki Tata Do Yebáha-ba udhelhe lu kini ule'enlu ri'itu, kumu lanú ttu benne gwaka gebie unie ka milagru ruinlu-na ganna abíba du Tata Do Yebáha lenbie.

<sup>3</sup>Jesús-ni nna bekabie ge benneha, ree:

—Netiru ria, benne abíba eyalie attu libe eyake benne kubi, benneha labí dhaabie isine ake benne innabia Tata Do Yebáha bie.

<sup>4</sup>Nicodemo-ni nna ree Jesús-ni:

—¿Gasina aka ge ttu benne chi anke yaxxu eyalie attu libe? ¿Si gwakaba ge benneha eta'abie lhe'e nan geeha nna eyalie attu libe?

<sup>5</sup>Jesús-ni nna bekabie ree:

—Netiru ria, benne abíba eyalie len inda lhe eyalie len Espíritu ge Tata Do Yebáha lhe, benneha labí aka isine ake benne innabia Tata Do Yebáha bie. <sup>6</sup>Kumu ttu benne ralie lhe'e xxudi ixnábie, xi'in ka benne se'e yiesi lo yu-niba anka benneha, nna benne ake xi'in Tata Do Yebáha nna Espíritu ge Tata Do Yebáha-ba unie kini ake xi'inie. <sup>7</sup>Laxkala bittu aka tenlu de ria: “Raka doelha eyali ka benne attu libe.” <sup>8</sup>Ttibanka be-na, gatti laduba dana, gwa riyienibinlu tsi'ini, ttaka labí yulu gá udána dana lhe gá diana lhe. Aníha-gaba runi Espíritu ge Tata Do Yebáha lhe'e lasto ka benne chi beyalike attu libe.

<sup>9</sup>Nicodemo-ni nna bekabie, ree:

—¿Gasina aka nu ralu-na?

<sup>10</sup>Jesús-ni nna bekabie ge benneha, ree:

—Ki lu ankalalu maestru ge ka nu Israel-ni nna a rite denlu nu ria-ni. <sup>11</sup>Netiru ria, ri'itu rinnebatu ge nu chi yutu lhe rigixxi'abatu ge nu chi bilentu lhe, ttaka lebi'i labí ria lele ge nu rigixxi'atu-ni. <sup>12</sup>Ki nu anka ge yiesi lo yu-ni rigixxi'aya nna a ria lele, ¿titala ganna ttixka kixxi'ania le nu anka ge yebáha?

<sup>13</sup>Lanú nu chi ugwapina yebáha, sunruba neti benne daya yebáha ugwadia niha nna bisiaya nii. <sup>14</sup>Ttigaba ben Moisés-ni lo yu bisiha ulhidhana belhaha bedána nuha gwetsá, anágaba



neti benne daya yebáha teeki ilhidhakana neti nna utákana gwetsá, <sup>15</sup>kini anáchu iyába ka benne tsia leke neti, [abittu tsia nnittike], sinuki satíaba aka benke arlo Tata Do Yebáha.

### **Tata Do Yebáha raka xxattanie ge ka benne**

<sup>16</sup>'Kumu de yalhá ukani Tata Do Yebáha ge ka benne se'e yiesi lo yu-ni, de nuha nna udhelhe neti benne ankaa Xi'in ttu túbiru geeha, kini anáchu iyába ka benne tsia leke neti nna abittu tsia nnittike, sinuki satíaba aka benke arloe. <sup>17</sup>Kumu Tata Do Yebáha laa udhelhage neti benne ankaa Xi'inie, laa udhelhage neti yiesi lo yu-ni kini ukinnia ka benne, sinuki udhelhalee neti kini odiláya ke.

<sup>18</sup>'Laxkala benne tsia lebie kia, labí urixxi ukinni Tata Do Yebáha benneha, ttaka benne abíba tsia lebie kia, chiba ubixxi biginni benneha kumu de labí ugía lebie neti benne ankaa Xi'in ttu túbiru ge Tata Do Yebáha. <sup>19</sup>Ka nu labí ria lekaniha ibixxi iginniba ka nuha, kumu neti benne ankaa xianiha gwa bisiabaa yiesi lo yu-ni, ttaka lakana nna adírula ute lekani chulhaha attichula xianiha kumu de satsaba anka nu ruinkana. <sup>20</sup>Kumu iyába ka nu runi nu satsa, labí raka uyúkana xianiha, labí ribigakana ata ruden nuha, kini abittu ilá nu ruinkanaha nna itisakana. <sup>21</sup>Ttaka benne gwa ruinbe nu raxxína len nu anka gwalí, gwa ribigaba benneha ata rudani xianiha, kini ilá deki nu runieha gwankaba nuha nu ru'u le Tata Do Yebáha.

### **Juan benne rugadi indaha rigixxi'abie ge Jesús-ni**

<sup>22</sup>Iki de nuha nna ugía Jesús-ni lenbie ka benne rudhetinieha isá to daka Judea. Niha-ba ugweki lenie ke nna rugadie ka benne inda. <sup>23</sup>Anágaba Juan-ni rugadigabe ka benne inda daka Enón kumu niha yu'u idila inda. Enón rena gaxxaba Salim. Niha risin ka benne ki radike inda. <sup>24</sup>Kumu Juan-ni labí chi tena lisiyya la'ania.

<sup>25</sup>Ka benne rudhetini Juan-ni, ttu lidú belisa luesike len ka benne Israel-ni. Belisa luesike delo ni'a ge gasina eyari ka benne kini eyakake nari xú arlo Tata Do Yebáha. <sup>26</sup>Nianna tti bisinke ata du Juan-ni nna ráke benneha:

—Maestru, biyúrua. Nu du lenlu daka ro'o yoo Jordán-ni, nu utixxi'agabinlu ri'itu geniha, nnanna nuha chigaba rugadina ka benne inda nna iyábake diake danalhake na.


<sup>27</sup>Juan-ni nna bekabie ge ka benneha, ree:

—Labí aka ge ttu benne unie ttu bixa ganna abíba ute ná Tata Do Yebáha lenbie. <sup>28</sup>Ki kwinaba lebi'i biyienin nagale ge nu xpeya le deki neti labí ankaa Cristu, sinuki sun tteruba ankaa ttu benne udhelha Tata Do Yebáha kini danerua rigixxi'aya deki chi daa benneha. <sup>29</sup>Ttibanka lo ttu dha'a, nubiyú rutsá náníha, gebani anka nuila rutsá ná lennaha nna benne anka amigu ge nubiyú rutsá náníha, benneha dubie gaxxaba kwe'eni nna yalhá redeakanie tti riyieninie rinne nubiyúha. Neti nuha ankaa amigu ge nubiyú rutsá náníha, laxkala nnanna itta suba edú lasia. <sup>30</sup>Benne rutsá neeha rakaru doelha tsie ake xxeniru, neti nna exxa gaalaa.

<sup>31</sup>'Benne daa gwetsáha, benneha nuha ankarue xxeni delo iyá ka benne. Benne anka ge yiesi lo yu-ni nna ge yiesi lo yu-niba anka benneha nna nu anka ge yiesi lo yu-niba rinne benneha. Benne daa yebáha nna benneha nuha ankarue xxeni delo iyá ka benne. <sup>32</sup>Ge nu bilábanie lhe ge nu biyienbanie rigixxi'abie, ttaka ni ttú ka benne a ria leke ge nu rigixxi'a benneha. <sup>33</sup>Ttaka nu gwa ria leni ge benneha, lana nuha rigixxi'iana deki Tata Do Yebáha rinne nu anka gwalí. <sup>34</sup>Kumu benne udhelha Tata Do Yebáha, ka tisa geeha-ba rinne benneha kumu Tata Do Yebáha rute tame itú Espíritu geeha len benneha. <sup>35</sup>Tataha rakanie ge Xi'inieha, laxkala iyába chi bedha'ane lasi ná benneha. <sup>36</sup>Laxkala benne tsia lebie ge Xi'in Tata Do Yebáha, gwaka benba benneha ttu dia lii arlo Tata Do Yebáha, nna nu abittu tsia leni ge Xi'inieha labí aka ben nuha ttu dia lii, sinuki ralhaba nuha dhina elha disa ute Tata Do Yebáha.

### Jesús-ni rinnebie len ttu nuila ge Samaria

**4** <sup>1</sup>Tti bina Jesús-ni deki ka fariseo-ni chi biyienkinna ra ka benne: “Jesús-ni raxirue ixé ka benne ki sanalhake bie lhe rugadirue ixé ka benne inda tti Juan-ni” <sup>2</sup>(meskiba laa Jesús-ni nuha rugadie ka benneha inda, ka benne rudhetinieha-ba rugadike ka benneha inda), <sup>3</sup>tti bina Jesús-ni nu chi biyienkin fariseo-ni, nianna bedábie daka Judea nna besine daka Galilea attu libe. <sup>4</sup>Tti deyyeha nna teeki betebie daka Samaria <sup>5</sup>nna besine lhe'e ttu yiesi ge niha. Yiesiha tee láni Sicar. Rena gaxxaba ata tee ttu lo yu nu boka'an Jacob-ni



(Juan 4:1-26)

xi'in biyúni José-ni. <sup>6</sup>Niha re yielá inda tee láni Yielá Ge Jacob. Jesús-ni nna de chi resanie deyu'e neda, de nuha nna besine ro'o yielaha nna ure ttebe. Ttiba retin tsi'inu (12) nuha chi anka la'ania. <sup>7</sup>Niha bisin ttu nuila ge Samaria daa nuha uxí inda. Jesús-ni nna ree nuilaha:

—Betetti inda i'iyaa.

<sup>8</sup>Ka benne rudhetinieha nna si diala ka benneha lhe'esiha ugo'o nu goke. <sup>9</sup>Nuila ge Samaria-ni nna rane:

—¿Gasina nna rinnabalu neti inda, ki lu benne Israel-ba ankalu, neti nna benne Samariaba neti?

Aníha rana kumu ka benne Israel-ni lhe ka benne Samaria-ni lhe, labí rutsá luesi ka benneha. <sup>10</sup>Jesús-ni nna bekabie ge nuilaha, ree:

—Ganna ttixka lu yulu nu tse rute Tata Do Yebáha lhe ganna ttixka yulu nú benne nuní rabie lu: “Betetti inda i'iyaa”, la'ania nna gwannabalalu inda lenie, labie nna gutelee inda nu unna elha nabani gelu.

<sup>11</sup>Nuilaha nna rane:

—Ki bigaba bi denlu ki kwealu inda-ni xa tata. Yielá-ni yalhá lhi'u dia nuní. ¿Gála salhealu inda nu unnana elha nabani ganna? <sup>12</sup>¿Si xxenirula ra lelu tti benneola geri'i Jacob-ni? Benneha bodha'ane yielá-ni geri'i. Lhe'e yielá-ni

u'uye inda lhe u'uya ka xi'inieha lhe u'uya ka ku'una bia geeha lhe.

**13**Jesús-ni nna bekabie geni, ree:

—Nuxaba benne ganna i'iyee inda ge yiela-ni ebisiba benneha inda attu libe, **14**ttaka benne i'iyee inda utea-ni, ni tsa labíru ebisi benneha inda attu libe; kumu inda utea-ni akana ttiba ttu dina satíaba dhona lhe'e lastoe nna nuha uinna kini satíaba aka benbie arlo Tata Do Yebáha.

**15**Nuilaha nna rane:

—Tata xisi to, bete luesi inda ralu-na i'iyaa, kini abitturu ebisia inda lhe kini abitturu itaa nii ubea inda lhe.

**16**Jesús-ni nna rabie nuilaha:

—Beyya nna gwalisa nubiyú geluha nna utá lenna.

**17**Nuilaha nna bekabina gebie, rane:

—Lanú nubiyú ki neti do.

Jesús-ni nna rabie na:

—Gwalíbinlu ralu: “Lanú nubiyú ki neti do.” **18**Kumu gayu ka nubiyú chi udo lenlu nna nu do lenlu nnanna, labí chi anka nuná nubiyú gelu. Gwalíbinlu nu ralu-na.

**19**Nuilaha nna rane:

—Neti rakati profetaba ankalu xa tata. **20**Ka benne uka xuttotuha, iki i'iyaa-niba bitake bedú xibike arlo Tata Do Yebáha. Lebi'i ka benne Israel nna rale lhe'esi Jerusalén-niliba teeki udú xibi ka benne arlo Tata Do Yebáha.

**21**Jesús-ni nna bekabie geni, ree:

—Ugía lelu kia xa nuila. Isia sá gaxaba se'ele udú xibile arlo Tataha. Labíru raka doelha itale iki i'iyaa-ni, nigaba tsiale Jerusalén-ni ki udú xibile arloe. **22**Lebi'i labí yule núna rudú xibile arloni, ri'itu nna gwa yutu nú arlo rudú xibitu. Kumu ri'itu ka benne Israel-ni, lagwi getu iria benne odilábie ka benne ki esinke len Tata Do Yebáha. **23**Ttaka gwasia ura, nnanna nuha chi bisia uraha, ka benne ka nu gwalíga ankake ka nu rudú xibike arlo Tataha, ka benneha nuha gwalíga udú xibike arloe tti tte ra Espíritu geeha, kumu Tataha luesi ka benneha rigile ki udú xibike arloe. **24**Tata Do Yebáha anke Espíritu, delába anke benne labí rilenri'e, laxkala ka benne rudú xibike arlobie, teeki uinke nuha gwalíga tti tte ra Espíritu geeha.

**25**Nianna ra nuilaha Jesús-ni:

—Neti gwa yubaa deki isia Mesías, delába benne anke Cristuha. Ganna chi isia benneha, la'ania nna kixxi'anie ri'i iyá tte.

**26** Jesús-ni nna rabie na:

—Neti nuní ankaa benneha xa, delába benne rinne lenlu-ni.

**27** Nuha-ba raka nna chi besia ka benne rudhetinieha nna bebanabakanie tti bilákanie rinne lanie nuilaha; ttaka nna ni ttúke labí unnaba tisake innáke: “¿Bíunna rinnaba tialu nuila-na?” o, “¿bí ge nuná rinne lenlu nuná?” **28** Nuilaha nna bedú bixxibana re'e geniha nna deyyana lhe'esiaha, gwagunana ka benne, rana ke:

**29**—¿Gwaltáruga, gwalulanni ttu nubiyú chi utixxi'ana ge iyába nu chi benia! ¿Si laaba nubiyúha-ba nuha anka Cristu benne chi ga'anani Tata Do Yebáha idhelhe?

**30** Nianna tti biria tteba ka benne lhe'esiaha nna bisinke ata du Jesús-ni. **31** Laka raka nuha nna ka benne rudhetini Jesús-ni nna ráke bie:

—Uto yetta xa maestru.

**32** Ttaka labie nna rabie ke:

—Neti teela ttu elho kia goa, lebi'i labí yule bixa elho nuha.

**33** Nianna tti ra luesi ka benne rudhetinieha:

—¿Si nuxa chi betedha'ana nu gobie ak?

**34** Jesús-ni nna rabie ka benneha:

—Elho kia ankana, unia nu raka le benne udhelhe netiha nna ulhuxaa sina geeha. **35** ¿Laaba lebi'i rale: “Sa riyasaba ttapa beo tti isia gwetselaha”? Neti ria le: Gwalodeki lole nna gwalulanni ka xuxtila se'e naa. Chiba rigatsi ka nuná ki eyatsakana. **36** Ttu benne riben gwetsela ridíba lhiaxa benneha, nna lena ruttupeha nna ankana ka benne raxie lo neda ge Tata Do Yebáha kini satíaba aka benke, kini anáchu benne rudelhe xuaha lhe benne rottupe benneha lhe, ixpabake tse'e ittake ge sina benkeha. **37** Nii rado tisa ge nu rari'i: Ttu benne subi rudelhe xuaha nna attu benne subila redíe benneha. **38** Neti ridhelhaa le kini egitsale xua bedelha ka benne subi, nu labí gwatele bedelhale. Nnanna nna lebi'ila chi redí baale ge sina ben ka benneha.

**39** Ixe ka benne lhe'esi Sicar, (Sicar babana Samaria), ixe ka benneha ugía leke ge Jesús-ni de nu utixxi'en nuilaha ke tti

rana: “Benne-ni chi utixxi'e ge iyá nu chi benia.” <sup>40</sup>Laxkala tti chi bisin ka benneha ata du Jesús-ni nna unnabake lenie, ráke bie:

—¡Ga innálu beya'anchi len ri'itu!

Nianna beya'ane udoe lenke chupa ubisa <sup>41</sup>nna adírula ixe ka benne ugía leke tti biyienkanie nu ra kwinaga labie.

<sup>42</sup>Nianna tti ráke nuilha:

—A laa suna ge nu utixxi'enlu ri'ituha-ruga ria letu, nnanna chi ria letu kumu kwinaga ri'itu chi biyienintu nu rinne benne-ni. De nuha nna chi yutu deki gwalíga benne-ni anke Cristu; labie odilábie ka benne se'e yiesi lo yu-ni.

### Jesús-ni beyonie xi'in biyú ttu nu rinnabia

<sup>43</sup>Iki de chi gwadona chupa ubisaha, biria Jesús-ni lo yu ge Samaria-ni nna die daka Galilea, <sup>44</sup>kumu kwinaba labie ree deki ttu benne anke profeta, labí rugwekana lidhaka benneha lhe'esi gebie. <sup>45</sup>Tti besine daka Galilea, tseba belabi ka benne Galilea-nie kumu de chiba bilákanie iyá nu benie lhe'esi Jerusalén-ni tti raka laní Pascuaha, kumu ka benneha ugíagabake laníha.

<sup>46</sup>Nianna beyeki Jesús-ni attu libe lhe'esi Caná.

Yiesiha rena daka Galilea ata beyonie indaha vinu. Lhe'esi Capernaum-ni do ttu nu rinnabia nu duna kwe'e nu rinnabia xeniha. Nuha do ttu xi'in biyúni ranina. <sup>47</sup>Tti bina nuha deki chi bedá Jesús-ni daka Judea-ni nna besiabie daka Galilea, nianna tti ugíana nna gwannabana lenie, rane:

—¡Utáchi xa tata, ki eyoinlu nu kwiti kiahá. Bichisilá chi tteba gattibi!

<sup>48</sup>Jesús-ni nna bekabie geni, ree:

—Lebi'i labí tsia lele ganna abíba ilenle aka ka milagru lhe ka nu dika ebaninle geni lhe.

<sup>49</sup>Ttaka nubiyúha nna rane:

—Tata xisi to, uyáxxiruga ttiru lani gatti nu kwiti kiahá.

<sup>50</sup>Jesús-ni nna ree na:

—Beyya lisiluha. Xi'in biyúluha chiba beyaka nuha.

Nubiyúha nna gwa ugíaba leni ge nu ra Jesús-ni na, nianna deyya ttebana. <sup>51</sup>Tti chi deyyana esinna lisiniha nna biria ka nu riben sina lhe'e yo'o geniha nna gwatsákana na, nianna rákana na:

—Gwanka benba nu kwiti geluha.

<sup>52</sup>Nianna tti unnaba tisana ka nuha, rana kana:

—¿Bí ura beyaka nu kwiti kiaha?

Ka nuha nna rákana na:

—Nnayaha ttiba retin ttú beria xilháha latibi.

<sup>53</sup>Niala nna tti gwadú le xxudi nu kwitiha deki uraha-gaba nuha tti ra Jesús-ni na: “Chiba beyaka xi'in biyúluha”, nianna tti ugía leni ge Jesús-ni lhe ugíagaba le iyába ka benne se'e lhe'e lisiniha lhe. <sup>54</sup>Nuní berupa milagru ben Jesús-ni iki de chi bedábie daka Judea-ni nna besine daka Galilea-ni.

### Jesús-ni beyonie ttu benne rani ro'o yielá indaha

**5** <sup>1</sup>Iki de nuha nna bisia ttu laní ge ka benne Israel-ni. Jesús-ni nna ugwapie die lhe'esi Jerusalén-ni. <sup>2</sup>Lhe'esi Jerusalén-ni, niha du puerta nu tee lání Puerta Ge Ka Neru. Gaxxaba niha re ttu yielá inda. Len tisa hebreo tee lání Betesda. Abi'iba ro'o yielaha rilhi ttu kweredori sia gayu ro'oni ata ra'a ka benne. <sup>3</sup>Lhe'e kweredoriha ratta ixeru ka benne rani, ka benne lo xua lhe ka benne ridá natsa lhe ka benne daa yatti latike lhe, [ribedake kini itá lo yielá indaha, <sup>4</sup>kumu ttu anjeli ge Tata Do Yebáha, gwadú gwadú riginnie lhe'e yielaha nna ruttábie lo indaha, nna benne gwa riyúbanie riginnie lhe'e indaha, iki de chi reyaka ritá lo nuha, benneha nna reyaka ttebe ge bixaba isagwe ridake.] <sup>5</sup>Niha-gaba tee ttu benne biyú ranie. Chiba uka rerua bixxi xxunu (38) ida ranie. <sup>6</sup>Tti bilani Jesús-ni benneha tebie niha lhe bine deki isába chi ridake nuha, nianna tti rabie benneha:

—¿Si raka lelu eyakalu?

<sup>7</sup>Benne raniha nna bekabie ge Jesús-ni, ree:

—Lanú tee uga'ana neti lhe'e yielá-ni tti ritá loni xa tata.

Kua ruinbaa ga'aya nna attu benne subila chi riyúbanie rixudie lade'a tte tti neti.

<sup>8</sup>Jesús-ni nna rabie benneha:

—Beyadha nna belhidha nu xualu loin-na nna udá.

<sup>9</sup>Looraha nna beyaka tteba benne raniha. Nianna bodaxxu ttebe nu xue loniha nna uduloe udee. La sáha anka sá tti reyaka le ka benne Israel-ni. <sup>10</sup>Ka nu loni ge ka benne Israel-ni nna rákana benne beyakaha:

—Ki gwa yúbalu nasá anka sá reyaka leri'i. Labí aka eyojalu nu uttalu loin-na.

<sup>11</sup>Benne biyúha nna bekabie gekani, ree:

—Benne beyonie netiha, kwinaba benneha rabie neti:  
“Belhidha nu xualu loin-na nna udá.”

<sup>12</sup>Nianna unnaba tisakana benneha, rákane:

—¿Núnna rana lu: “Belhidha nu xualu loin-na nna udá”?

<sup>13</sup>Ttaka benne beyakaha nna labí yue nuxa benne nuha rabie bie aníha, kumu Jesús-ni chiba biganna lokanie lagwi ge ka benne saa niha. <sup>14</sup>Delola nna beti'a Jesús-ni benne beyakaha ro'o yotuha nna ree bie:

—Biyúruga chiba beyakalu. Bitturu uinlu tulha kini ka satelu ttu nu satsarula tti nu gwatelu-na.

<sup>15</sup>Benne biyúha nna ugíe gwattixxi'anie ka nu loni ge ka benne Israel-ni deki Jesús-niba nuha beyonie bie. <sup>16</sup>De nuha nna ka nu loni ge ka benne Israel-ni ridú nookana Jesús-ni, ruinkana uttikane, kumu de runie ka milagru lhe'e ka sá reyaka lekaniha. <sup>17</sup>Ttaka Jesús-ni nna ree:

—Tata kiahaha satíaba riben benneha, de nuha nna neti ribengabaa.

<sup>18</sup>De rabie aníha nna ka nu loni ge ka benne Israel-ni adírula ruinkana uttikane, kumu laa sunruga rigu'u ni'e ka sá reyaka lekaniha, sinuki de rágabe deki Tata Do Yebáha-ba anke Xxudie. Tti rabie aníha, runie deki turo'oba anke len Tata Do Yebáha. De nuha nna ruinkana uttikane.

### **Iyába nu ruin Tataha, ruingaba Xi'inieha nuha**

<sup>19</sup>Nianna bekabi Jesús-ni ge ka nu loni ge ka benne Israel-ni, rabie kana:

—Netiru ria, neti benne ankaa Xi'in Tata Do Yebáha labí aka unia nu yu'u ikia, sinuki ruinbaa nu rilábati ruin Tata kiahaha. Kumu iyába nu ruin Tataha, aníha-gaba neti benne ankaa Xi'inieha, aníha-gaba runia. <sup>20</sup>Kumu Tataha rakanie kia, de nuha nna iyába nu runieha rule'enie neti nna adírula xxeni anka nu si ule'enie neti. Ule'ebie ttu nu dika ebaninle tti ilenle na. <sup>21</sup>Kumu ttiba ruin Tataha relhidhe ka benne chi uttiha nna runie kini reyaka benke arloe, anágaba neti benne ankaa Xi'inieha, ka benne aka lasia unia kini aka benke nna gwaka benbake. <sup>22</sup>Kumu Tataha lanú nu ruin benneha elhuxtisi geni, sinuki len neti benne ankaa Xi'inieha chi bodha'ane iyába lasi náya kini unia elhuxtisi ge ka benne,



**23**kini anáchu nna neti benne ankaa Xi'inieha, iyába ka benne ugweke lidhaka ttigaba rugweke lidhaka Tataha nna nu abíba rugwena lidhaka, labígaba rugwe nuha lidhaka Tataha benne udhelhe netiha.

**24**'Netiru ria: Nu gwa rudo nagani ge nu rinnea-ni lhe gwa ria leni Tata Do Yebaa benne udhelhe netiha, nuha satíaba aka benna arloe; labí ibixxi iginni nuha dhina elha disa, sinuki chiba ulhá nuha lo elhutti tee arlo Tata Do Yebáha nna isinna aka benna ttu dia lii. **25**Netiru ria, chi isia ura, nnanna nuha chi bisia uraha, la'ania ka nu ankakana yatti arlo Tata Do Yebáha iyienkinna tsi'a, neti benne ankaa Xi'inieha nna ka benne gudo nagake kia, ka benneha nuha gwaka benke.

**26**Kumu ttiba Tataha anke benne bani nna runie ki raka ben ka benne, anágaba neti benne ankaa Xi'inieha ankaa benne bani nna chi betebie lo neda kia kini unia ki aka ben ka benne, **27**lhe chigaba betebie lo neda len neti kini unia elhuxtisi ge ka benne kumu de ankaa benne daya yebáha.

**28**Bittu aka tenle ge nu ria-ni, kumu isiaba ura atti iyába ka benne tee lhe'e yieru baa iyienkanie tsi'a. **29**Ka benne ben tseha, eyadhake kini aka benke ttu dia lii nna ka nu ben nu satsaha nna eyadhakana kini iginnikana uyúkana elha disa.

**30**'Neti labí aka kia unia nu yu'u ikia. Ruinbaa elhuxtisi ttiba ra Tataha unia nna elhuxtisi runia-ni, ruinbaa na attiba ankaba geni, kumu labí runia nu raka lasia, sinuki ruinbaa nu raka le benne udhelhe netiha.

**Jesús-ni rigixxi'abie gasina uin ka benne  
kini utte dáke nuxa anke**

**31**'Ganna si la netiba rigixxi'aya kia ge nuxa ankaa, la'ania nna nu rigixxi'ayaha labí daka nuha. **32**Ttaka kumu attu benne subiba rigixxi'e nuxa ankaa, de nuha nna chi yua deki nu rigixxi'a benneha kia, nu gwalíba anka nuha. **33**Lebi'i tti udhelhale ka nu gwannaba tisakana kia len Juan-ni, benneha nna gwa utixxi'abe ge nu ankaba gwalí. **34**Neti laa de riyasagati nuxa attu benne kixxi'abie kia. ¡Ko'o! Suna rodhúbaa lele ge nu utixxi'a benneha kia kini anáchu nna lebi'i tsia lele nna odilá Tata Do Yebáha le. **35**Juan-ni uke ttiba ttu xiani bedenie gele. Lebi'i nna benle tse'e ittale lhe'e xiani geeha ttu satti to, delába bedeakinle ttu satti ge nu utixxi'eha.

<sup>36</sup>Ttaka neti teela ttu nu rigixxi'a tseruna kia tti nu utixxi'a Juan-ni, delába ka milagru bedha'an Tataha len neti ki unia. La ka nuha-ba rigixxi'akana deki gwalíba labe udhelhe neti. <sup>37</sup>Anágaba Tataha benne udhelhe netiha, chigaba utixxi'e nuxa ankaa, meskiba lebi'i labí chi biyieninle tsi'e lhe labí chi bilenlee lhe. <sup>38</sup>Nigaba a rulabile ka tisa geeha, kumu neti benne udhelheha labí ria lele kia. <sup>39</sup>Lebi'i rudheti tsitsibale ka tisa dia lo ka yetsi ge Tata Do Yebáha kumu rakinle lo ka nuha saxxakale gasina aka benle ttu dia lii arloe. Gwalí galá lo ka yetsi geeha rigixxi'a kia, <sup>40</sup>ttaka lebi'i nna labí raka lele ibigale len neti kini aka benle ttu dia lii.

<sup>41</sup>'Neti labí runia kini inne tse ka benne kia. <sup>42</sup>Anágaba nna chigaba ankabiati le deki labí rakinle ge Tata Do Yebáha. <sup>43</sup>Neti daya kwenta ge Tata kiahá; lebi'i nna a rulabile neti. Lala ganna attu nu subi dana kwenta geni, lala nuha nna gwa rulabibale na. <sup>44</sup>¿Gágalo tsia lele kia? Kumu ki la lebi'iba rinne tse ge luesile nna labí ruinle ki Tata Do Yebaa benne anke ttu túbiru Diosiha, labí ruinle kini benneha inne tsebie gele.

<sup>45</sup>'Labí akinle deki neti ukinnia le arlo Tata Do Yebáha. Moisés benne ruxxen lele geeha, benneha-ba ukinnie le arloe. <sup>46</sup>Kumu gannala ttixka gwalínle ria lele ge Moisés-ni, la'ania nna gweyyala lele kia, kumu kia nuha utixxi'a Moisés-ni lo ka yetsi benieha. <sup>47</sup>Ttaka ganna lebi'i abíba ria lele ge nu ben benneha lo ka yetsiha, ¿gasina tsia lele ge ka tisa rinnea-ni?

**Jesús-ni begobie gayu mili ka benne**  
(Mt. 14:13-21; Mr. 6:30-44; Lc. 9:10-17)


**6** <sup>1</sup>Iki de nuha nna tti dia Jesús-ni daka attu ladu ro'o indatoo ge Galilea-ni nu tegaba lání indatoo ge Tiberias, <sup>2</sup>ixe ka benne danalhake bie kumu de chi bilákanie ixe ka milagru runie tti reyonie ka benne rani. <sup>3</sup>Nianna tti ugwapie iki ttu i'iya nna niha udobie lenie ka benne rudhetinieha. <sup>4</sup>La'ania nuha chi dabigana isia laní ge ka benne Israel-ni nu tekanie lání Pascua. <sup>5</sup>Tti belhidha lo Jesús-ni nna bilánie yalhá ixe ka benne chi danalhake bie, nianna rabie Felipe-ni: —¿Gála sayo'ori'i yettaxtila ki go iyá ka benne-ni?

<sup>6</sup>De lo tisaba unnebie aníha, kini lana nna bixa ekabina, kumu labie chiba yue bí unie. <sup>7</sup>Felipe-ni nna bekabina gebie, rana:

—Ni len belhiu nu kixakana ri'i ge chupa gayua (200) ubisa sina, ni len nuha a dhaari'i go'ori'i yettaxtila ki go ka benne-ni ttu ttuxka'a.

<sup>8</sup>Ttu ka benne rudhetinieha, benne tee lábie Andrés betsi Simón-ni, benneha rabie Jesús-ni:

<sup>9</sup>—Ne ttu nu kwiti du nii denna gayu yettaxtila ge xua cebada nna a chupa ka belha nna, ttaka bi ixú nuní ki go iyá ka benne tupa-ni.



(San Juan 6:1-15)

<sup>10</sup>Nianna tti ra Jesús-ni ke:

—Gwaligasi ka benne-na ese'eke.

Nianna bese'e tteba ka benneha kumu yalhá ixxi binni tee niha. Sunrula ka benne biyúha ankake ttiba tu gayu mili.

<sup>11</sup>Nianna tti bedaxxu Jesús-ni ka yettaxtilaha nna iki de chi begwebie Tata Do Yebáha ixkixaru, nianna tti begwebie ka benne rudhetinieha yettaxtilaha, ka benneha nna utidhike benneha len iyá ka benne se'e niha. Aníha-gaba benie len a chupa ka belhaha. Utobake nna axtaliba beyielakanie.

<sup>12</sup>Tti chi beyielakin benneha, nianna ra Jesús-ni ka benne rudhetinieha:

—Gwalottupa ka ro'o salha'a bexxa-na kini abittu tsia lattike.

<sup>13</sup>Ka benneha nna bottupake ka ro'o salha'a bexxa ge gayu ka yettaxtila ge xua cebadaha. A tsi'inu (12) sumi besá benne bottupakeha. <sup>14</sup>Ka benneha tti bilákanie milagru ben Jesús-ni, nianna ráke:

—Benne-niligaba gwalí anke profeta chi ga'anna isia yiesi lo yu-ni.

<sup>15</sup>Ttaka Jesús-ni nna tti ute danie deki doelhaba ruinkana ecekane kini ake nu rinnabia gekani, nianna ttúbe beru'une dedheyve attu libe iki i'iyaha.

### Jesús-ni ridábie lo indatooha

(Mt. 14:22-27; Mr. 6:45-52)

<sup>16</sup>Tti chi uka relaha nna beyadi ka benne rudhetini Jesús-ni ata re indatooha <sup>17</sup>nna beta'ake lhe'e ttu barcu

daa niha, deyyake belháke lo indatooha kini esinke lhe'esi Capernaum. Chiba uka rela nuha nna Jesús-ni nna labí chi besine lenke. <sup>18</sup>Indatooha nna ridú lii loni de raka xxatta ttu be idí. <sup>19</sup>Tti chi bedáke lo indatooha ttiba gayu o xxupa kilómetru, nianna tti bilákanie Jesús-ni redábie dedee lo indaha, rebige kwe'e barcuha, nianna tti usikanie. <sup>20</sup>Labie nna unnebie, ree ke:

—Netiba nuní. Bittu gasinle.

<sup>21</sup>Nianna redeakabakanie belhapike bie lo barcuha nna besin ttebake len barcuha ata deyyakeha.

**Jesús-ni anke yettaxtila, runie kini satíaba  
aka ben ka benne arlo Tata Do Yebáha**

<sup>22</sup>Beyeki sáha nna ka benne tupa ro'o indatooha binake deki sun ka benne rudhetini Jesús-niba beyapike lhe'e barcuha. Kumu barcu deyya ka benneha, sunruba nuha udána ro'o indatooha nna lanú Jesús-ni bilákanie eyapi len ka benneha lhe'e barcuha. <sup>23</sup>Nianna besia adíru ka barcu dedákana daka lhe'esi Tiberias. Besia ka nuha gaxxaba ata uto ka benne yettaxtilaha ata use'eke iki de chi begwe Jesús benne anke Xxanari'iha ixkixaru len Tata Do Yebáha. <sup>24</sup>Tti lanú Jesús-ni bilani ka benne tupa niha, nigaba a bilákanie ka benne rudhetinieha, nianna tti uta'ake lhe'e ka barcuha nna diake ugilee daka lhe'esi Capernaum-ni.

<sup>25</sup>Tti gwaxxakake bie attu ladu ro'o indatooha, nianna tti unnaba tisake, ráke bie:

—Maestru, ¿nukala bisialu nii?

<sup>26</sup>Jesús-ni nna bekabie geke, ree:

—Netiru ria, labí rekile ugila neti de rilenle ka milagru runia-ni, sinuki rekile ugila neti kumu de begoa le yettaxtila nna axtaba beyielinle. <sup>27</sup>Bittu udona lele kilale elho nu abittu ruchiana isá, sinuki gwaludola lele gwalegila elho nu uinna kini satíaba aka benle. Neti benne daya yebáha, neti unia ki satíaba aka benle arlo Tata Do Yebáha, kumu neti chi bedha'ane ki unia aní.

<sup>28</sup>Nianna tti ráke bie:

—¿Bíla teeki uintu kini dhaatu uintu nu raka le Tata Do Yebáha?

<sup>29</sup>Jesús-ni nna bekabie geke, ree:

—Tsia lele Tata Do Yebaa benne udhelhe netiha. Nuní raka lebie uinle.

<sup>30</sup>Nianna tti ráke bie:

—¿Bí milagru uinlu kini ri'itu ganna chi bilentu ka milagruha nna tsia letu gelu? ¿Bí ttu nu tse uinlu? <sup>31</sup>Kumu ka benne uka xuttori'iha utoke nu udhelha Tata Do Yebáha nu tee láni maná, tti rekike lo yu bisiha. Ukaba attiba ra lo ka yetsi ge Tata Do Yebáha ata dia ra: “Yettaxtila daa yebáha, udhelhe ki utoke.”<sup>c</sup>

<sup>32</sup>Jesús-ni nna rabie ke:

—Netiru ria: Labí Moisés-ni nuha betena yettaxtila daa yebáha; sinuki Tata kiahaha-ba betebie nuha. Labie nuha rutebie nu gwalíga anka yettaxtila daa yebáha. <sup>33</sup>Kumu yettaxtila rute Tata Do Yebáha, benneha anke benne daa yebáha nna runie kini satíaba aka ben ka benne.

<sup>34</sup>Nianna ráke bie:

—Satía bete luesi yettaxtila-na gotu xa tata.

<sup>35</sup>Jesús-ni nna rabie ke:

—Netiba nuní ankaa yettaxtila rutea elha nabani ge ka benne. Benne ite len neti labíru ituin benneha lhe benne tsia lebie neti ni tsa labíru ebisi benneha inda. <sup>36</sup>Ttaka ttiba chi xpeya le, meskiba chi bilenle neti nna labí ria lele kia. <sup>37</sup>Iyába ka benne ruin Tataha ki itake len neti, gwadábake len neti nna ka benne gwadáke len netiha nna labí odekia ka benneha. <sup>38</sup>Kumu neti laa ugwadigaa yebáha kini unia nu rakaba lasia, sinuki unia nu ra benne udhelhe netiha. <sup>39</sup>Nuní raka le benne udhelhe netiha unia, delába delo iyá tte ka benne uin Tataha ki itake len neti bittu unnittia ni ttúke, sinuki elhidha bania ke ganna chi bisia sá daluxaha. <sup>40</sup>Nunígaba raka le Tataha aka, delába iyába ka benne ilákanie neti benne ankaa Xi'inie lhe tsia leke kia lhe, ka benneha nuha satíaba aka benke arloe. Neti nna gwelhidha benbaa ke ganna chi bisia sá daluxaha.

<sup>41</sup>Ka nu Israel-ni nna udulokana rinnekana ge Jesús-ni kumu de rabie: “Neti ankaa yettaxtila nu daa yebáha.” <sup>42</sup>Lhe rágabakana:

—¿Laaba nuníba nuha Jesús xi'in biyú José-ni? Ki gwankabiabinri'i xxudini lhe ixnání lhe. ¿Galasina nna rana: “Yebáha-ba daya”?

<sup>c</sup> 6:31 Salmo 78:24

**43** Jesús-ni nna bekabie, ree:

—Bittu innele kia. **44**Lanú ttu benne lhaxxaba isiabie len neti ganna Tata kia benne udhelhe netiha abíba idhelhe benneha len neti. Neti nna gwelhidha benbaa benneha lo elhuttiha ganna chi bisia sá daluxaha. **45**Lo ka yetsti bodha'an ka profeta ge Tata Do Yebáha dia ra: “Iyábakana udhetini Tata Do Yebáha.”<sup>d</sup> Laxkala iyába ka benne riyienkanie ge Tataha lhe ridetike gebie lhe, ka benneha nuha gwadáke len neti. **46**Tataha lanú nu chi bilenna benneha; sunruba neti benne udáya ata doeha, sunruba neti chi biláti Tataha. **47**Netiru ria, benne gwa ria lebie netiha, benneha satíaba aka benbie arlo Tata Do Yebáha. **48**Neti ankaa yettaxtila rutea elha nabani ge ka benne. **49**Ka benne uka xuttoleha utoke maná lo yu bisiha, laa kiga de utoke nuha nna abittu uttike, aloba uttigabake. **50**Ttaka nii chi du yettaxtila daa yebáha. Benne gobie yettaxtila-ni, benneha labí gattie, satíaba aka benbie arlo Tata Do Yebáha. **51**Neti nuní ankaa yettaxtila bani daa yebáha. Ganna nuxa benne gobie benne-ni, benneha satíaba aka benbie. Yettaxtila nu utea-ni ankana kwinaga bela latia. Utea na kini odiláya ka benne se'e yiesi lo yu-ni kini satíaba aka benke arlo Tata Do Yebáha.

**52**Ka nu Israel-ni nna udulokana rutilha tisakana, ra luesikani:

—¿Gasina ute nuní bela latin-na gori'i?

**53**Jesús-ni nna bekabie gekani, ree:

—Neti benne daya yebáha, netiru ria, ganna lebi'i abíba gole bela latia-ni lhe ganna abíba i'iyale reni kia-ni lhe, labí aka benle ttu dia lii arlo Tata Do Yebáha. **54**Nu gona bela kia-ni lhe i'iyana reni kia-ni lhe, nuha satíaba aka benna arlo Tata Do Yebáha. Neti nna gwechidhabaa na lo elhuttiha ganna chi bisia sá daluxaha. **55**Kumu bela latia-ni ankana gwalíga elho go ka benne nna reni kia-ni nna ankana nu gwalíga i'iya ka benne. **56**Benne gobie bela kia-ni lhe i'iyale reni kia-ni lhe, benneha nuha gwa due len neti, neti nna gwa dúgabaa lenbie. **57**Ttiba Tata kiahaha benne udhelhe netiha anke benne bani, de benneha nna neti anka bengabaa. Anágaba benne gobie bela kia-ni, de neti nna gwaka bengabe. **58**Neti labí ankaa tti anka

<sup>d</sup> 6:45 Isaías 54:13

yettaxtila uto ka benne uka xuttoleha. Ka benneha laa kiga de utoke maná lo yu bisiha nna abittu uttike, aloba uttibake. Neti ankaa yettaxtila daa yebáha. Benne goe yettaxtila-ni gwaka benbe ttu dia lii arlo Tata Do Yebáha.

<sup>59</sup>Iyá nuní utixxi'a Jesús-ni lhe'esi Capernaum-ni. Utixxi'e nuha lhe'e yo'o ata ritupa ka benne Israel-ni rudhetike ka tisa ge Tata Do Yebáha.

**Ixe ka nu rudhetini Jesús-ni beyadi gaakana  
tti biyienkinna nu reeha**

<sup>60</sup>Tti biyienkin benne se'e niha nu rinne Jesús-ni, ixe ka benne chi danalhake bie, ráke:

—Tsitsiba anka nu rinne benne-ni. ¿Nú dhaana udo nagani ge benne-ni?

<sup>61</sup>Ttaka Jesús-ni ute dábanie rinne lha ka benne danalhake bieha ge nu reeha, nianna tti rabie ke:

—¿Si rutsetsibin nu rigixxi'ania le-ni? <sup>62</sup>¿Titiala ganna ttixka neti benne daya yebáha ilenle eyapia ata doa ttuha?

<sup>63</sup>Espíritu ge Tata Do Yebáha nuha runie kini raka benri'i. Bela latiri'i-ni labí rixú nuní uinna kini aka benri'i. Ka tisa rinnea-ni ankake ge Espirituha lhe ruteke elha nabani lhe.

<sup>64</sup>Ttaka sa se'e attu chupale labí ria lele.

Aníha ra Jesús-ni kumu attili sisi'a tteha chi yue nupaxake nuha abittu ria leke gebie lhe chigaba yue núke nuha uteke bie lasi ná ka nu uttikaneha. <sup>65</sup>Lhe rágabe ke:

—De nuha nna ria le, ni ttu benne labí aka gebie ite len neti ganna abíba Tata kiaha idhelhe bie.

<sup>66</sup>Debá la'ania ixe ka benne rudhetinieha, bedhanke labíru ugweki lenke bie. <sup>67</sup>Nianna tti ra Jesús-ni ka benne tsi'inuha (12):

—Lebi'i ¿si rakagaba lele eyyale?

<sup>68</sup>Simón Pedro-ni nna bekabina gebie, rana:

—Tata Xisi to, ¿núwala sanalhatu ganna? Ki lula nuná rinnelu ka tisa ka nu ruinkana kini satíaba aka bentu arlo Tata Do Yebáha. <sup>69</sup>Ri'itu chiba ria letu gelu lhe chigaba yutu deki kwinalu ankalu Cristu Xi'in Tata Do Yebáha benne anka banieha.<sup>e</sup>

<sup>e</sup> 6:69 Lo yetsi-ni ata dia ra: “Lu ankalu Cristu Xi'ini Tata Do Yebáha benne anka banieha”, lo adíru ka yetsi nna ra: “Lu ankalu benne chi ulesi Tata Do Yebáha.”

<sup>70</sup> Jesús-ni nna bekabie geke, ree:

—¿Laaba ganna tsi'inule (12) nuná chi bekwea? Ttaka ttúle nna nu xxegwiba ankale.

<sup>71</sup> Ge Judas Iscariote xi'in biyú Simón-niba nuha rinnebie tti ree aníha, kumu lana nuha selana ka benne tsi'inuha (12), lhe lana nuha utene lasi ná ka nu uttikaneha lhe.

### Jesús-ni diabie laní Jerusalén-ni

**7** <sup>1</sup>Iki de nuha nna Jesús-ni daka Galilea-niba rekie. Labí raka lebie tsekie daka Judea, kumu ka nu loni ge ka benne Israel-ni ruinkana uttikane. <sup>2</sup>Ttaka kumu de chi dabiga isia laní ge ka benne Israel-ni nu tee lání Laní Ge Ka Yo'o Lhaga, <sup>3</sup>nianna tti ra ka betsieha bie:

—Bittu eya'anlu nii. Biria nna ugía daka Judea-ni kini anágaba ka nu rudhetinlu se'e niha ilákinna ka nu xxeni ruinlu. <sup>4</sup>Kumu ttu nu raka leni iláni ka benne nu ruinna, labí gatsila tsekina uinna nuha. Laxkala lu ganna nuná ruinlu, bela'a nuná arlo ka benne.

<sup>5</sup>Aníha ra ka betsieha bie kumu nigaba lakana a ria lekani gebie. <sup>6</sup>Jesús-ni nna bekabie gekani, ree:

—Neti labí chi bisia ura kia tsiaya. Lebi'i bixaba ura aka lele tsiale. <sup>7</sup>Kumu ka benne labí tee ttu bixa ge itisikanie le. Netiligaba ritisikanie kumu de rigixxi'aya deki satsaba anka nu ruinke.

<sup>8</sup>Lebi'i gwaltsia laní, neti labí dhaya kumu labí chi bisia ura kia.

<sup>9</sup>Aníha-ba rabie kana nna beya'anbe Galilea.

<sup>10</sup>Ttaka iki de tti chi ugwapi ka betsieha diakana laní, nianna ugwapigabe diabie, ttaka labí die la loo, ttisidiba gatsiba die. <sup>11</sup>Ka nu loni ge ka benne Israel-ni nna ugilabe rekikana lo laníha nna ra luesikani:

—¿Gála rekina ganna?

<sup>12</sup>Gebe rinne iyába ka benne reki niha, nu raba: “Benne tseba ankana.” Adíkana nna rákana: “Labí ankana benne tse. Ruinba leni ki ridí yienna ka benne.” <sup>13</sup>Ttaka ni ttú ka benne rinneha labí reyxaxanie inneke gebie idisa, kumu rasibakanie ge ka nu loni gekeha.

### Jesús-ni rule'enie ka benne ka tisa ge Tata Do Yebáha ro'o yotuha

<sup>14</sup>Ttiba salhe chi dia laníha, nianna tti ugwapi Jesús-ni die



ro'o yotuha nna uduloe rule'enie ka benne. <sup>15</sup>Ka nu loni ge ka benne Israel-ni nna rebanabakinna, rákana:

—¿Gasina nna raka xxatta ge nuní, ki abígaba bedhetina?

<sup>16</sup>Jesús-ni nna bekabie gekani, ree:

—Laa nu anka kigaa nuní rule'a; nu anka ge benne udhelhe netiha-ba nuní rule'a. <sup>17</sup>Benne raka lebie unie nu ru'u le Tata Do Yebáha, benneha nuha gwate danie ganna nu rule'a-ni gwankana ge Tata Do Yebáha o nu anka kibaa nuní rule'a. <sup>18</sup>Nu rinnena nu anka gebani, ruinba nuha kini inná xxeni leni arlo ka benne; ttaka neti rinnea nu anka ge Tata Do Yebaa benne udhelhe netiha, benneha nuha runia kini ra xxeni lebie. Neti nuha rinnea nu anka gwalí, labí gwen lasi rinnea. <sup>19</sup>¿Laaba ganna Moisés-ni boka'ane bia bennabi ge Tata Do Yebáha len lebi'i? Ttaka nna niba ttúle a ruinle nu ra loni. ¿Beakala nna ruinlale uttile neti ganna?

<sup>20</sup>Ka nu se'e niha nna bekabikana, rákane:

—Nu xxegwiha-ba yu'u latilu. ¿Nú ruinna uttina lu?

<sup>21</sup>Jesús-ni nna bekabie gekani, ree:

—Iyábale uka tenle tti bilenle benia ttu milagru la sá tti reyaka leri'i. <sup>22</sup>Ki anágaba lebi'i meskiba raxxína sá reyaka leri'i, sinagaba nuha ruinle tti richúle lo bela lati ka nubiyú to gele; ruinbale nu bodha'an Moisés-ni, meskiba laa kwinaga Moisés-ni biria ikie ki uinle aní, sinuki ka xuttoleha-liba chi dáke ruinke aní. <sup>23</sup>Ki lebi'i gwadú richúle lo bela lati ka nubiyú to gele tti risia ka sá reyaka leri'i. Ruinle aníha kini abittu rigu'u ni'ale bia bennabi bodha'an Moisés-ni. Ki lebi'i ruinle aná, ¿beakala rise'enle len neti de chi beyonia ttu benne rani la sá tti reyaka leri'i, benneha nna chiba beyaka chábie? <sup>24</sup>Bittu iyubinle kuale bala'ana ge nu rilenle, sinuki gwalinneba attiba ankaba geni.

**Ka benne rinnaba tisake ganna Jesús-ni nuha anke Cristu**

<sup>25</sup>Nianna ra ttu chupa ka nu Jerusalén-ni:

—¿Si laaba nuníba nuha ruinkana uttikana?

<sup>26</sup>Gwaluyúrugá la looba du nuní rinnena nna labí bixa rákana na. Laaruba ganna ka nu loni geri'i-na chiba ridielhakana deki gwalíba nuní ankana Cristu nu chi ga'anani Tata Do Yebáha idhelhe. <sup>27</sup>Ttaka nuní gwa yúbari'i gá dana. Cristuha nna atti isie yiesi lo yu-ni nna labí yuri'i gá daa benneha.

**28** Jesús-ni nna ro'o yotuha-ba doe gwele'eni ka benne nna tti biyieninie nu rákana, nianna unnebie idisa, ree:

—Lebi'i gwankabiabinle neti lhe gwa yúbale gaxa anka lasia lhe, ttaka labí nu yu'u ikia benia kini daya. Benne udhelhe netiha, benneha anke benne gwalíga udhelhe neti. Lebi'i labí ankabienle benneha. **29**Neti nna gwankabiabatie kumu ata doeha-ba biriaya daya lhe labe udhelhe neti lhe.

**30**Nianna benkana udaxxukane, ttaka ni ttúkana a bedaxxukane kumu labí chi bisia ura gebie iyaxxue. **31**Laa kiga de nuha nna ixeba ka benne se'e niha ugía leke gebie, nianna ráke:

—Cristuha, tti isie, ¿si ixerula ka milagru uin benneha ttichula nu ruin benne-ni?

**32**Ka fariseo-ni biyienbakinna nu rinne ka benne se'e niha ge Jesús-ni, nianna lakana lhe ka nu loni ge ka bixxudiha lhe udhelhakana ka gwen sina ge yotuha kini sadaxxukane.

**33**Jesús-ni nna rabie kana:

—Attu sattiruba dhoa len lebi'i, iki de nuha nna eya'abaa ata do benne udhelhe netiha. **34**Nianna tti egilale neti, ttaka labí eselinle neti kumu ata esinaaha, lebi'i labí aka esiale niha.

**35**Ka nu loni ge ka benne Israel-ni nna rinnaba tisa luesikani, rákana:

—¿Gá ruin nuní eyyana nna abí saxxakari'i na? ¿Si tsiachuna ata se'eru ka benne geri'i lhe'e ka yiesi dittu-na nna ule'egabinna ka nu dittu-na ak? **36**¿Bíla dienna innána tti rana: “Meskiba egilale neti nna labí eselinle neti” lhe tti rana: “Ata esinaaha, lebi'i labí aka esiale niha”?

**Jesús-ni rinnebie ge inda nu rute elha nabani ttu dia lii ge ka benne**

**37**Tti chi bisia sá lhuxa laníha, la sáha nuha anka laní xxeniru. La'ania udú lii Jesús-ni nna unnebie idisa, ree:

—Ganna nuxa ttu le rebisile inda, teeki itale len neti kini i'iyale inda. **38**Attiba ra lo ka yetsi ge Tata Do Yebáha benne tsia lebie neti, lhe'e lastobie uxunni liiba inda nu rute elha nabani ttu dia lii gebie.

**39**Ge Espíritu dhi ka benne tsia leke ge Tata Do Yebáha, ge benneha nuha rinne Jesús-ni tti rabie aníha. Kumu axta la'ania labí chi uxí ka benne Espírituha kumu Jesús-ni labí chi beyapie yebáha kini inná xxeni lebie.

### Ka benne labí turo'o rinnekana ge Jesús-ni

<sup>40</sup>Tti biyienin ka benne se'e niha nu ra Jesús-ni, nianna ra ttu chupake:

—Benne-niligaba nna gwalí anke profeta benne chi ga'anna isiaha.

<sup>41</sup>Adí ka benne nna ráke:

—¡Ko'o! Benne-ni anke Cristu.

Ttaka adíke nna ráke:

—Galo iria benne anke Cristuha daka Galilea. <sup>42</sup>¿Laaba lo ka yetsi ge Tata Do Yebáha rixxi'a ra deki benne anke Cristuha teeki aka benneha benne datiabie David-ni nna teeki gali benneha lhe'esi Belén, daka ata uka lasi David-ni?

<sup>43</sup>Aníha uka nna delo ni'a ge Jesús-ni nna ya yaba le rulaba le ka benne, labí turo'o rinneke. <sup>44</sup>Ttu chupakana nna ruinkana udaxxukane, ttaka ni ttúkana a beyaxakinna udaxxukane.

<sup>45</sup>Ka nu rise'e gweyú ro'o yotuha, ka nu dia tadaxxukana Jesús-ni, ka nuha beyekikana besinkana ata se'e ka fariseo-ni lhe ka nu loni ge ka bixxudiha lhe. Ka fariseo-ni nna rákana ka nuha:

—¿Beakala a dechele nuha?

<sup>46</sup>Ka nuha nna bekabikana, rákana:

—Labí chetu na kumu lanú ttu benne chi biyienintu innebie tti rinnena.

<sup>47</sup>Nianna tti bekabi ka fariseo-ni gekani, rákana kana:

—Lebi'i, ¿si chigaba uxí yiena le? <sup>48</sup>Gwalinnáchu, ¿si nuxa ttu ka nu rinnabia geri'i-na o nuxatu ttu ka fariseo chi ugía letu geni? <sup>49</sup>¡Ko'o, labí! Ttaka ka nu rudo nagakani ge nuha, ka nuná labí yúkana nu ra lo bia bennabi bodha'an Moisés-ni. Ka nuná ukinniba Tata Do Yebáha kana.

<sup>50</sup>Nianna Nicodemo nu anagabana fariseo, nu ugíana gwanne lena Jesús-ni ttu lo rela, lana nuha rana adí ka fariseo-ni:

<sup>51</sup>—Ki yule lo bia bennabi geri'i-na rixxi'a ra deki labí aka geri'i ukinniri'i ttu benne ganna abíba lade'axa chi biyienin nagari'i bixa benie.

<sup>52</sup>Nianna bekabikana geni, rákana:

—Lu nna, ¿si nu Galileagabalu? Begilaruga lo ka yetsi ge Tata Do Yebáha. Lo ka nuná labí rigixxi'a ra deki daka Galilea teeki iria ttu profeta ge Tata Do Yebáha.

### Ttu nuila bexuinkinna na len ttu nubiyú

53 [Nuha-ba rákana nna kua ttu ttubakana bodaxxu neda gekani deyya lisikani.

**8** <sup>1</sup>Jesús-ni nna diabie daka iki i'iya ata daa ka ya olivuha. <sup>2</sup>Attu dilaha nna beyekie besinbie ro'o yotuha nna iyába ka benne bedetupake kwe'ebie. Lee nna ure ttebe nna rule'enie ke. <sup>3</sup>Ka nu rule'ekinna ka benne nu ra lo bia bennabi boka'an Moisés-ni, lenkana ka fariseo-ni bisinkana chekana ttu nuila beyaxxukinna na len ttu nubiyú. Nianna bedúkana nuilaha lagwi ge ka benne se'e niha, <sup>4</sup>nna rákane:

—Maestru, nuila du-ni bexuintu na len ttu nubiyú. Lo dana ruinna nuha bexuintu na. <sup>5</sup>Lo bia bennabi bodha'an Tata Do Yebáha len Moisés-ni ra deki ka nuila ruinkana aní teeki usiari'i kana íyya kini gattikana. Lu nna, ¿bíla ralu?

<sup>6</sup>Rákane aníha kumu de ruinkana ibixxinie bixa innábie, kini aníha-chu nna tee ro'okani bixa usiakana ikie. Ttaka Jesús-ni biyettalee nna len xubenábe runie letra lo yu. <sup>7</sup>Ttaka kumu de doelhaba ruinkana rinnaba tisakane, nianna tti bedú liie nna ree kana:

—Nuxa ttúle abittu bi tulha chi benle, lebi'i nuha lade'a tte udaxxule íyya use'ele nuila-ni.

<sup>8</sup>Nianna tti bedeyetta adakabe attu libe nna redeonie letra lo yu. <sup>9</sup>Lakana nna tti biyienkinna nu reeha, ttu ttubakana udulokana bedákana. Lade'axa bedá ka benneolaha, nianna tti bedá ka nu kwitiha, axtaliba ki beya'an a sun Jesús-niba, nuilaha nna duna arloe. <sup>10</sup>Nianna tti beyadhe nna rabie nuilaha:

—Xa nuila, ¿nála ka nu rusiakana ikiluha? ¿Si niba ttúkana a beyaxakinna ukinnikana lu?

<sup>11</sup>Nuilaha nna bekabina, rana:

—Niba ttúkana xa tata.

Nianna ra Jesús-ni nuilaha:

—Anágaba neti labí ukinnia lu. Beyya lisiluha nna debá nnanna bitturu uinlu tulha.]

### Jesús-ni anke xiani ge ka benne

<sup>12</sup>Jesús-ni nna rodolise ka benne attu libe nna redeabie ke:

—Neti ankaa xiani ge ka benne se'e yiesi lo yu-ni. Benne etenalhe neti, labí tseki benneha lhe'e chulha, sinuki tsekilee

lhe'e xianiha, xiani nu uinna kini satíaba aka benbie arlo Tata Do Yebáha.

<sup>13</sup>Tti biyienkin fariseo-ni nu reeha, nianna rákane:

—La kwinabalu rigixxi'alu nuxa ankalu. Lanú attu nuxa benne rigixxi'ana gelu. De nuha nna labí daka nu rigixxi'alu-na.

<sup>14</sup>Jesús-ni nna bekabie gekani, ree:

—Meskiba kwinaba neti rigixxi'aya kia, ttaka gwa dakaba nu rinnea-ni kumu neti gwa yubaa gaxa biriaya daya lhe gaxa daka diaya lhe, ttaka lebi'i labí yule gá biriaya daya lhe gá daka diaya lhe. <sup>15</sup>Lebi'i ruinbale elhuxtisi ge ttu benne attiba ruinba ka benne se'e yiesi lo yu-ni. Neti labí runia elhuxtisi ge nuxa benne. <sup>16</sup>Ganna unia elhuxtisi nna uinbaa na attiba ankaba geni, kumu labí ttú neti nuha unia elhuxtisiha, uingaba Tata kia benne udhelhe netiha. <sup>17</sup>Lo bia bennabi gele-na dia ra deki ganna chupa ka benne rinneke turo'o rigixxi'ake ge nu bilákanie, la'ania nna gwa dakaba nu rinne ka benneha. <sup>18</sup>Anágaba neti, la kwinaba neti rigixxi'aya kia lhe Tata kia benne udhelhe netiha, benneha nuha anagakabe attu benne rigixxi'abie kia.

<sup>19</sup>Lakana nna unnaba tisakane, rákana:

—¿Ná tata gelu?

Jesús-ni nna bekabie gekani, ree:

—Lebi'i labí gwalí ankabienle neti, nigaba ankabienle Tata kiaha. Gannala ttixka ankabienle neti, la'ania nna gwankabialinle Tata kiaha.

<sup>20</sup>Iyá nuní ra Jesús-ni tti doe rule'enie ka benne ro'o yotuha gaxxaba ata sia ka nu rigu'uke belhiu lhe'ekaniha nna ni ttúkana labí bedaxxukane kumu labí chi bisia ura gebie.

**Jesús-ni rabie: “Ata eya'ayaha, lebi'i labí aka esiale niha”**

<sup>21</sup>Nianna redea Jesús-ni ka benneha attu libe:

—Neti eya'abaa, lebi'i nna egilale neti. Ttaka ata eya'ayaha, lebi'i labí aka esiale niha, nna lo ka tulha gele-naba gattile.

<sup>22</sup>Nianna ra ka nu loni ge ka benne Israel-ni:

—¿Si la labana uin geni ki gattina, de nuha nna rana: “Ata eya'ayaha, lebi'i labí aka esiale niha”?

<sup>23</sup>Jesús-ni nna ree kana:

—Lebi'i ankabale ge yiesi lo yu-ni, neti nna ankabaa ge yebáha. Labí ankaa ge yiesi lo yu-ni. <sup>24</sup>De nuha nna ria le: “Gattibale lo ka tulha gele-na.” Kumu ganna abíba ria lele deki neti ankaa nu chi ria le deki ankaa, la'ania nna gattibale lo ka tulha gele-na.

<sup>25</sup>Nianna unnaba tisakane, rákane:

—Lu nna, ¿nú ankalu?

Lee nna ree kana:

—Neti ankabaa benne chi xpeya le sisi'a tteha xa. <sup>26</sup>Ixeba nu teeti upeya le lhe ge ixeba nu ukinnia le lhe, ttaka labí unia aníha. Kumu sunruba rigixxi'ania ka benne se'e yiesi lo yu-ni nu biyienti ra benne udhelhe netiha. Benneha rinnebe nu ankaba gwalí.

<sup>27</sup>Ttaka lakana nna labí ute dákinna deki ge Tata geeha-ba nuha rinnebie, delába benne do yebáha. <sup>28</sup>De nuha nna ra Jesús-ni kana:

—Neti benne daya yebáha, gannaliba chi ulhidhale neti betále lo ya kurusiha, la'anialiba nna tte denle deki neti nuha ankaa nu chi ria le deki ankaa lhe anágaba tte dágabinle deki labí runia nu anka kia, sinuki attiba bele'eni Tata kiaha neti, aníha-ba rinnea. <sup>29</sup>Tata kia benne udhelhe netiha gwa duba benneha len neti. Labí chi bedú benneha neti suna ttúbaa, kumu satíaba runia nu ru'u lebie.

<sup>30</sup>Tti ra Jesús-ni aníha, ixeba ka benne ugía leke gebie.

### **Jesús-ni rodilábie ka benne lo ka tulha ruinke**

<sup>31</sup>Nianna tti ra Jesús-ni ka benne Israel, ka benne chi ugía leke geeha:

—Ganna lebi'i udole tisa ge nu rinnea-ni, la'anialigaba nna chi akale benne gwalíga rudhetinia. <sup>32</sup>La'anialigaba nna chi tte denle nu anka gwalí nna nu anka gwalíha nna uinna ki ese'e lhaale.

<sup>33</sup>Ka benneha nna bekabike, ráke:

—Ri'itu ankatu benne datiatu Abraham-ni nna ni tsa labí chi bito'o ri'itu lo sina ge attu benne subi. ¿Gasina nuha nna innálu deki nu anka gwalíha uinna kini ese'e lhaatu?

<sup>34</sup>Jesús-ni nna bekabie ge ka benneha, ree:

—Netiru ria, iyába ka nu ruin tulha, to'obakana lo tulha ruinkanaha. <sup>35</sup>Kumu ttu nu to'ona lo sinaha labí aka dho nuha

satía lisi xxananiha; xi'in biyú xxana nu to'o lo sinaha-ligaba nna gwa ralhana dhona satía lisi xxudiniha kumu de ankana xi'in biyúni. <sup>36</sup>Laxkala ganna neti benne ankaa Xi'in Tata Do Yebáha odiláya le lo ka tulha ruinle-na, la'anialigaba nna gwalíga chi ese'e lhaale. <sup>37</sup>Neti yua deki lebi'i ankale benne datiale Abraham-ni, ttaka ruinlale uttile neti kumu de labí rulabile ka tisa rule'a-ni. <sup>38</sup>Neti rinnebaa ge nu bilábatí tti doa len Tata kia do yebáha; lebi'i nna ruinbale nu rule'ebin xxudileha le.

<sup>39</sup>Lake nna bekabike ráke:

—Abraham-niba anka xxudi ri'itu.

Ttaka Jesús-ni nna rabie ke:

—Gannala ttixka gwalíga datiale Abraham-ni, la'ania nna gwa ruinlale nu ben benneha. <sup>40</sup>Ttaka de rigixxi'aya nu ankaba gwalí nu biyienbati ge Tata Do Yebáha, lebi'i nna ruinlale uttile neti. Abraham-ni labí ben benneha tti ruinle-na. <sup>41</sup>Lebi'i ruinbale nu ruin xxudileha.

Lake nna ráke bie:

—Ri'itu labí uka ri'itu lo neda; doba ttu xxudi ri'itu, delába Tata Do Yebáha.

<sup>42</sup>Jesús-ni nna rabie ke:

—Gannala gwalíga Tata Do Yebáha anke xxudile, la'ania nna lebi'i gwa rakalinle kia, kumu neti ata do Tata Do Yebáha-ba biriaya daya nna dua nii. Labí nu yu'u iki neti benia ki daya; labe udhelhe neti. <sup>43</sup>¿Beaka a rite denle ge nu rinnea-ni? Labí rite denle kumu labí raka lele iyieninle nu ria-ni. <sup>44</sup>Nu xxegwiha-ba anka xxudile nna nu raka le nuha-ba ruinle. Nuha attili sisi'a tteha ankana ttu nu runi elhutti lhe labí ridú tsitsina lo nu anka gwalíha lhe, kumu labí rinnena nu anka gwalí. Tti rinnena nna rinnebana nu ankabana, kumu ruinba leni lhe ankabana xxudi ka nu ruin lekani lhe. <sup>45</sup>Neti nna de rinnea nu anka gwalí, de nuha nna lebi'i labí ria lele kia. <sup>46</sup>Ni ttúle labí aka gele usiale ikia deki ankaa benne ruin tulha. Kumu ganna neti rinnebaa nu ankaba gwalí, ¿beakala nna a ria lele kia ganna? <sup>47</sup>Benne anke ge Tata Do Yebáha, ka tisa ge Tata Do Yebáha-ba rudo naga benneha. Ttaka lebi'i, kumu de labí ankale ge Tata Do Yebáha, de nuha nna labí rudo nagale gebie.

**Jesús-ni rabie: “Attili lani gali Abraham-ni neti chila doa”**

<sup>48</sup>Ka nu Israel-ni nna bekabikana, rákana Jesús-ni:

—Gwalíbintu ratu nu Samariaba ankalu nna nu xxegwiba yu'u latilu.

<sup>49</sup>Jesús-ni nna bekabie gekani, ree:

—Lanú nu xxegwi yu'u lati neti. Neti gwa rugwebaa lidhaka Tata kiahá, ttaka lebi'i labí rugwele lidhaka. <sup>50</sup>Neti labí runia kini akaa benne ra xxeni lasia. Ttaka Tata Do Yebáha-ba raka lebie akaa benne ra xxeni lasia nna labe inná nú ri'i gwalínri'i. <sup>51</sup>Netiru ria, benne rudobie tisa ge nu ria-ni, labí gatti benneha.

<sup>52</sup>Ka nu Israel-ni nna rákane:

—Nnannaligaba chi yutu deki nu xxegwiha-ba yu'u latilu. Abraham-ni lhe ka profetaha lhe, uttiba ka benneha. Lu nna ralu: “Nu udona tisa ge nu rinnea-ni, labí gattina.” <sup>53</sup>Lu, ¿si xxenirula ra lelu atti tata getu Abraham-ni? Benneha uttibe, anágaba ka profeta ge Tata Do Yebáha uttigaba ka benneha. Lu nna, ¿nú rakinlu deki ankalu?

<sup>54</sup>Jesús-ni nna bekabie, ree kana:

—Ganna kwinaba neti runia ki ra xxeni lasia, la'ania nna nu ra xxeni lasiaha labí daka nuha; sinuki Tata kiahá nuha runie kini ra xxeni lasia. Benneha-gaba nuha rale deki anke Diosi gele. <sup>55</sup>Ttaka lebi'i labí ankabienle benneha; neti nna gwankabiabatie. Kumu ganna inná labí ankabiatie, la'ania nna ruingaba lasia attiba ruinle. Ttaka neti gwankabiabati benneha lhe gwa rudobaa tisa ge nu rabie neti lhe. <sup>56</sup>Abraham benne uka xuttoleha bedeakanie kumu chiba yue ilánie la sá isiayaha nna gwa bilábanie la sáha nna yalhá bedeakanie.

<sup>57</sup>Nianna ra ka nu Israel-nie:

—Ki nila tsieyona (50) ida abí chi ankinlu, delo nna ralu deki chi bilenlu Abraham-ni.

<sup>58</sup>Lee nna ree kana:

—Netiru ria, attili lani gali Abraham-ni, neti chila doa la'ania.

<sup>59</sup>Nianna tti bedaxxukana íyya ruinkana use'ekane, ttaka Jesús-ni bekatsi tteba loe lagwi ge ka benne saa niha nna beriabie ro'o yotuha deyye.

### Jesús-ni beyonie ttu benne lo xua

**9** <sup>1</sup>Tti deyu'u Jesús-ni neda deyye nna bilánie ttu benne lo xua. Aníha-ba anka benneha attili ulieha. <sup>2</sup>Ka benne rudhetinieha nna unnaba tisake Jesús-ni, ráke bie:



—Maestru, ¿núke ben ttu bixa tulha de nuha nna anka nu kwiti-ni aní? ¿Si lana ak? ¿Ka tata nan geniha ak?

<sup>3</sup>Jesús-ni nna bekabie ree:

—Labí ankana nu lo xua de bixa tulha benna, nigaba de bixa tulha ben ka tata nan geniha. Ankana aní kini eyoin Tata Do Yebáha na nna len nu unieha



(San Juan 9:1-12)

nna ule'e nu xxeni ra lecha. <sup>4</sup>Ttiru nnanna sa anka resá, uin-xxiri'i sina ge benne udhelhe netiha; kumu ganna chi uka rela, la'ania nna lanúru aka geni kwenna sina. <sup>5</sup>Laka nnanna doa yiesi lo yu-ni, netiba ankaa xiani ge iyá ka benne se'e yiesi lo yu-ni.

<sup>6</sup>Nuha-ba ree nna tti bettuttu xxenie lo yu nna len xxenieha benie yuna, nianna tti utabie nuha ka iyya lo benne lo xuaha. <sup>7</sup>Nianna tti ree benneha:

—Ugía gwattí lolu ro'o yielá nu tee láni Siloé. (“Siloé” dienna innána Nu Ria Mandadu.)

Benneha nna ugía ttebe gwattí lobie nna tti beyekieha nna chiba relánie. <sup>8</sup>Ka benne se'e gaxxaba ata do benne uka lo xuaha lhe ka benne chi bilákanie ridoe rinnabe belhiu, ka benneha ra luesike:

—¿Laaba nuníba nuha ridona rinnabana belhiu?

<sup>9</sup>Ttu chupake nna ráke:

—Ila, labana nuha ridona niha.

Adíke nna ráke:

—Laa lagana nuha. De rugíaba nuní tti rugía nuha.

Nubiyúha nna rana:

—Ila, netiba nuha.

<sup>10</sup>Nianna tti ráke na:

—¿Galasina uka nna chi belenlu?

<sup>11</sup>Lana nna bekabina, rana:

—Benne tee lábie Jesús-niba benie latti yuna nna utabie ka iyya loa-ni, nianna tti ree neti: “Ugía g wattí lolu ro'o yielá nu tee láni Siloé.” Nianna ugíaya g wattí loa nna belá ttebati.

**Ka fariseo-ni rinnaba tisakana benne uka lo xua gasina beyali ka iyya loeha**

**12**Nianna tti ráke nubiyú chi beyali loniha:

—¿Gon-na du nubiyú ralu-na?

Lana nna rana:

—Nú yu.

**13**Nianna tti chekana benne uka lo xuaha arlo ka fariseo-ni, **14**kumu tti ben Jesús-ni yuna len xxenieha tti bedhalie lo nubiyúha, la sáha ukana sá tti reyaka le ka benne Israel-ni. **15**Nianna bedennaba tisagaba ka fariseo-ni nubiyúha attu libe, rákana na:

—¿Gasina uka nna belenlu?

Lana nna bekabina, rana kana:

—Yunaba utabina ka iyya loa-ni, nianna tti g wattí loa nna belá ttebati.

**16**Ttu chupa ka fariseo-ni nna rákana:

—Nubiyú benna nuní labí anka nuha ge Tata Do Yebáha, kumu ribenlana sina tti risia ka sá reyaka leri'i.

Adíkana nna rákana:

—¿Gasina aka ge ttu benne unie luesi ka milagru-ni ganna anke nu runi tulha?

Ya yaba le rinnekana, labí turo'o rinnekana. **17**Nianna tti bedennaba tisakana nubiyú uka lo xuaha attu libe, rákana na:

—Lu nna, ¿bíla ralu ge nu bedhalina lolu-na?

Lana nna bekabina, rana:

—Neti ria, ankabana ttu profeta ge Tata Do Yebáha xa.

**18**Ttaka ka nu loni ge ka benne Israel-ni nna labí ria lekani deki uka nubiyúha benne lo xua, nnanna nna chiba relánie. Uxilibakana ka tata nan ge benneha **19**nna unnaba tisakana ka benneha, rákana ke:

—¿Si xi'in biyúle nu du-ni, nu rale deki ttili ulinaha xua loni? ¿Galasina nna chiba relenna nnanna?

**20**Ka xxudi ixná nubiyúha nna bekabike, ráke:

—Ri'itu yúbatu deki xi'inbatu nuní lhe yúgabatu deki nu lo xuaba anka nuní ttili ulinaha. **21**Ttaka labí yutu gaxasina

uka nna chi relenna lhe nigaba a yutu nú bedhalina loni lhe. Gwalinnaba tisa na. Chiba anka nuná nu xxeni. Kwinaba lana kixxi'ana nú bedhalina loni.

<sup>22</sup>Aníha-ba ra ka tata nan ge nubiyúha kumu rasikanie ge ka nu loni ge ka benne Israel-ni kumu chi unnekana rákana, ganna ttu benne inne deki Jesús-ni anke Cristu, la'ania nna ebea ttebakana benneha lhe'e yo'o ata rudheti ka benne Israel-ni ka tisa ge Tata Do Yebáha. <sup>23</sup>De nuha nna ra ka tata nan geniha: “Naba gwalinnaba tisa na. Chiba anka nuná nu xxeni.”

<sup>24</sup>Nianna tti bedeaxi ka nu loni ge ka benne Israel-ni benne uka lo xuaha attu libe nna redeakane:

—Arlo Tata Do Yebáha unne nu anka gwalí. Ri'itu yutu deki nu beyoinna luha, nu ruin tulhaba anka nuha.

<sup>25</sup>Nubiyúha nna bekabina gekani, rana:

—Neti bittuba yua si ankana nu ruin tulha. Neti nu yúruba, ukaa benne lo xua, nnanna nna chiba reláti.

<sup>26</sup>Lakana nna bedennaba tisakana nubiyúha attu libe, rákana na:

—¿Bí bedhakana lu ki belenlu? ¿Gasina bedhalina ka iyya lolu-na?

<sup>27</sup>Lana nna bedekabina gekani, rana kana:

—Ki chiba xpeya le nna lebi'i nna bittuba ria lele. ¿Beaka raka lele kixxi'ania le attu libe? ¿Si rakagaba lele akale benne sanalhale na ak?

<sup>28</sup>Nianna tti belisa satsakana nubiyúha, rákana na:

—Luba ankalu nu danalhalu na xa. Ri'itu Moisés-niba danalha ri'itu. <sup>29</sup>Ri'itu yúbatu deki Tata Do Yebáha unne lenie Moisés-ni, ttaka nubiyú ralu-na labí yutu gaxa biria nuná dana.

<sup>30</sup>Nubiyúha nna bekabina gekani, rana:

—¿Galabasina anka nuní? Lebi'i abígaba yule gaxa biriana dana. Neti nna gwa bedhalibana loa. <sup>31</sup>Ri'i gwa yu xeabari'i deki Tata Do Yebáha labí rudo naga benneha ge ka nu ruin tulha. Sunruba rudo nage ge ka nu gwaria lekanie lhe ruinkana nu ru'u lebie lhe. <sup>32</sup>Ni tsa labí chi biyieninri'i innékana ge ttu benne innákana deki bedhalie lo ttu benne ulie anke lo xua. <sup>33</sup>Ganna ttixka nu bedhalina ka iyya loa-ni abittuba ankana nu udhelha Tata Do Yebáha, la'ania nna labí aka ge nuná uinna ttu bixa.

**34** Nianna rákana nubiyúha:

—Ki lu nu ruin tulhaba ankalu attili uliluha, ¿gá lolu nna lula dalu gwele'en ri'itu?

Nianna tti bebeakana nubiyúha lhe'e yo'o ata rudhetikana ka tisa ge Tata Do Yebáha.

**35** Tti chi bina Jesús-ni deki chi bebeakana nubiyúha niha, nna tti beti'abie naha nna ree na:

—¿Si gwa ria lelu benne daa yebáha?ʃ

**36** Nubiyúha nna bekabina, rana:

—¿Núke nuná xa tata? Utixxi'a kini neti nna tsia lasia gebie.

**37** Jesús-ni nna rabie na:

—Chiba bilenlu benneha nna labie nuní rinne lenlu.

**38** Nubiyúha nna rana:

—Gwa riaba lasia lu xa tata.

Nianna tti bedú xibini arloe. **39** Jesús-ni nna ree na:

—Neti bisiaya yiesi lo yu-ni kini unia elhuxtisi ge ka benne kini ka nu lo xua-na nna elákinna, ka nu gwa rilálakinna nna eyakakana ka nu lo xua.

**40** Ttu chupa ka fariseo-ni ka nu se'ekana lenie niha, tti biyienkinna nu reeha, nianna unnaba tisakane, rákane:

—Ganna niha nna ri'itu, ¿si ankagabatu benne lo xua?

**41** Jesús-ni nna bekabie gekani, ree:

—Gannala ankale nu lo xua, la'ania nna abittula ujale yua ge ka tulha ruinle-na. Ttaka kumu rale: “Gwa rilábintu”, de nuha nna nujabale yua ge ka tulha ruinle-na.

**Jesús-ni rigixxi'abie ge ttu benne reki lo ka neru**

**10** <sup>1</sup>Netiru ria, nu abíba ra'ana ro'o puerta du ro'o lisi ka neruha, sinuki ata subila ribixxina ra'ana, nu runi aníha ubanaba anka nuha. <sup>2</sup>Ttaka nu gwa ra'ana ata do ro'o lisi ka neruha, nuha-ligaba nna gwalí gwankana nu rekina lo ka nuha <sup>3</sup>nna nu ridú ki ruyúna ro'o lisi ka neruha gwa ridhaliba nuha kini ra'a nu reki lo ka neruha. Ka neruha nna reyoinbia ttebakana tsi'i nu rekina lokaniha. Lana nna kua ttu ttuba ka neruha raxina rudettina lákani, nianna tti ribeana kana. <sup>4</sup>Ganna chi uleana iyá ka neru ka nu anka geniha, nianna tti rineruna lo ka nuha. Ka

*f* 9:35 Lo yetsi-ni dia ra: “¿Si gwa ria lelu benne da yebáha?”, lo attu yetsi dia ra: “¿Si gwa ria lelu benne anke Xi'in Tata Do Yebáha?”



(San Juan 10:1-21)

nuha nna gwa ranalhabakana na kumu gwa reyoinbiabakana tsi'ini. <sup>5</sup>Ttaka nu abittu ankabiakinnaha, labí sanalhakana nuha; uxunnalakana geni kumu de labí ankabiakinna tsi'ini.

<sup>6</sup>Nuní unne Jesús-ni betanie ka benne se'e niha, ttaka lake nna labí ute dákanie bixa diani nu raka lebie kixxi'anie keha.

### Jesús-ni anke ttu benne ruyú tsebie ka neru geeha

<sup>7</sup>Nianna redea Jesús-ni ka benneha attu libe:

—Netiru ria: Neti nuha ankaa puerta du ro'o lisi ka neruha. <sup>8</sup>Iyába ka nu abittu biyú tsekana ka neruha, ka nu chi bitakana tti lanila isiaya yiesi lo yu-ni, ka nuha ubanaba ukakana. Ka neruha nna labí bedo nagakani gekani. <sup>9</sup>Neti ankaa puerta du ro'o lisi ka neruha. Benne ga'abie ro'o puertaha, godilába Tata Do Yebáha bie. La'ania nna uinbe ttiba runi ttu neru to. Neru toha reria reta'abana, rigilana nu gona.

<sup>10</sup>'Ubanaha suna daba nuha kini lhanana lhe uttina lhe utse'e loona lhe; ttaka neti daya kini odiláya le kini satíaba aka benle arlo Tata Do Yebáha, kini anáchu nna gwasipa edí baale tse'ele. <sup>11</sup>Neti nuha ankaa benne ruyú tse ka neruha. Benne ruyú tse ka neruha nna reria iki reria lebie meskila gattie kini odilábie ka neruha. <sup>12</sup>Ttaka ttu nu ridí lhiaxani ki rekina lo ka neruha, tti rilenna daa sageeha nna ruse'e bixxibana ka neruha nna ruxunnina kumu laaga geni ka nuha. Sageeha nna ruinna udaxxuna ka neruha, nianna rutsatsana kana. <sup>13</sup>Nu rekina lo ka neruha ruxunnilana nna labí retabinna ge ka nuha, kumu nu naxaba ankana.

<sup>14</sup>'Neti ankaa benne ruyú tsea ka neruha. Neti ankabiabati ka neru ka nu ankakana kia. Anágaba ka nu chi ankakana kiahá nna gwankabiagabakinna neti. <sup>15</sup>Ttíba Tata kiahá chi ankabianie neti, anágaba neti chigaba ankabiatie lhe rutea elha nabani kia-ni kini gattia ki odiláya ka neruha. <sup>16</sup>Se'erugabati adí ka neru ka nu labí chi selakana ka nu se'e nii. Anágaba ka nuha rakagaba doelha taxía kana nna gwayienbakinna tsi'a. Gwanka suna ttu dhiba eyakakana lhe ttúba benne tsekie lokani lhe.

<sup>17</sup>'De nuha nna Tata kiahá rakanie kia, kumu rutea elha nabani kia-ni ki gattia, kini delo nna eyaka benbaa attu libe. <sup>18</sup>Lanú nu uttina neti, sinuki kwinaba neti redá lasia gattia kwenta ge ka benne, kumu neti gwa teebe lo neda kia utea elha nabani kia-ni ki gattia. Anágaba nna gwakagaba kia eyaka bania attu libe. Nuní chi bodha'an Tata kia ki unia.

<sup>19</sup>Tti biyienin ka nu Israel-ni nu reeha, nianna bedela'a lhe'e luesikani kumu de labí riyien ten ge luesikani. <sup>20</sup>Ixebakana rákana:

—¿Beaka rudo nagakani ge nuní, ki espíritu xxegwiha-ba yu'u lati nuní?

Lhe rágabakana:

—Rakaba iki nuní.

<sup>21</sup>Adíkana nna rákana:

—Lanú ttu benne yu'u espíritu xxegwi latie gwaka gebie innee tti rinne nuní. Laa gwakaga ge espíritu xxegwiha edhalina lo ttu benne lo xua.

### **Ka nu loni ge ka nu Israel-ni rigu'u ni'akani Jesús-ni**

<sup>22</sup>Tti chi bisia ka beo raka idilhaha, la'ania nuha ka benne Israel-ni ruinke laní Jerusalén-ni tti rexxa leke la sá bocharike yotuha nna boteke benneha len Tata Do Yebáha. <sup>23</sup>Jesús-ni nna rekie ro'o yotuha ata daa kweredori ge Salomón-ni. <sup>24</sup>Ka benne Israel-ni bitupake abi'iba kwe'ebie nna ráke bie:

—¿Nukalila kixxi'alu nuxa ankalu? Ganna lu ankalu Cristu, tsa ttela utixxi'en ri'itu kini aka xen letu.

<sup>25</sup>Jesús-ni nna bekabie geke, ree:

—Ki chiba utixxi'ania le nna abígaba ria lele. Ka milagru rute Tata kiahá ki runia, ka nuha rigixxi'akana nuxa ankaa. <sup>26</sup>Ttaka

lebi'i nna labí ria lele, kumu de labí ankale neru kia.<sup>g</sup> <sup>27</sup>Ka benne ankake neru kiahá, gwa riyienbakanie tsi'a tti rinnea. Neti nna gwankabiabati ke, lake nna gwa retenalhabake neti. <sup>28</sup>Neti runia kini raka benke ttu dia lii nna ttu tsaba labí tse'e looke. Anágaba nna lanú nu aka geni eguana ke lo náya. <sup>29</sup>Tata kiahá betebie ke lasi náya. Benneha xxenirula ra lebie tti attu benne, laxkala lanú dhaana eguana ka benne ankake neru kiahá lo ná Tata kiahá. <sup>30</sup>Neti lhe Tata kiahá lhe, ttúba benne anka ri'itu.

<sup>31</sup>Nianna tti bododaxxu ka nu Israel-ni íyya nna ruinkana odose'ekane. <sup>32</sup>Jesús-ni nna ree kana:

—Ixeba ka milagru chi benia arlole, delába ka milagru bete Tata kiahá kini unia. ¿Nú ge ka milagru beniaha ruinle usiale neti íyya?

<sup>33</sup>Lakana nna bekabikana, rákana:

—Laa ruingatu usiatu lu íyya de ruinlu ka milagru. Ruintu usiatu lu íyya kumu Tata Do Yebáha nuná rorexá gaalu tti ralu aná. Kumu lu ki benneba ankalu nna ruinlu deki ankalu Diosi.

<sup>34-35</sup>Jesús-ni nna bekabie ree kana:

—Ri'i gwa yúbari'i deki labí aka ku'u ni'ari'i nu ra lo ka yetsi ge Tata Do Yebáha. ¿Laaba lo ka yetsi denle-na ra Tata Do Yebáha: “Lebi'i diosiba ankale”?<sup>h</sup> Ki ganna diosi utixxa Tata Do Yebáha lá ka benne begwebie ke ka tisa geeha, <sup>36</sup>¿beakala netila ulesie nna udhelhe yiesi lo yu-ni, beakala rálale neti deki rorexá gaaya Tata Do Yebáha de ria, “Neti ankaa Xi'inie”? <sup>37</sup>Ganna neti abíba runia nu ruin Tata kiahá, bittugaba tsia lele kia, <sup>38</sup>ttaka ganna gwa ruinbaa nu runie, meskila a ria lele kia, gwaltsia lele ge nu rilenle runia, kini tsala unale deki Tata kiahá ttúba benne anke len neti nna neti nna ttúba benne ankaa lenie.

<sup>39</sup>Nianna tti redeonkana ododaxxukane attu libe, ttaka lee nna ulábe lo nákani.

<sup>40</sup>Nianna tti dedheyye daka attu ladu ro'lo yoo Jordán-ni, daka ata begadí Juan-ni ka benne inda ttuha nna niha-ba ugwekie. <sup>41</sup>Ixe ka benne risinke ata dueha nna ráke:

—Gwalí galá Juan-ni labí bixa ttu milagru ben benneha, ttaka iyába nu utixxi'anie ri'i ge nubiyú du nii, gwalíba nu ra benneha.

<sup>g</sup> 10:26 Lo yetsi-ni ata dia ra: “Labí anka le neru kia”, lo attu yetsi nna bodienke ráke: “Labí ankale neru kia attiba chi ria le”.

<sup>h</sup> 10:34-35 Salmo 82:6

<sup>42</sup>Nianna ixeba ka benne ugía leke ge Jesús-ni tti rekie daka ro'o yoo Jordán-ni.

### Lázaro-ni uttie

**11** <sup>1</sup>La'ania do ttu benne rani lábie Lázaro. Anke benne lhe'esi Betania, lhe'esi ge María-ni lhe ge xilani Marta-ni lhe. <sup>2</sup>María-ni raka danni Lázaro-ni. María-ni nuha bedona seti rure ixixxi ka ni'a Jesús-ni nna bodibisina ka nuha len itsa ikiniha. <sup>3</sup>Ixa xilabakani udhelhakana, rákana Jesús-ni:

—Tata, benne raka xxattinlu geeha, raniba benneha.

<sup>4</sup>Jesús-ni tti bine nuha nna ree:

—Isagwe ridaka nu kwitihá labí anka nuha nu uttina na, sinuki isagweha ixúlana kini ula'a nu xxeni ra le Tata Do Yebáha lhe anágaba neti benne ankaa Xi'inieha, ula'agaba nu xxeni ra lasia.

<sup>5</sup>Jesús-ni meskiba gwa rakanie ge Marta-ni lhe ge xilaniha lhe ge Lázaro-ni lhe, <sup>6</sup>ttaka labie atti bine deki raniba Lázaro-ni, beya'anlee ata rekieha a chupa ubisa. <sup>7</sup>Delola nna ree ka benne rudhetinieha:

—Eya'alari'i daka Judea-ni attu libe.

<sup>8</sup>Ka benne rudhetinieha nna ráke bie:

—Maestru, ki si ukaba ttu chupa ubisa-ni nuha tti ruin ka nu Israel-ni usiakana lu íyya. ¿Si edeya'abari'i niha attu libe?

<sup>9</sup>Jesús-ni nna bekabie gekani, ree:

—¿Laaba ganna tsi'inu (12) ura yu'u lhe'e ttu sá? Nu reki resáha labí riyu'una nuha, kumu gwa rilábinna xiani ru'u yiesi lo yu-ni, <sup>10</sup>ttaka nu reki relaha iyu'unaba nuha, kumu labí xiani ru'u geni kini ilenna.

<sup>11</sup>Iki de nuha nna ree:

—Amigu geri'i Lázaruha chiba uta'adhi benneha, ttaka chi tsiaya kini odibánie.

<sup>12</sup>Ka benne rudhetinieha nna ráke bie:

—Tata, ganna chiba utta'adhie, nuha runna liina deki gweyakaba benneha.

<sup>13</sup>Ttaka Jesús-ni ge elhutti ge Lázaro-niba nuha rinnebie. Lake nna ukakanie ganna ge bisielá ra'adhibari'i nuha rinnebie. <sup>14</sup>Niala nna tti utixxi'a tsenie ke, rabie ke:

—Lázaro-ni chiba utti nuha. <sup>15</sup>De lebi'i nna redeakati kumu de labí dua niha tti utti benneha. Nnanna nna tsiarugari'i kini ilenle nu unia, kini aníha nna tsia lele kia.



**16** Tomás benne tekanie lábie Kwachi, benneha ree adí ka benne rudheti lenieha:

—Anágaba ri'i tsiagabari'i kini gattigabari'i len benneha.

### **Jesús-ni belhidhe Lázaro-ni lo elhuttiha**

**17**Tti bisin Jesús-ni lhe'esi Betania bine deki chi uka ttpa ubisa bigatsi Lázaro-ni. **18**Betania-ni rena gaxxaba kwe'e Jerusalén-ni, rena ttiba tsunna kilómetru **19**nna ixé ka benne Israel chi ugíake gwalannike Marta-ni lhe María-ni lhe, ki gwadú ittake le ka benneha de du si'i leke utti dankeha. **20**Tti bina Marta-ni deki chi isin Jesús-ni lhe'esiha, nianna biria ttebana gwaledane, ttaka María-ni nna beya'anbana lhe'e yo'oha. **21**Marta-ni nna rana Jesús-ni:

—Gannaru dolu nii xa tata, labíga utti benne danaaha ganna ttixka. **22**Ttaka neti yubaa meskiba nnanna iyába nu innabalu len Tata Do Yebáha, gutebe nuha lenlu xa tata.

**23**Jesús-ni nna bekabie, ree na:

—Gweyaka benba danluha.

**24**Marta-ni nna bekabina, rane:

—Neti yubaa deki gweyaka benba benneha tti eyadha ka benne chi uttiha eyaka benke ganna chi isia sá daluxaha.

**25**Jesús-ni nna rabie na:

—Neti runia ki reyaka ben ka benne chi uttiha lhe runia kini raka ben ka benne ttu dia lii lhe. Benne tsia lebie neti, meskiba chi uttie nna gweyaka benbe ttu dia lii, **26**nna iyába ka benne sa se'e benke, ganna tsia leke neti, ka benneha nna satíaba aka benke, labí gattike. ¿Si gwa ria lelu ge nu ria-ni?

**27**Marta-ni nna rane:

—Ila xa tata, gwa ria galá lasia deki lu ankalu Cristu Xi'in Tata Do Yebaa benne chi ga'anna isia yiesi lo yu-ni.

**28**Iki de tti chi rana Jesús-ni aníha, nianna deyyana gwalisana xilani María-ni nna sigába rana nuha:

—Naa chi du maestruha raxie lu.

**29**María-ni nna sun tteba biyieninna nuha nna bexunni ttebana diana ata du Jesús-ni. **30**Jesús-ni labí chi uta'abie lhe'esiha, sa dube ata beti'a Marta-nieha. **31**Ka benne Israel, ka benne se'e lenke María-ni lhe'e yo'oha ki rodú ittake leni, ka benneha tti bilákanie ruxunnibana biriana diana, nianna danalha ttebake na ukakanie ganna iki baaba diana ubesi.

<sup>32</sup>Tti bisin María-ni ata du Jesús-ni, tti bilenna benneha nna bedú tteba xibini arloe nna rane:

—Tata xisi to, gannaru do kwinalu nii, labíga utti benne danaaha ganna ttixka.

<sup>33</sup>Jesús-ni tti bilánie ribesi María-ni lhe ribesi ka benne Israel dia lennaha lhe, axtaba bega'a dina lhe'e lastoe nna bedú si'ina lebie, <sup>34</sup>nianna tti unnaba tise, ree na:

—¿Gáli gwakatsile na?

Lana nna rane:

—Utáruga belanni xa tata.

<sup>35</sup>Nianna tti uresi Jesús-ni. <sup>36</sup>Ka benne Israel-ni nna ráke:

—¡Gwaluyúruqa, kattiparuba rakanie ge benneha!

<sup>37</sup>Adíke nna ráke:

—Nuní gwa uka geni bedhalina ka iyya lo benne lo xuaha, ¿beakala Lázaro-ni nna a benna kini abittu uttina?

<sup>38</sup>Jesús-ni nna bododú si'i xxattana lebie attu libe, nianna tti die ata bekatsikana benneha. Yieru baa ata bigatsi benneha ttu beleaba anka nuha nna yaya ttu íyya bata ro'oni. <sup>39</sup>Nianna tti ree:

—Gwalikua íyya yaya ro'o yieru baa-na.

Marta dan benne chi uttiha nna rane:

—Gaxa chiba rure benne-na xa tata. Chiba uka ttpa ubisa bigatsie.

<sup>40</sup>Jesús-ni nna bekabie, ree na:

—¿Laaba chiba ria lu ganna lu tsia lelu, la'ania nna gwalábinlu nu xxeni ra le Tata Do Yebáha?

<sup>41</sup>Nianna tti utuakana íyya yaya ro'o yieru baaha. Jesús-ni nna belhidha loe gwetsáha nna ree:

—Ixxixaru rugwea lu xa Tata, kumu gwa biyienbinlu kia. <sup>42</sup>Neti yubaa deki satíaba gwa riyienbinlu kia, ttaka de ka benne se'e nii nna unnea ria aná, kini tsia leke deki lu udhelhalu neti.

<sup>43</sup>Iki de chi rabie aníha, nianna tti unnebie idisa, nna ree:

—¡Lázaro, beria naa nna betá!

<sup>44</sup>Benne chi uttiha nna beriabie derilhi ka ni'eha lhe ka neeha lari. Anágaba loeha derilhigabana lari.

Nianna tti ra Jesús-ni ka benne se'e niha:

—Gwaledhasi ka lari-na latini kini aka edána.



(San Juan 11:38-44)

**Ka nu loni ge ka benne Israel-ni regila lekani  
gasina uttikana Jesús-ni**

(Mt. 26-1-5; Mr. 14:1-2; Lc. 22:1-2)

<sup>45</sup>Ixe ka benne Israel ka benne dia lenke María-ni, tti bilákanie nu ben Jesús-ni, nianna ugía leke gebie. <sup>46</sup>Ttaka attu chupa ka nuha nna ugía ttebakana gwattixxi'akinna ka fariseo-ni nu chi benieha. <sup>47</sup>Ka fariseo-ni lhe ka nu loni ge ka bixxudiha lhe, bottupa ttebakana ka nu runi elhuxtisi ge ka benne Israel-ni nna ra luesikani:

—¿Bíla anka nu uinri'i ganna? Nubiyú reki nii ixeba ka milagru ruinna. <sup>48</sup>Ganna anába la rugwelhabari'i na ruinna ka milagru ruinna-na, la'ania nna iyába ka benne tsia leke geni, nianna tti ita ka nu rinnabia ge Roma-ni etetse'e lookana yotu le'a geri'i-ni lhe ka benne geri'i-ni lhe.

<sup>49</sup>Ttaka ttu ka nuha, delába nu tee lání Caifás nu anka bixxudi xeni lhe'e idaha, nuha nna rana kana:

—Lebi'iligaba birula yule. <sup>50</sup>Nigaba a rite denle deki tserula sariána ri'i ganna sun ttúba benne gattie kwenta ge ka benne geri'i, alaa kila iyábake tse'e looke.

<sup>51</sup>Ttaka Caifás-ni labí nu anka geni nuha unnena tti rana aníha, sinuki kumu de ankabana bixxudi xeni lhe'e idaha, de nuha nna unnena nu chi ga'anani Tata Do Yebáha aka, unnena deki Jesús-ni gattie kini kixe ge ka benne Israel-ni. <sup>52</sup>Anna laa

sun ge ka benneha-ga kixe, anágaba kixagabe ge iyá ka benne chi ankake xi'in Tata Do Yebáha, delába ka benne se'e gatti gattiba, ki ottupe ke nna eyakake ttúba. <sup>53</sup>Laxkala debá la sáha nna beda'a ro'okani uttikana Jesús-ni.

<sup>54</sup>De nuha nna labíru ugweki Jesús-ni la saa lagwi ge ka benne Israel-ni. Berialee ata rekieha nna deyye gaxxaba lo yu bisi ata re ttu yiesi tee lání Efraín. Niha-ba ugweki lenie ka benne rudhetinieha.

<sup>55</sup>Tti chi dabigana isia laní Pascua, delába laní ge ka benne Israel-ni, ixe ka benne se'e lhe'e adí yiesi diake lhe'esi Jerusalén-ni atti lani isia laníha kini eyarike arlo Tata Do Yebáha. <sup>56</sup>Niha rekike regilake Jesús-ni nna rinnaba tisa luesike ro'o yotuha, ra luesike:

—¿Bí rakinle? ¿Si bi gwa itana laní ganna?

<sup>57</sup>Ka nu loni ge ka bixxudiha lhe ka fariseo-ni lhe, ka nuha chi bedhankana tisa rákana, ganna nuxa ttu benne une gaxa reki Jesús-ni teeki kixxi'anie kana kini anáchu aka gekani udaxxukana Jesús-ni.

### María-ni rigabie seti ka ni'a Jesús-ni

**12** <sup>1</sup>Xxupa ubisa atti lanila isia laní Pascuaha, ugía Jesús-ni lhe'esi Betania ata do Lázaro benne belhidha benbie lo elhuttiha. <sup>2</sup>Ka Lázaro-ni benke ttu irse ki goke lenbie. Marta-ni daabie riga'abie lhe'e ka ye'enaha, Lázaro-ni nna labie nuha anke ttu ka nu do len Jesús-ni ro'o mexaha. <sup>3</sup>María-ni nna bedaxxue ttiba medi litru seti rure ixixxi. Setiha ankana taga'a ge ttu iyya to tee lání nardo. Setiha raka xxattana yaxi nna utabi María-ni nuha ka ni'a Jesús-ni. Nianna tti bodibisie ka ni'eha len itsa ikieha. Itúba lhe'e yo'oha ure tsi'i setiha. <sup>4</sup>Ttaka Judas Iscariote<sup>i</sup>, ttu ka nu rudhetinieha nu utene lasi ná ka nu uttikaneha, lana rana:

<sup>5</sup>—¿Beaka a bito'ochila seti rure ixixxi-ni ki utekana geni tsunna gayua (300) denario, kini belhuha nna dhi ka benne dii abittu geke tee?

<sup>6</sup>Judas-ni rana aníha, labí kumu de retabinna ge ka benne abittu geke tee, sinuki rana aníha kumu de ankana ubana lhe kumu lana denna beduti to yu'u belhiu gekeha nna chi labinna rudaxxu sigána belhiu rigu'uke lhe'e nuha.

<sup>i</sup> 12:4 Lo adí ka yetsi rodienke: “Judas Iscariote xi'in Simón”

<sup>7</sup>Nianna tti ra Jesús-ni na:

—Begwelha na egu'una seti-ni ka ni'aya-ni. Ruinna nuní kumu chí rodú tse gaana neti ganna chí isia sá igatsiaha. <sup>8</sup>Ka benne dii abittu geke tee satíaba tse'e ka benne-na len lebi'i, ttaka neti labí satía dhoa len lebi'i.

<sup>9</sup>Ixe ka nu Israel-ni tti binakana deki do Jesús-ni Betania, nianna ugíakana gwalannikane. Ttaka labí sun labie ugíakana gwelanni, sinuki ugíagabakana kini ilákinna Lázaro benne beyadha benbie lo elhuttiha. <sup>10</sup>De nuha nna ka nu loni ge ka bixxudiha chí beda'a ro'okani uttigabakana Lázaro-ni, <sup>11</sup>kumu de lana nna ixé ka benne Israel chí bekwittake lenkana nna ge Jesús-nila chí ria leke.

### Jesús-ni uta'abie lhe'esi Jerusalén-ni

(Mt. 21:1-11; Mr. 11:1-11; Lc. 19:28-40)

<sup>12</sup>Beyeki sáha ixé ka benne dia laní Pascuaha, tti bina ka benneha deki chí daa Jesús-ni ga'abie lhe'esi Jerusalén-ni, <sup>13</sup>nianna ugíake gwaledake bie nna bedaxxuke dina denke nna ribesi'abake, ráke:

—¡Xxeniba ra lelu! ¡Lu ankalu benne udhelha Tata Xisiha! ¡Karubáru! ¡Lu ankalu benne innabialu ka benne Israel-ni!

<sup>14</sup>Nianna tti gwaxxaka Jesús-ni ttu burru kwiti to nna udobie kwe'eni. Ukaba attiba chí ga'anna lo ka yetsi ge Tata Do Yebáha ata dia ra:

<sup>15</sup>¡Bittu gasinle, lebi'i ka benne ge lhe'esi Sión!  
¡Gwalulanniruga! Ne benne rinnabia geleha  
chí daa naa

doe kwe'e ttu burru kwiti to.¡

<sup>16</sup>Tti sisi'a tthea, ka benne rudhetini Jesús-ni labí ute dákanie iyá nu rakaha. Iki deliba chí uttieha nna beyapie yebáha ata ra xxeni leeha, la'anialiba nna tti gwadú leke deki iyába nu benke len benneha chiba ga'anna nuha lo ka yetsi ge Tata Do Yebáha deki aníha aka. <sup>17</sup>Ka benne se'e len Jesús-ni tti beyaxie Lázaro-ni lhe'e yieru baaha, tti belhidha benbie benneha lo elhuttiha, ka benneha rigixxi'ake ge nu bilákanie la'ania. <sup>18</sup>De nuha nna biria ka benne gwaledake bie kumu de binake ge milagru benieha. <sup>19</sup>Ka fariseo-ni nna ra luesikani:

—Gwaluyúrugá, ri'i labí dhaari'i. Gwalugíaruga, iyába ka benne danalhake nuná.

**Ttu chupa ka benne griegu rekike regilake Jesús-ni**

<sup>20</sup>Lagwi ge ka benne dia laníha, delába ka benne dia ki sadú xibike arlo Tata Do Yebáha, lhe'e ka benneha sela ttu chupa ka benne griegu. <sup>21</sup>Ka benneha ubigake ata du Felipe-ni. Felipe-ni ankana benne lhe'esi Betsaida. Yiesiha rena daka Galilea. Nianna unnabake lenna, ráke na:

—Raka letu ilentu Jesús-ni, xa tata.

<sup>22</sup>Felipe-ni nna ugíana utixxi'enna Andrés-ni. Nianna ixpabakana diakana gwatixxi'akinna Jesús-ni nu ra ka benneha. <sup>23</sup>Jesús-ni nna bekabie gekani, ree:

—Benne daa yebáha chiba bisia ura gatti benneha nna eyapie yebáha kini inná xxeni lebie. <sup>24</sup>Netiru ria, ttiba xua xuxtilaha, ganna abíba igatsi yu ikie ki e'eyue, la'ania nna labí tsani benneha, ttúbe eya'anna. Ttaka ganna xuaha gattibe, delába egelhaba xoe nna e'eyue, la'ania nna ixeni lena ute benneha. <sup>25</sup>Benne abittuba raka lebie bixa satebie de etenalhe neti, benneha nnittilee arlo Tata Do Yebáha nna benne eria iki eria lebie etenalhe neti meskila bixa satebie yiesi lo yu-ni, benneha gwaka benlee ttu dia lii arlo Tata Do Yebáha. <sup>26</sup>Ganna nuxa ttu benne raka lebie ixúe kini unie nu raka lasia, teeki itee etenalhe neti nna ata esina dhoaha, niha-gaba dhoe, nna ganna nuxa ttu benne chi rixúe runie nu raka lasia, Tata kiahá gugwebe lidhaka benneha.

**Jesús-ni rigixxi'abie deki teeki uttikane**

<sup>27</sup>Loora nnanna yalhá rudú xxattana neti. Nianna, ¿si gwannílaa, “Tata, bodiláchittu neti lo elha disa uyúá-ni”? Ttaka ki de uyúlaa elha disa-ni, de nuha nna daya yiesi lo yu-ni. <sup>28</sup>Tata, bele'e nu xxeni ra lelu arlo ka benne.

Nuha-ba rabie, nianna biyien tsi'i ttu benne unnebie yebáha, ree:

—Chiba bele'a nu xxeni ra lasia, nnanna nna odole'a na attu libe.

<sup>29</sup>Ka benne se'e niha, tti biyienkanie tsi'i benne unneeha, ttu chupake ráke:

—Uyu'u beba nuná.

Adíke nna ráke:

—Ttu anjeli daa yebáha-ba nuná belise benne-ni.

<sup>30</sup>Jesús-ni nna rabie kana:

—Laa de netiga nna biyien tsi'i benneha, de lebi'ila nuná nna biyien tsi'ibie. <sup>31</sup>Nnanna nuha chi bisia sá uin Tata Do Yebáha elhuxtisi ge ka benne se'e yiesi lo yu-ni lhe nnanna nuha chi bisia sá kweabie nu rinnabiana yiesi lo yu-ni, delába nu xxegwiha. <sup>32</sup>Neti nna ganna chi ulhidhakana neti betákana neti lo ya kurusiha, la'ania nna unia kini iyába ka benne ibigake len neti.

<sup>33</sup>Aníha rinnebie ki benna liie gaxasina gattie. <sup>34</sup>Ka benneha nna bekabike gebie, ráke:

—Ri'itu yutu deki lo ka yetsi ge Tata Do Yebáha rigixxi'a ra deki benne anke Cristuha satíaba aka ben benneha. Lu nna, ¿galasina nna rálalu deki teeki ilhidhakana benne daa yebáha? ¿Núla nuha anka benne daa yebáha ganna?

<sup>35</sup>Jesús-ni nna rabie kana:

—Attu sattiruba do benne anke xiani-ni lagwi gele. De nuha nna laka sa ruden xiani-ni gele, gwalugwela lele kini abittu udaxxu elaha le, kumu nu reki lhe'e chulhaha, labí yu nuha gaxa diana. <sup>36</sup>Laxkala gwaltsia lele ge benne anke xiani-ni laka sa doe len lebi'i, kini anáchu nna akale gebie.

Nuha-ba ra Jesús-ni nna deyye bekatsi lobie gekani.

### Ka nu Israel-ni labí ria lekani ge Jesús-ni

<sup>37</sup>Meskiba chi ben Jesús-ni ixé ka milagru arlo ka benne, ttaka labí ria leke gebie. <sup>38</sup>Aníha uka ki gwado tisa ge nu unne profeta Isaías-ni tti ree Tata Xisiha:

Nurula chi ugía leni ge nu rigixxi'atu-ni xa tata,  
lhe nurula nu chi bele'enlu nu xxeni ra lelu lhe.<sup>k</sup>

<sup>39</sup>Labí uka tsia lekani ge Tata Xisiha, kumu attiba ra Isaías-ni attu lisia lo ka yetsi ge Tata Do Yebáha, tti rana:

<sup>40</sup>Bechulhaba Tata Do Yebáha lokani lhe ben tsitsibe  
lastokani,  
kini meskiba yu'u lokani, abittu bilákinna,  
lhe meskiba tee elha rieni gekani nna abittu utte  
dákinna.

<sup>k</sup> 12:38 Isaías 53:1

Aníha benkana kini ka eyekikana odaxxukana neda  
kia nna eyonia kana, ra Tata Do Yebáha.<sup>1</sup>

<sup>41</sup>Isaías-ni unnena aníha kumu chiba bilenna nu xxeni inná le  
Jesús-ni ganna chi bisie. De nuha nna utixxi'ana gebie.

<sup>42</sup>Laa kiga de nuha nna ixeba ka nu Israel-ni ugía lekani  
ge Jesús-ni, axtala ka nu rinnabia gekaniha ugía lekani.  
Ttaka kumu de rasikinna ge ka fariseo-ni, de nuha nna  
labí rigixxi'akana kini ka kweakana kana lhe'e ka yo'o ata  
rudhetikana ka tisa ge Tata Do Yebáha. <sup>43</sup>Kumu ru'urula  
lekani eya'an tsekana arlo ka benne attichula arlo Tata Do  
Yebáha.

<sup>44</sup>Jesús-ni nna unnebie idisa, ree:

—Benne ria lebie netiha, labí sun neti nuha ria le benneha,  
sinuki riagaba lebie benne udhelhe netiha, <sup>45</sup>nna benne rilánie  
netiha, benne udhelhe netiha nuha rilen benneha. <sup>46</sup>Neti ankaa  
xiani bisiaya yiesi lo yu-ni kini iyába ka benne tsia leke neti abittu  
tse'eke ata anka chulhaha. <sup>47</sup>Nu iyieninna ka tisa kia-ni nna abittu  
uinna nu rákana, labí neti ukinnia nuha, kumu neti laa dagaa  
gwerixxi gwekinni ka benne, sinuki dalaa kini odiláya ke. <sup>48</sup>Nu  
rigu'u ni'ani netiha lhe abittu rulabina ka tisa kia-ni, chiba do nu  
ukinnina nuha, delába ka tisa chi unnea-ni, ka tisa-niba urixxi  
ukinnikana nuha ganna chi isia sá daluxaha. <sup>49</sup>Kumu neti labí  
rinnea nu anka kia. Tata kia benne udhelhe netiha, benneha-ba  
chi rabie neti bixa innía lhe gasina innea lhe. <sup>50</sup>Neti yúgabaa deki  
nu ra benneha uinri'i, nuha uinna kini satíaba aka ben ka benne.  
Laxkala nu rinnea-ni, rinnebaa na attiba chi ra Tata kiahaha.

### Jesús-ni rigíbie ni'a ka benne rudhetinieha

**13** <sup>1</sup>Atti lani isia laní Pascuaha, yuba Jesús-ni deki  
chiba bisia ura edábie yiesi lo yu-ni nna esine ata  
do Tataha. Aníha-ba ttiba ukanie ge ka benne gebie se'e  
yiesi lo yu-ni, aníha-ba sa ukanie geke axtaba tti chi uttieha.  
<sup>2</sup>Tti chi se'eke go irseha, chi galá uxí yie nu xxegwiha Judas  
Iscariote xi'in Simón-ni, ki utene lasi ná ka nu uttikaneha.  
<sup>3</sup>Jesús-ni, kumu chiba yubie deki Tata Do Yebáha, iyába  
chi betebie lasi nábie lhe yube deki ata do Tataha-ba birie  
nna bisie yiesi lo yu-ni lhe ata do benneha-gaba esine lhe,

<sup>1</sup> 12:40 Isaías 6:10





(San Juan 13:1-17)

<sup>4</sup>de nuha nna loora se'eke go irseha, udú liie nna utuabie lari nukueha, nianna tti bedaxxue ttu lari bexxika lhe'ebie.

<sup>5</sup>Nianna tti uta'abie inda lhe'e ttu xiga nna uduloe utié ni'a ka benne rudhetinieha nna bodibisie ka nuha len lari xika lhe'eaha. <sup>6</sup>Tti chi diabie kía ni'a Simón Pedro-ni, lana nna rane:

—Labí dika lula kílu ni'aya xa tata.

<sup>7</sup>Jesús-ni nna bekabie geni, ree:

—Labí tte denlu bixa nuní runia nnanna, ttaka deloliba nna tte denlu nuní.

<sup>8</sup>Pedro-ni nna rane:

—¡Netiligaba nna labí dhielhaa kílu ni'aya!

Jesús-ni nna ree na:

—Ganna abíba dhielhalu kía ni'alu, labíru akalu kia.

<sup>9</sup>Nianna ra Pedro-nie:

—Ganna niha, nna labí sun ka ni'aya-ni kílu, kígabalu ikia-ni lhe ka náya-ni lhe.

<sup>10</sup>Jesús-ni nna ree na:

—Ttu benne chi udi labíru riyasin benneha gadie attu libe, a sun ka ni'abe ití, kumu itúba benneha chi anke nari xú nna lebi'i chiba beyarile arlo Tata Do Yebáha, meskiba laa iyále chi beyari.

<sup>11</sup>Kumu yube nuxakana nuha utekane lasi ná ka nu uttikaneha, de nuha nna rabie kana: “Labí iyále chi beyari.”

<sup>12</sup>Iki de chi utíbie ni'a ka benneha, nianna tti beyokue lari nukueha nna bedobie ro'o mexaha nna ree ke:

—¿Si gwa rite denle bixa nuní bedhakaa le? <sup>13</sup>Lebi'i tenle láya Maestru lhe rale deki ankaa Xxanale lhe. Gwalíbinle kumu neti gwalíba ankaa nu rale-na. <sup>14</sup>Ki neti ankalaa Xxanale lhe Maestru gele nna chi utía ka ni'ale-na, anágaba lebi'i teeki kí ni'a luesile. <sup>15</sup>Neti chi bele'enia le nuní, kini attiba benia utía ni'ale, anágaba uinle. <sup>16</sup>Netiru ria, nu ren sina lo xxananiha labí xxenirula ra le nuha attichula xxananiha. Nigaba nu reki mandaduha, labí xxenirula ra le nuha attichila nu ruinna na mandaduha. <sup>17</sup>Lebi'i ganna rite denle nu ria-ni, karubárule ganna tse'ele uinle aní. <sup>18</sup>Labí iyále nuní xpeya aní; kumu neti yu xeabaa gá se'e ka benne chi ulesia ke ki akake kia. Ttaka teeki sado tisa ge nu ra lo ka yetsi ge Tata Do Yebáha, ata dia ra: “Nu dona go yetta turo'o len netiha, la labana beyekina bebi'i noona neti.”<sup>m</sup> <sup>19</sup>Nnannali chi rigixxi'ania le nuní tti lanila akana, kini ganna chi ukanaha, la'ania nna tsia lele deki neti nuha ankaa Cristu. <sup>20</sup>Netiru ria, nu ulabina benne idhelhaaha, neti nuha ulabi nuha nna nu ulabina netiha nna benne udhelhe netiha nuha ulabina.

**Jesús-ni rigixxi'abie nuxa ka benne rudhetinieha nuha uteke bie lasi ná ka nu uttikaneha**

(Mt. 26:20-25; Mr. 14:17-21; Lc. 22:21-23)

<sup>21</sup>Iki de ra Jesús-ni aníha, nianna tti bedú si'i xxattana lebie nna ree:

—Netiru ria, nuxa ttúle nuní utele neti lasi ná ka nu uttikana neti.

<sup>22</sup>Ka benne rudhetinieha nna udulo ttebake rugía lo luesike, kumu labí yuke nuxa geke nuha rinnebie. <sup>23</sup>Ttu ka benneha, benne raka xxattani Jesús-ni geeha, doe gaxxaba kwe'ebie tti yu'uke go irseha. <sup>24</sup>Benneha nuha betten ná Simón Pedro-ni kini innaba tise Jesús-ni nuxa geke nuha rinnebie. <sup>25</sup>Benneha nna ubigarue gaxxa kwe'e Jesús-ni nna unnaba tise bie, ree:

—¿Núlatu nuní xa tata?

<sup>m</sup> 13:18 Salmo 41:9

<sup>26</sup>Jesús-ni nna bekabie ree:

—Nu ugwea na yettaxtila odibidhaa ikini, lana nuha utena neti lasi ná ka nu uttikana netiha.

Nianna tti bodibidhe iki yettaxtilaha nna begwebie Judas Iscariote xi'in Simón-ni. <sup>27</sup>Tti chi utona yettaxtilaha nna uta'a tteba nu xxegwiha lhe'e lastoni, nianna tti ra Jesús-ni na:

—Tsa ttela beni nu chi re lelu uinlu.

<sup>28</sup>Ttaka ni ttú ka benne se'e lenie ro'o mexaha, a ute dákanie beaka rabie na aníha. <sup>29</sup>Kumu de Judas-ni denna beduti to yu'u belhiu gekeha, laxkala ttu chupake rakakanie ganna raba Jesús-ni na: “Ugía gwayo'o nu ixuinri'i laní-ni” o ree na: “Begwe ka benne dii abittu geke tee latti belhiu.”

<sup>30</sup>Iki de chi beyaka uto Judas-ni yettaxtilaha, nianna tti biria ttebana diana. Chiba anka rela nuha la'ania.

**Jesús-ni rigixxi'abie deki Pedro-ni labí dhi ro'oni  
deki ankabienne**

*(Mt. 26:31-35; Mr. 14:27-31; Lc. 22:31-34)*

<sup>31</sup>Nianna iki de chi biria Judas-ni diana, nianna ra Jesús-ni:

—Neti benne daya yebáha nnanna chi ula'a nu xxeni ra lasia, lhe de neti nna ula'a nu xxeni ra le Tata Do Yebáha. <sup>32</sup>Ganna neti ule'a nu xxeni ra le Tata Do Yebáha, anágaba Tata Do Yebáha nna ule'egabe nu xxeni ra lasia nna chi tte duna ule'ebie nu xxeni ra lasia. <sup>33</sup>Xi'ini to kia, attu satti toruba gwadoa len lebi'i, nianna tti egilale neti. Nnanna upeya le nu chigaba xpeya ka nu loni ge ka benne Israel-ni: Ata eya'ayaha, lebi'i labí aka esiale niha. <sup>34</sup>Ttu tisa kubi rodha'anaa len lebi'i ki uinle nu rana, delába akin ge luesile. Lebi'i teeki akin ge luesile attiba neti rakati gele. <sup>35</sup>Ganna rakani ge luesile, la'ania nna iyába ka benne tte dákanie deki lebi'i chiba ankale benne rudhetinia.

<sup>36</sup>Simón Pedro-ni nna unnaba tisana Jesús-ni, rane:

—¿Gála tsialu xa tata?

Jesús-ni nna bekabie geni, ree:

—Ata eya'ayaha, lu labí aka etenalhalu neti nnanna, ttaka delola nna gwetabalu len neti.

<sup>37</sup>Pedro-ni nna rane:

—¿Beakala labí aka etanalhaa kwinalu nnanna xa tata?  
¡Neti chiba beria iki beria lasia gattia kwenta gelu!

<sup>38</sup>Jesús-ni nna bekabie geni, ree:

—¿Si gattilu kwenta kia? Netiru ria, lanila kwesi chinkaha, lu tsunna libela chi bedhea lelu abittu ridí ro'olu deki ankabienlu neti.

**Jesús-ni rabie: “Neti ankaa neda deyya ata do Tata Do Yebáha”**

**14** <sup>1</sup>Bittu udú xxattana le, gwaluxxen lele ge Tata Do Yebáha lhe gwaluxxengaba lele kia lhe. <sup>2</sup>Lhe'e lisi Tata kiahia ixé ka yo'o sia ata tse'e ka benne. Ganna ttixka abíba sia, la'ania nna abittula xpeya le ten tsea ata tse'ele. <sup>3</sup>Ganna chi eya'aya ten tsea ata tse'ele, la'ania nna dedáya attu libe nna echea le len neti kini ata dhoaha, niha-gaba tse'ele. <sup>4</sup>Lebi'i chiba ankabienle neda deyya ata eya'ayaha.

<sup>5</sup>Tomás-ni nna rane:

—Labí yutu gá eyyalu xa tata. Laxkala, ¿gasina uinbiatu nedaha?

<sup>6</sup>Jesús-ni nna bekabie, ree na:

—Netiba nuha ankaa nedaha lhe netiba nuha ankaa benne rigixxi'aya ge nu anka gwalí lhe ankaa benne runia ki satába raka ben ka benne lhe. Lanú nu aka geni tsiana ata do Tataha ganna abíba neti echea na. <sup>7</sup>Ganna ttixka lebi'i chi yule nuxa gwalíga ankaa, la'ania nna chigaba yule nuxa anka Tata kiahia nna nnannali chi ankabienle benneha lhe chi bilenlee lhe.

<sup>8</sup>Nianna tti unne Felipe-ni, rana:

—Tata Xisi to, bele'en ri'itu Tataha nna ukare'aba ilentue nna eyaka xen letu.

<sup>9</sup>Jesús-ni nna bekabie, ree:

—Ki isába chi reki lenia le xa Felipe, ¿si itua ttu nna a ruimbiale neti? Benne chi bilánie neti, chigaba bilen benneha Tataha. ¿Gasina nuha nna rálalu: “Bele'en ri'itu Tataha”? <sup>10</sup>¿Si lagwa gwa ria lelu deki neti ttúba benne ankaa len Tataha nna Tataha nna ttúba benne anke len neti? Ka tisa rinnea-ni nna labí nu anka kia ka nuní rinnea; sinuki nu anka ge Tataha benne doe lhe'e lastoa-niba nuní rinnea. Labe runie iyá nu runia-ni. <sup>11</sup>Gwaltsia lele deki neti ttúba benne ankaa len Tataha nna Tataha ttúba benne anke len neti. Ganna abíba ria lele kia, kwadi ge ka nu rilenle runia-ni gwaltsia lele. <sup>12</sup>Netiru ria, nu gweyya leni netiha gwingaba nuha ka nu runia-ni nna xxenirula anka ka nu uin nuha, kumu neti eya'abaa ata

do Tataha. <sup>13</sup>Lhe anágaba iyába nu innabale len Tataha tti udettile neti, neti nna gwinbaa nu innabaleha kini anáchu de neti benne ankaa Xi'inieha, de neti nna inná xxeni le Tataha. <sup>14</sup>Bixaba innabale ganna udettile neti, neti nna gwinbaa nu innabaleha.

### **Jesús-ni rabie deki idhelhe Espíritu ge Tata Do Yebáha**

<sup>15</sup>Ganna lebi'i rakinle kia, la'ania nna gudobale tisa ge nu runia mandadu. <sup>16</sup>Neti nna innabaa len Tataha ki idhelhe attu benne aka lenie le kini benneha nna dhoe lenle ttu dia lii, <sup>17</sup>delába idhelhe Espíritu benne kixxi'abie ge nu anka gwalí. Ka nu labí ria lekani, labí ulabikana Espírituha, kumu de labí chi bilákinne, nigaba a yúkana nuxa anke. Ttaka lebi'i chiba yule nuxa anka benneha kumu labie nuní doe len lebi'i lhe dhobie lhe'e lastole lhe.

<sup>18</sup>Labí odha'anaa le ttiba ttu bidabi, gwesiaba neti dhoa len lebi'i attu libe. <sup>19</sup>Ka benne abí ria leke kia, attu sattitoruba ilákanie neti, lengwa nna labíru edelákanie neti, ttaka lebi'i nna gwalábinle neti. Kumu neti anka benbaa, anágaba lebi'i gwaka bengabale. <sup>20</sup>Tti isia sá esiyaha, la'ania nna tte denle deki neti ankaa ttúba benne lenia Tata kiahá; lebi'i nna akale ttúba benne len neti, neti nna akaa ttúba benne len lebi'i. <sup>21</sup>Benne chi biyieninie nu runia mandadu nna rudoe tisa geni, benneha nuha gwalíganie rakanie kia nna benne rakanie kia nna gwakagabani Tata kiahá gebie. Anágaba neti akagabati gebie lhe ule'egabanie nu gwalíga ankaa lhe.

<sup>22</sup>Nianna tti ra Judas-ni (labí Judas nu rákana Iscariote) rane:

—Tata Xisi to, ¿beakala len ri'itu ule'elu nu ankalu nna a ule'elu nu ankalu-na len adíru ka benne?

<sup>23</sup>Jesús-ni nna bekabie geni, ree:

—Benne akanie kia, gudoba benneha tisa ge nu chi rigixxi'anie. Tata kiahá nna gwakagabanie ge benneha, la'ania nna ri'itu isiatu ki tse'etu lhe'e lastoe. <sup>24</sup>Nu abí rakinna kiahá, nuha labí rudona tisa ge nu rigixxi'ania na. Ka tisa chi riyieninle-ni nna labí nu anka kia ka nuní rinnea, sinuki ankaba ka nuní ge Tataha, benne udhelhe netiha.

<sup>25</sup>Iyá nuní rinnea rigixxi'ania le nnanna laka sadoa len lebi'i, <sup>26</sup>ttaka Espíritu benne ite ki aka lenie leha, benneha

idhelha Tataha bie kini innebie kwenta kia. Labie ule'enie le iyá tte lhe odhúbie lele iyá nu chi utixxi'ania le lhe.

<sup>27</sup>'Neti unia kini tse'ele xen su lasi. Elha xen lasi nu rutea len lebi'i labí anka nuná luesi nu rute ka benne se'e yiesi lo yu-ni. Bittu udúna le lhe nigaba a gasinle lhe. <sup>28</sup>Lebi'i chiba biyieninle ria: "Eya'abaa, delola nna gwedesiabaa len lebi'i." Ganna si gwalínle rakinle kia, la'ania nna gwedeakabinle de eya'aya ata do Tataha, kumu Tataha xxenirula ra le benneha tti neti. <sup>29</sup>Nnannali chi rigixxi'ania le nuní, kini ganna chi deya'ayaha, la'ania nna tsia lele kia.

<sup>30</sup>'Labíru isá innea len lebi'i, kumu chiba daa nu xxegwi rinnabiana yiesi lo yu-ni, neti niru latti labí dhaa nuha innabiana neti. <sup>31</sup>Ttaka aní teeki aka kini tte dani ka benne deki neti gwa rakabati ge Tataha, lhe gwa ruinbaa nu chi bedha'ane unia lhe.

'Nnanna nna gwaledú lii kini chi diari'i.

**Jesús-ni rabie: "Neti ankaa ttu ya uva nu gwalíga anka tse"**

**15** <sup>1</sup>'Neti nuní ankaa ya uva nu gwalíga anka tse. Tata kiaha nna anke benne rugwe lebie ya uvaha. <sup>2</sup>Iyába ka ná ya uvaha ka nu abittu runna nu xixxi, richúbe kana, ttaka iyába ka náni ka nu gwa rutekana nu xixxi, richúbe lokani lhe ruxíbe nu bisi gekani kini ute chiettirukana nu xixxi. <sup>3</sup>Ttiba ka ná ya uvaha chi biria nu bisi gekani, aníha-gaba nuná lebi'i, de ka tisa chi utixxi'ania leha, de ka nuha nna chiba beyarile. <sup>4</sup>Lebi'i, gwaltse'e len neti nna anágaba neti gwadúgabaa len lebi'i. Ttiba ka ná ya uvaha, ganna abíba yietikana lati yagaha, labí aka ute ka nuha nu xixxi, anágaba lebi'i, ganna abíba se'ele len neti, labí aka gele uinle nu anka tse.

<sup>5</sup>'Neti nuní ankaa ya uvaha, lebi'i nna ankale ka náya. Benne gwa du lenie netiha, neti nna gwa dúgabaa lenie nna ixeba nu tse unie, kumu ganna lebi'i abíba du lenle neti, labí aka gele bixa uinle. <sup>6</sup>Nu abíba du lenna neti, nuha iru'unabana. Satebana attiba ka ná yagaha; ka nuha rirúbakana nna ribisibakana, nianna tti ritupakana nna riakana lo giha.

<sup>7</sup>'Ganna lebi'i gwa se'ebale len neti lhe gwa ruinbale nu ra ka tisa kia-ni, la'ania nna gwalinnababa bixaba raka lele nna

gwadífale nu rinnabaleha. <sup>8</sup>Tata kiahá nuha inná xxeni lebie ganna lebi'i uinle ixé nu anka tse. Aníha nuha nna gwasinle akale benne gwalíga rudhetinia. <sup>9</sup>Attiba rakani Tataha kia, anágaba rakati gele. Laxkala gwaltse'e len neti bittu udhanle neti kini edí baale elha si'i lasi kia. <sup>10</sup>Ganna udole tisa ge nu odha'anaa uinle, la'ania nna gwedí baabale elha si'i lasi kia, attiba neti gwa redí baaba elha si'i lasi ge Tata kiahá kumu gwa rudobaa tisa ge nu bodha'ane unia.

<sup>11</sup>'Ria aní kini lebi'i edú itta lele len neti, aná nna itta suba edú lele. <sup>12</sup>Akani ge luesile attiba neti rakati gele. Nuní rodha'anaa uinle. <sup>13</sup>Benne gwa reria lebie gattie kwenta ge ka benne se'e tse lenie, benneha nuha gwa rakarunie ge ka benneha. <sup>14</sup>Lebi'i nuha ankale benne do tse lania ganna ttixka uinle nu ria. <sup>15</sup>Labíru kixxaa lále nu reni lo sina kia, kumu nu reni lo sinaha, labí yu nuha bixa ruin xxananiha. Neti chi teeti lále benne do tse lania kumu iyába nu chi ra Tata kiahá neti, chiba utixxi'ania le nuha. <sup>16</sup>Laa lebi'iga bekwele neti; netila bekwea le nna chi beka'anaa le ki tsiale uinle nu anka tse nna nu tse uinleha nna uchíana isá. Aníha kini iyába nu innabale len Tataha tti udettile neti, benneha nna gutebe nu innabaleha. <sup>17</sup>Akin ge luesile. Nuní rodha'anaa uinle.

**Jesús-ni rabie: “Ka nu labí ria lekani kia itisibakinna  
ka benne rudhetinia”**

<sup>18</sup>'Ganna ka nu abittu ria lekani neti ritisikinna le, gwaludhá lele ki netila bitisikinna lade'a tte. <sup>19</sup>Ganna lebi'i ankale ge ka nu abittu ria lekani neti, la'ania nna gwakalakinna gele attiba rakakinna ge ka benne gekani, ttaka lebi'i labí ankale gekani; neti chi bekwea le lagwi gekani, de nuha nna ritisikinna le. <sup>20</sup>Gwalodhú lele ge nu chi xpeya leha. Nu ren sina lo xxananiha labí xxenirula ra le nuha tti xxananiha. Ki neti chi udú nookana, anágaba lebi'i dhu noogabakana le, lhe gannala ttixka bedo nagakani kia, la'ania nna lebi'i gudogaba nagakani gele. <sup>21</sup>Iyá nuní udhakakana le de ria lele neti, kumu lakana labí ankabiakinna benne udhelhe netiha.

<sup>22</sup>'Ganna neti abíba bisiaya yiesi lo yu-ni lhe ganna abíba utixxi'ania kana ka tisa ge Tata Do Yebáha, la'ania nna abittula nujakana yua ge ka tulha ruinkana ganna ttixka.

Ttaka de chi utixxi'ania kana, de nuha nna labí tee ro'okani innákana: “Labí yutu ge ka tulha ruintu.” <sup>23</sup>Nu ritisinna netiha, ritisigabin nuha Tata kiahá. <sup>24</sup>Ganna ttixka neti abíba chi benia ka milagru lagwi gekani, ka milagru ka nu abittu chi ben nuxa attu benne, la'ania nna abittula nujakana yua ge ka tulha ruinkanaha ganna ttixka. Ttaka chiba bilákinna; laa kiga de chi bilákinna benia ka milagruha nna sa ritisibakinna neti lhe ritisigabakinna Tata kiahá lhe. <sup>25</sup>Ttaka teeki raka aní kini rado tisa ge nu ra lo bia bennabi gekaniha ata dia ra: “Labí bixa ge nna kwentaba bitisikinna neti.”<sup>n</sup>

<sup>26</sup>Ttaka neti nna idhelhaa benne aka lenie le, delába Espíritu benne rigixxi'abie ge nu anka gwalíga. Ata do benneha-li iria Espírituha dabie, nna kixxi'abie kia. <sup>27</sup>Anágaba lebi'i kixxi'agabale kia, kumu lebi'i attili sisi'a tte uduloa rule'enia ka benne, la'aniali chi se'ele len neti.

**16** <sup>1</sup>Rigixxi'ania le nuní kini abittu eyadi gaale nna a tsiaru lele kia. <sup>2</sup>Tse'e ka nu ebeakana le lhe'e ka yo'lo ata rudhetile ka tisa ge Tata Do Yebáha, labíru ugwelhakana le ga'ale niha. Axtala isia sáha ka nu uttikana leha akakinna deki gwa ruinakana nu ru'u le Tata Do Yebáha. <sup>3</sup>Aníha uinkana kumu de labí chi anka biakinna Tataha, lhe nigaba labí chi ankabiakinna neti lhe. <sup>4</sup>Rigixxi'ania le nuní kini ganna chi bisia sá satele aní, la'ania nna sadú lele deki chiba utixxi'ania le nuní.

**Jesús-ni rabie: “Espíritu ge Tata Do Yebáha ule'enie le iyá nu anka gwalí”**

'Labí utixxi'ania le nuní sisi'a tthea, kumu len lebi'iba doa. <sup>5</sup>Ttaka nnanna chi eya'aya ata do benne udhelhe netiha nna niba ttúle a rinnaba tisale neti, innále: “¿Gá eyyalu?” <sup>6</sup>Rutse'loona rudú si'ilana lele de rigixxi'ania le nuní. <sup>7</sup>Ttaka netiruria: tserula saríana le ganna eya'aya. Kumu ganna abíba eya'aya, Espíritu benne aka lenie leha labí isia benneha len lebi'i. Ttaka ganna eya'aya, la'ania nna neti idhelhe ki ite. <sup>8</sup>Tti isia benneha nna unie ki okinni iki ka benne deki ankabake benne ruin tulha lhe deki labí ruinke attiba ankaba geni lhe. Anágaba unie ki utte dáke deki ukinniba Tata Do Yebáha ke.

<sup>n</sup> 15:25 Salmo 35:19; 69:4



<sup>9</sup>Unie kini utte dáke deki ruinke tulha de labí ria leke kia  
<sup>10</sup>lhe unie kini utte dáke deki neti nuha ankaa benne runi nu dika ixú nna chiba eya'aya ata do Tataha nna labíru ilenle neti, <sup>11</sup>lhe anágaba unie kini utte dáke deki ibixxi iginniba ka nu ruín tulha-na, kumu nu xxegwi nu rinnabia yiesi lo yu-ni chiba berixxi bekinni Tataha nuha.

<sup>12</sup>Ixeru nu teti upeya le, ttaka nnanna labí dhaale tte denle iyá nu rigixxi'ania le. <sup>13</sup>Ttaka atti isia Espíritu benne kixxi'abie ge nu anka gwalíga, Espírituha ule'enie le iyá nu anka gwalí, kumu labí inne benneha nu anka gebie, sinuki innebe nu iyienibanie ra Tataha lhe kixxi'agabanie le iyá nu aka nu si daa lhe. <sup>14</sup>Benneha unie kini inná xxeni lasia, kumu udaxxu ni'e nu rule'a-ni nna kixxi'anie le. <sup>15</sup>Iyába nu anka ge Tataha, kígabaa anka nuha. De nuha nna xpeya le: “Espírituha udaxxu ni'abie nu rule'a-ni nna kixxi'anie le.”

**Jesús-ni rabie: “Lebi'i udú si'ina lele, ttaka delola nna edú itta lele”**

<sup>16</sup>Attu sattitoruba nna labíru ilenle neti. Iki de nuha nna attu sattitoruba nna chi edelenle neti.

<sup>17</sup>Ttu chupa ka benne rudhetinieha nna ra luesike:

—¿Bí dianie tti ree: “Attu sattitoruba nna labíru ilenle neti”; delo nna redenee: “Iki de nuha nna attu sattitoruba nna chi edelenle neti”? Lhe anágaba, ¿bí dianie tti ree: “Chiba eya'aya ata do Tataha”? <sup>18</sup>Lhe rágaba luesike, ¿bí dianie tti ree: “Attu sattitoruba”? Kwachiruba rite denri'i nu rinnee-na xa.

<sup>19</sup>Jesús-ni nna ute dábanie deki raka le ka benneha innaba tisake bie ge nu chi reeha, nianna tti rabie ke:

—¿Si rinnaba tisa luesile, rale: “Bí diani nu ria-ni tti ria: Attu sattitoruba nna labíru ilenle neti; iki de nuha nna attu sattitoruba nna chi edelenle neti”? <sup>20</sup>Netiru ria, lebi'i kwesibale lhe elenibinle ge nu satea, ttaka ka nu se'e yiesi lo yu-ni edeakalakinna. Lebi'i nna udú si'ilana lele, ttaka delola nna gwedú ittaba lele. <sup>21</sup>Ttiba nuila gali xi'inniha ruyúbana elha disa kumu chiba bisia ura gali nutoha, ttaka iki de chi uli nutoha, la'ania nna labíru radú leni ge elha disa biyúnaha, kumu si redeakalinna de chi bisia attu benne yiesi lo yu-ni. <sup>22</sup>Anágaba lebi'i du si'iba lele nnanna, ttaka neti gwetabaa

etelannia le, la'ania nna edú itta lele nna lanú nu dhaana kuana elha gwedeaka lasi geleha. <sup>23</sup>La sáha labíru bi innaba tisale neti. Netiru ria, iyába nu innabale len Tataha ganna udettile neti, benneha nna gutebe nu rinnabaleha. <sup>24</sup>Axta nnanna labí chi unnabale udettile neti. Gwalinnaba nna gwadíbale, kini anáchu nna itta suba edú lele.

<sup>25</sup>'Nnanna ttiba bixxi kwe'eba nuní rinne, ttaka isia sá labíru innea aní, sinuki lhixxa rába chi innea kixxi'ania le ge Tataha. <sup>26</sup>La sáha lebi'iba chi innabale len Tataha udettile neti, labíru neti teeki innabaa gele arlo benneha. <sup>27</sup>Kumu kwinaba Tataha rakanie gele. Rakanie gele kumu lebi'i chi rakinle kia lhe anágaba kumu chi ugía lele deki gwalí ata do Tataha-ba biriaya daya. <sup>28</sup>Ata do Tataha-ba biriaya daya nna bisiaya yiesi lo yu-ni, nnanna nna udha'anaa yiesi lo yu-ni nna eya'aya ata do Tataha.

<sup>29</sup>Ka benne rudhetinieha nna ráke bie:

—Nnannaligaba lhixxa rába chi rinnelu, labíru rinnelu bixxi kwe'e. <sup>30</sup>Nnanna chi rite dentu deki labí riyasinlu nuxa innaba tisana lu kumu iyába yulu. De nuha nna chi ria letu deki ata do Tata Do Yebáha-ba birialu dalu.

<sup>31</sup>Jesús-ni nna bekabie geke, ree:

—¿Si nnannaliba chi ria lele? <sup>32</sup>Ttaka chiba isia ura nuní, nnanna nuha chi bisia uraha, lebi'i nna gatti chadhibale kua ttu ttubale udaxxu neda gele. La'ania nna ttu túbibaa udúle, ttaka labí ttú neti dua; Tataha gwa duba benneha len neti. <sup>33</sup>Rigixxi'ania le nuní kini xen su lasiba tse'ele de du lenle neti. Yiesi lo yu-ni satebale uyúle elha disa, ttaka tsitsi gwalikweki lele, kumu neti chiba udaaya lo iyá nu satsa raka yiesi lo yu-ni.

**Jesús-ni rinnabe aka len Tata Do Yebáha ka benne rudhetinieha**

**17** <sup>1</sup>Iki de chi unne Jesús-ni nuha, nianna tti belhidha loe yebáha nna ree:

—Tata, chiba bisia ura nuní. Neti benne ankaa Xi'inlu, bele'e nu xxeni ra lasia, kini anágaba neti ule'a nu xxeni ra lelu, <sup>2</sup>kumu lu chi betelu lo neda kia kini innabiaya iyá ka benne, kini anáchu unia ki satíaba aka ben iyá ka benne chi betelu lasi náya. <sup>3</sup>Ganna ka benne chi benbiake lu deki ankalu gwalíga ttu túbiru Diosi lhe ganna chi benbiake neti

Jesucristu benne udhelhalu yiesi lo yu-ni, la'ania nna ka benneha satíaba aka benke arlolu. <sup>4</sup>Neti chiba bele'a nu xxeni ra lelu yiesi lo yu-ni, chiba uluxati sina nu bedha'anlu unia. <sup>5</sup>Nnanna nna xa Tata, ben kini neti eyakaa benne ra xxeni lasia arlolu, ben ki eyakaa atti tteba ankaa tti doa lenluha atti lanila kwe yiesi lo yu-niha.

<sup>6</sup>'Ka benne chi bekwelu lagwi ge ka benne se'e yiesi lo yu-ni nna betelu ke len neti, ka benne-ni chiba bele'enia ke nuxa ankalu. Gebalu ankake nna betelu ke len neti. Lake nna gwa rudobake tisa ge nu ralu. <sup>7</sup>Nnanna chiba yuke deki iyába nu betelu len neti, luba betelu nuha, <sup>8</sup>kumu ka tisa betelu len netiha chiba utixxi'ania ke ka nuha nna gwa belabibake ka tisaha. Nnanna nna chiba yuke deki gwalíba ata dolu-naba biriaya daya lhe chigaba ugía leke deki luba udhelhalu neti.

<sup>9</sup>'Ge ka benne-ni rinnabaa lenlu xa tata. Labí rinnabaa ge ka nu abittu ria lekani neti, sinuki rinnabaa ge ka benne betelu len neti, kumu gebalu ankake. <sup>10</sup>Iyába ka benne ankake kia, gegabalu anka ka benneha lhe iyába ka benne ankake gelu, kígabaa anka ka benneha. De ka benneha nna rule'e nu xxeni ra lasia.

<sup>11</sup>'Neti labíru dhoa yiesi lo yu-ni, ttaka lake tse'erubake. Neti nna esiabaa ata dolu-na xa Tata. Lu ankalu nari xú, labí tulha ruinlu. De nuha nna ka benne chi betelu len neti, biyú ke len nu ra tsitsi lelu-na kini anáchu akake ttúba benne attiba ri'i ankari'i ttúba benne. <sup>12</sup>Tti doa lenke yiesi lo yu-niha, gwa biyúbaa ke len nu ra tsitsi lelu. Ka benne betelu len netiha, gwa biyúbaa ke nna ni ttúke labí binittike, sun ttúba nu chi ga'anna inittiha, binittina. Aníha uka kini gwado tisa ge nu ra lo ka yetsi geluha.

<sup>13</sup>'Nnanna chiba esiaya ata dolu-na, ttaka laka sa doa yiesi lo yu-ni rigixxi'aya nuní kini lake nna itta suba dhu leke attiba neti itta suba du lasia. <sup>14</sup>Neti chiba utixxi'ania ke ka tisa gelu-ni, ttaka ka nu se'e yiesi lo yu-ni ritisilakinna ke kumu de labí ankake ge yiesi lo yu-ni, attigaba neti labí ankaa ge yiesi lo yu-ni. <sup>15</sup>Labí rinnabaa kwealu ke lagwi ge ka benne se'e yiesi lo yu-ni, sinuki odilálalu ke lo ná nu xxegwiha. <sup>16</sup>Lake labí ankake ge yiesi lo yu-ni, attigaba neti labí ankaa ge yiesi lo yu-ni. <sup>17</sup>Ka tisa gelu-ni ankake nu gwalí. Beni kini, tti iyienkanie ka tisa-ni nna iriesike akake gelu. <sup>18</sup>Attiba kwinalu

udhelhalu neti yiesi lo yu-ni, anágaba neti ridhelhaa ke yiesi lo yu-ni ki kixxi'ake ka tisa gelu. <sup>19</sup>De lake nna neti biriesia ki ixúá lo sina gelu, kini anágaba lake iriesigabake ki ixúke lo sina gelu de ria leke ge nu anka gwalí.

<sup>20</sup>Labí sun ge ka benne-ni rinnabaa len kwina lu. Anágaba rinnabagabaa ge ka nu tsia lekani kia tti iyienkinna ka tisa kixxi'a ka benne-ni, <sup>21</sup>kini anáchu nna iyába ka nu tsia lekani kia ttisidiba ttúba benne eyakakana, attiba lu xa Tata, ttúba benne ankalu len neti, neti nna ttúba benne ankaa lenlu. Anágaba ka nu tsia lekaniha, ttúba benne eyakakana len ri'i, kini anáchu adí ka nu a ria lekani nna tsia lekani deki luba udhelhalu neti. <sup>22</sup>Neti chiba benia kini inná xxeni le ka nu tsia lekani kia attiba lu chi benlu ki uná xxeni lasia, kini akakana ttúba benne attiba lu len neti ttúba benne ankari'i. <sup>23</sup>Lu dulu len neti; neti nna dhua lenkana, kini lakana nna gwalíga isinkana eyakakana attisidiba ttúba benne, kini anáchu adíru ka benne se'e yiesi lo yu-ni tte dákane deki luba udhelhalu neti lhe gwa rakabinlu ge ka nu tsia lekani kia attiba rakabinlu kia.

<sup>24</sup>'Ka nu chi betelu len neti xa Tata, raka lasia ata dhoaha, niha-gaba tse'ekana, ki ilákinna nu xxeni ra lasia nu chi betelu len neti, kumu lu rakinlu kia attili lani kwe yiesi lo yu-niha. <sup>25</sup>Tata, lu ankalu benne runi attiba ankaba geni. Ka nu se'e yiesi lo yu-ni labí chi ankabiakinnu lu, ttaka neti chiba ankabiati lu. Ka nu chi betelu len neti chiba yúkana deki luba udhelhalu neti. <sup>26</sup>Chiba utixxi'ania kana nuxa ankalu, anába sa kixxi'ania kana, kini anáchu attiba rakinlu kia, anágaba lakana akin ge luesikani. Neti nna dhoa lhe'e lastokani.

### Bedaxxukana Jesús-ni kini uttikane

(Mt. 26:47-56; Mr. 14:43-50; Lc. 22:47-53)

**18** <sup>1</sup>Iki de chi unne Jesús-ni iyá nuha, nianna tti biriabie dia lenie ka benne rudhetinieha uteke attu ladu ge yoo bisi nu tee lání Cedrón. Niha tee ttu yu daa ka ya olívu loni. Lhe'e yu ata daa ka yagaha uta'a lenie ka benne rudhetinieha. <sup>2</sup>Judas nu utena Jesús-ni lasi ná ka nu uttikaneha chigaba ankabienna niha, kumu ixé lidúba chi ugía Jesús-ni len ka benne rudhetinieha lhe'e yuha. <sup>3</sup>Aníha uka nna bisin len Judas-ni ka soldadu lhe ka nu rise'e gweyú ro'o



(San Juan 18:1-11)

yotuha lhe. Ka nuha udhelha ka nu loni ge ka bixxudiha kana lhe udhelha ka fariseo-ni kana. Diakana denkana espada lhe yaga lhe dengabakana ka lámpara lhe ya nalha gi lhe. <sup>4</sup>Ttaka kumu Jesús-ni chiba yubie iyá nu satebie, nianna biriabie gwatsee kana nna ree:

—¿Nú regilale?

<sup>5</sup>Lakana nna bekabikana, rákana:

—Jesús ge Nazaret-niba regilatu xa.

Jesús-ni nna ree kana:

—Netiba nuní regilale.

(Judas nu utene lasi ná ka nu uttikaneha, niha-gaba dana len ka nuha.) <sup>6</sup>Tti ra Jesús-ni kana: “Netiba nuní”, nianna tti beyadi gaakana nna ubixxi lokana lo yu. <sup>7</sup>Nianna tti bedennaba tise kana attu libe, ree:

—¿Nú regilale?

Lakana nna redenákana:

—Jesús ge Nazaret-niba xa.

<sup>8</sup>Jesús-ni nna bedekabie gekani, ree:

—Ki chiba ria le: “Netiba nuní.” Ganna neti regilale, gwalugwelhaxa ka nu rudhetinia-ni eyyakana.

<sup>9</sup>Aníha uka kini gwado tisa ge nu chi unnebie, tti ree: “Tata, ka benne chi betelu len neti, ni ttú ka benneha labí bennittia.” <sup>10</sup>Nianna tti ulea Simón Pedro-ni espada dennaha nna uchúna naga ben ge Malco-ni. Malco-ni ribenna lo sina ge nu anka bixxudi xeniha. <sup>11</sup>Jesús-ni nna rabie Pedro-ni:  
—Boga'a espada gelu-na lhe'e xoni. Neti, ¿katte si abí gwa dhielhaa uyúa elha disa nu ute Tata kiaha?

**Jesús-ni biso due arlo Anás-ni**

(Mt. 26:57-58; Mr. 14:53-54; Lc. 22:54)

<sup>12</sup>Ka soldaduha lhe nu loni gekaniha lhe ka nu rise'e gweyú ro'o yotuha lhe, ka nuha bedaxxukana Jesús-ni nna bexxigakane. <sup>13</sup>Nianna tti dechekane lade'a tte arlo Anás-ni, kumu lana ankana xxudi nuila ge Caifás. Caifás-ni nuha anka bixxudi xeni lhe'e idaha. <sup>14</sup>Caifás-ni nuha rana ka nu loni ge ka nu Israel-ni: “Tserula saríana ri'i ganna sun ttúba benne gattie kwenta ge iyá ka benne.”

**Pedro-ni labí ridí ro'oni deki ankabienna Jesús-ni**

(Mt. 26:69-70; Mr. 14:66-68; Lc. 22:55-57)

<sup>15</sup>Simón Pedro-ni lhe attu ka benne rudhetinieha lhe danalhabake Jesús-ni. Kumu ttu benneha, de ankabianie bixxudi xeniha, de nuha nna uta'abe len Jesús-ni lali'a yo'o ge bixxudiha. <sup>16</sup>Ttaka Pedro-ni nna beya'anbana ro'o yo'oha, labí uta'ana. Benne ankabianie bixxudi xeniha nna beriabie nna unne lenie nuila nu ruyúna ro'o yo'oha, kini begwelha nuha uta'a Pedro-ni. <sup>17</sup>Nuilaha nna unnaba tisana Pedro-ni, rana na:

—¿Laaba lu ankgabalu ttu ka nu rudhetini nubiyú-na?

Lana nna bekabina, rana:

—¡Ko'o! Labí.

<sup>18</sup>Ka nu riben sina ge bixxudi xeniha lhe ka nu rise'e gweyú ro'o yotuha lhe, ka nuha bebekikana gi nna se'ekana gwetsa'a ro'o giha kumu yalhá idilha raka. Niha-gaba du Pedro-ni len ka nuha gwetsa'a ro'o giha.

**Anás-ni unnaba tisana Jesús-ni**

(Mt. 26:59-66; Mr. 14:55-64; Lc. 22:66-71)

<sup>19</sup>Bixxudi xeniha nna unnaba tisana Jesús-ni ge ka benne rudhetinieha lhe ge ka tisa rekie rule'enie ka benne lhe.

<sup>20</sup>Jesús-ni nna bekabie geni, ree na:

—Neti la looba rinnea arlo ka benne. Satíaba udúa rule'enia ka benne lhe'e yotuha lhe lhe'e ka yo'o ata ritupa iyári'i ka benne Israel rudhetiri'i ka tisa ge Tata Do Yebáha. Labí bixa unnea gatsi. <sup>21</sup> ¿Beaka netila rinnaba tialu? Unnaba tisa ka nu chi biyienkinna ge nu rinnea-ni. Ka nuná gwa yúkana bixa chi ria.

<sup>22</sup>Tti ra Jesús-ni aníha, ttu ka nu rise'e gweyú ro'o yotuha, nuha duna gaxxaba ata dueha nna uleana gi ro'e nna rane:

—¿Si aná dika ekabilu ge benne anke bixxudi xeni-na?

<sup>23</sup>Jesús-ni nna bekabie geni, ree:

—Ganna abíba unne tsea, utixxi'achu biunna a unne tsea. Ganna gwa unne tsebaa nna, ¿beakala bedhenlalu neti?

<sup>24</sup>Nianna aníha-ba xika Jesús-ni udhelha Anás-nie arlo Caifás nu anka bixxudi xeniha.

**Pedro-ni berupa libe-la a ridí ro'oni deki ankabienna Jesús-ni**  
(Mt. 26:71-75; Mr. 14:69-72; Lc. 22:58-62)

<sup>25</sup>Pedro-ni nna niha-ba sa duna ro'o giha rutsa'ana, nianna tti ra ka nu se'e niha na:

—¿Laaba luba nuha ttu ka nu danalhalu nubiyú-na?

Lana nna labí uxí ro'oni, rálana:

—¡Ko'o! Laa netiga nuha.

<sup>26</sup>Ttu ka nu riben sina ge bixxudi xeniha, delába ttu nu datiana nu uchú Pedro-ni naganíha, nuha rana na:

—¿Laaba ata daa ka ya olivuha-ba biláti lu, du lenlu nubiyú-na?

<sup>27</sup>Pedro-ni nna labí bededí ro'oni attu libe. Looraha tteba nna uresi chinkaha.

**Jesús-ni biso due arlo Pilato-ni**  
(Mt. 27:1-2, 11-14; Mr. 15:1-5; Lc. 23:1-5)

<sup>28</sup>Chebakana Jesús-ni udá lenkane lhe'e lisi Caifás-ni nna bisin lenkane lhe'e guskadu ata do nu rinnabia ge Roma-ni. Ttaka kumu chiba daa tsani nuha, laxkala ka nu lo ge ka benne Israel-ni labí uta'akana lhe'e guskaduha kini ka itsigakana arlo Tata Do Yebáha ganna ga'akana ata se'e ka nu labí anakana benne Israel. Kumu ganna itsigakana, la'ania nna labíru aka gokana irse nu tekinna láni irse ge laní Pascua.

<sup>29</sup>Nianna tti biria Pilato-ni ata se'ekanaha nna rana kana:

—¿Bí ge nuní rusiale iki nubiyú-ni?

<sup>30</sup>Lakana nna bekabikana geni, rákana na:

—Gannala ttixka abittuba ankana ttu nu ruin satsa, la'ania nna abittula bisia lentu na arlolu ganna ttixka.

<sup>31</sup>Pilato-ni nna rana kana:

—Lebi'iba gwaleche na nna gwaluinba elhuxtisi geni attiba ra lo bia bennabi gele-na.

Ka nu loni ge ka benne Israel-ni nna rákana:

—Ri'itu labí ga'anna uttitu ttu benne.

<sup>32</sup>Aníha uka kini gwado tisa ge nu unne Jesús-ni tti utixxi'abie gaxasina gattie. <sup>33</sup>Nianna tti bedeta'a Pilato-ni attu libe lhe'e guskaduha nna uxina Jesús-ni nna rane:

—¿Si lu ankalu nu rinnabia ge ka benne Israel-ni?

<sup>34</sup>Jesús-ni nna bekabie geni ree:

—¿Si nu anka gelu nuná ralu aná ak? O, ¿nu subiba utixxi'enna lu kia ak?

<sup>35</sup>Pilato-ni nna bekabina gee, rana:

—Ki gwa yúbalu laa benne Israel-ga neti nna ralu aná.

Ka benne lhe'esi gelu-naba lhe ka nu loni ge ka bixxudi-naba betega'akana lu lasi náya. ¿Bí benlu?

<sup>36</sup>Jesús-ni nna bekabie ree:

—Yiesi lo yu-ni labí ankana ata innabiaya. Gannala ttixka innabiaya yiesi lo yu-ni, la'ania nna ka benne danalhake netiha gwa bitilhalake kini abittu bedaxxu ka nu Israel-ni neti, ttaka labí yiesi lo yu-ni innabiaya.

<sup>37</sup>Nianna ra Pilato-nie:

—Nianna, ¿si lu ankalu nu rinnabia?

Jesús-ni nna bekabie, ree:

—Luba ra deki neti ankaa nu rinnabia xa. Neti ki de nuha-la ulia lhe de nuha-la daya yiesi lo yu-ni kini kixxi'aya ge nu anka gwalí. Iyába ka nu gwa ria lekani ge nu anka gwalí, gwa rudoba nagakani ge nu rinnea.

<sup>38</sup>Pilato-ni nna rane:

—¿Bí nuha nu anka gwalí?

**Beda'aba ro'okani uttikana Jesús-ni**  
(Mt. 27:15-31; Mr. 15:6-20; Lc. 23:13-25)

Nuha-ba ra Pilato-ni nna tti bederiana attu libe ata se'e ka nu Israel-ni nna rana kana:



—Labí raxxakaa bixa tulha ben nuní. <sup>39</sup>Ttaka kumu lebi'i chi labinle kua risiaba laní Pascua teeki odiláya ttu nu tee lisiyya, nnanna gwalinná: ¿si gwa raka lele odiláya nu anka nu rinnabia gele-ni?

<sup>40</sup>Ttaka iyábakana bedebesi'akana attu libe, rákana:  
—¡Ko'o! ¡Labí olhálu nuná! ¡Barrabás-nala bolhá!  
Barrabás-ni ukana ttu nu runi ubana.

**19** <sup>1</sup>Nianna ben Pilato-ni mandadu bedaxxukana Jesús-ni ki bekulhakane. <sup>2</sup>Ka soldaduha nna benkana ttu corona yetsi nna ulu'ukana nuha ikie lhe begukukane ttu lari xiná chulha, <sup>3</sup>nianna tti ribigakana arloe nna rákane:

—¡Xxeni ra lelu xa nu rinnabia ge ka nu Israel!

Nianna ribeakana gi ro'e, <sup>4</sup>nianna tti bederia Pilato-ni attu libe, rana ka nu Israel-ni:

—Gwaluyúrugá. Nena chi kweaya-ni kini uyú lole deki neti labí raxxakaa bixa tulha benna.

<sup>5</sup>Tti biria Jesús-ni nna chi yu'u ikie corona yetsiha lhe chi nukue lari xináha lhe. Nianna ra Pilato-ni kana:

—Ne nubiyúha du nii.

<sup>6</sup>Ka nu loni ge ka bixxudiha lhe ka nu rise'e gweyú ro'o yotuha lhe, tti bilákinna Jesús-ni, nianna tti unnekana idisa rákana:

—¡Betá nuná lo ya kurusi! ¡Betá nuná lo ya kurusi!

Pilato-ni nna bekabina gekani, rana kana:

—Lebi'iba gwaleche na nna gwalutá na lo ya kurusi, kumu neti labí raxxakaa bixa tulha ben nuní.

<sup>7</sup>Ka nu Israel-ni nna bekabikana geni, rákana:

—Ri'itu tee ttu bia bennabi getu ata gwa rugwelhabana deki gattiba nuná kumu de rana ankana Xi'in Tata Do Yebáha.

<sup>8</sup>Tti biyienini Pilato-ni nu ra ka nuha, nianna adíla usi chiettiruinna, <sup>9</sup>nianna tti bedeta'ana lhe'e guskaduha nna redeana Jesús-ni:

—¿Gá benne lu?

Jesús-ni nna labí bekabie geni. <sup>10</sup>Nianna rane:

—Neti rinnea nna abígaba rekabilu kia. ¿Si bi gwa yulu deki neti gwa tee lo neda kia odiláya lu o utáya lu lo ya kurusi lhe?

<sup>11</sup>Jesús-ni nna bekabie geni ree:

—Labí aka gelu innabialu neti ganna abíba bete Tata Do Yebáha lo neda lenlu kini inná xxeni lelu. Laxkala nu betena neti lasi nálu, adírula tulha xxeni daa nuha tti lu.

<sup>12</sup>Debá la'ania ruin Pilato-ni odilána Jesús-ni, ttaka ka nu Israel-ni ribesi'abakana, rákana:

—Ganna odilálu nuná, la'ania nna labí gwálí do tse lenlu César benne rinnabia xeniha, kumu iyába ka nu uinkana deki xxenirula ra lekani tti César-ni, tti uinkana aníha, rig'u'uba ni'akani benneha.

<sup>13</sup>Tti biyienin Pilato-ni nu ra ka nuha, nianna uleana Jesús-ni nna lana nna bedona lo xxila ata ridona ruinna elhuxtisiha. Ata ridonaha, len tisa hebreo tee lání Gabata. (“Gabata” dienna innána Ata Yu'u Ka Íyya.) <sup>14</sup>La sáha nuha chi rese'e tse ka nu Israel-ni kini attu sáha nna chi ga'akana laní Pascua. Ttiba retin tsi'inu (12) nuha nna ra Pilato-ni ka nu Israel-ni:

—¡Ne nu rinnabia geleha du nii!

<sup>15</sup>Ttaka lakana nna uresi'alakana, rákana:

—¡Ttu tsa utua nuná! ¡Betá nuná lo ya kurusi!

Pilato-ni nna bekabina, rana kana:

—¿Si utáya nu rinnabia gele-ni lo ya kurusi?

Ka nu loni ge ka bixxudiha nna bekabikana geni, rákana:

—Ri'itu lanúru attu nu rinnabia ge ri'itu do, sunruba César-ni dointu.

<sup>16</sup>Aníha uka nna bote Pilato-nie lasi nákani kini utákane lo ya kurusi. Lakana nna dechekana Jesús-ni.

### Jesús-ni betákane lo ya kurusi

(Mt. 27:32-44; Mr. 15:21-32; Lc. 23:26-43)

<sup>17</sup>Jesús-ni nna nuje kurusi geeha birie die ttu latti ata tee lání Gólgota len tisa hebreo. (“Gólgota” dienna innána bega iki nu yatti.) <sup>18</sup>Niha betákane lo ya kurusiha. Betágabakana a chupa ka nubiyú lo ka ya kurusi, ttu tukana utákana daka lhitte, labie nna betákane lagwi ge ka nuha. <sup>19</sup>Pilato-ni benna



(San Juan 19:17)

lo ttu breta betákana lo ya kurusiha daka xaliekie. Lo bretaha dia ra: “Jesús ge Nazaret, nu rinnabia ge ka benne Israel.” <sup>20</sup>Ixe ka nu Israel-ni belabakana nu dia lo bretaha, kumu ata betákana Jesús-ni lo ya kurusiha gaxxaba re nuha ro'o yiesiha lhe kumu ka letraha anakana len tisa hebreo lhe latín lhe griegu lhe. <sup>21</sup>Laxkala ka nu loni ge ka bixxudi ge ka nu Israel-ni, rákana Pilato-ni:

—Bittuba a bedelhalu lo breta-na: “Nu rinnabia ge ka benne Israel.” A bedelhabalu loni: “Nu rana: Neti ankaa nu rinnabia ge ka benne Israel.”

<sup>22</sup>Ttaka Pilato-ni nna rana kana:

—Neti nu chiga benia, benia.

<sup>23</sup>Iki de chi betá ka soldaduha Jesús-ni lo ya kurusiha, nianna tti bedaxxukana ka xoeha nna benkana ka nuha ttapa lha'a. Ttu ttu lha'a ka nuha ulha ttu ka soldaduha. Bedaxxugabakana lari nu nukue lo liaha, ttaka kumu labí tiyya nuha, suna ttu lhaaba anka itú nuha, <sup>24</sup>de nuha nna ka soldaduha ra luesikani:

—Labí itsúri'i nuní. Suertiba udelhari'i geni, kini nuxari'i eya'an lenri'i lari-ni.

Aníha uka kini gwado tisa ge nu dia lo ka yetsi ge Tata Do Yebáha ata ra: “Belha'abakana ka xoaha lhe bedelhabakana suerti gekani lhe.”<sup>o</sup> Aníha-ba ben ka soldaduha.

<sup>25</sup>Gaxxaba ata taa Jesús-ni lo ya kurusiha du nan geeha lhe xila nan geeha lhe María nuila ge Cleofas-ni lhe María Magdalena-ni lhe. <sup>26</sup>Tti bilani Jesús-ni nan geeha due niha, kwe'e benneha nna dúgaba ttu ka benne rudhetinieha, delába benne rakarunie geeha, nianna tti ree nan geeha:

—Nana, ne xi'inluha du naa.

<sup>27</sup>Nianna tti redeabie benne rudhetinieha:

—Ne nan gelu du naa.

Debá la'ania nna deche benne rudhetinieha nan ge Jesús-ni lisieha.

**Jesús-ni uxíbie elhutti lo ya kurusiha**  
(Mt. 27:45-56; Mr. 15:33-41; Lc. 23:44-49)

<sup>28</sup>Iki de nuha nna kumu chiba yu Jesús-ni deki iyába nu chi ga'anna akaha, chiba benie nuha, de nuha nna kini sado tisa ge nu ra lo ka yetsi ge Tata Do Yebáha, nianna ree:

<sup>o</sup> 19:24 Salmo 22:18

—Rebisia inda.

<sup>29</sup>Niha du ttu kanti ta'a vinu idí lhe'eni. Bedokana ttu xunu lo ttu iyyaxtila<sup>p</sup>, nianna begi'akana xunuha vinuha nna tti besigakana nuha ro'e. <sup>30</sup>Tti chi u'uye vinu idíha, nianna ree:

—Chi uluxa iyá nu chi ga'anna unia.

Nianna tti bodetta ikie nna bechú lebie.

<sup>31</sup>Kumu chi galá bisia sá tti rese'e tse ka nu Israel-ni kini attu sáha-ba nuha chi ga'akana laní Pascua, de nuha nna ka nu loni gekaniha labí raka lekani eya'an ka benne yattiha lo ka ya kurusiha la sá reyaka lekaniha kumu la sáha anka sá laní xxeniru. Aníha uka nna ugiákana unnabakana len Pilato-ni kini kinkana yaga lhe'e ni'a ka benneha kini ila'a lhe'e ka sitta ni'akeha nna echidakana ke lo ka ya kurusiha. <sup>32</sup>Ka soldaduha nna ugiákana ulha'akana lhe'e ka sitta ni'a ttu ka nu taa len Jesús-ni lo ka ya kurusiha, nianna tti bedeyekikana bedelha'akana lhe'e ka sitta ni'a attu nuha. <sup>33</sup>Ttaka tti ubigakana ata taa Jesús-ni nna bilákinna chiba utti benneha. De nuha nna labíru ulha'akana lhe'e ka ni'eha. <sup>34</sup>Ttaka ttu ka soldaduha nna bega'ana iyya tutsa dennaha lhitte, nianna biria tteba reni lhe inda lhe. <sup>35</sup>Benne rigixxi'abie nuní anke benne bilánie nu ukaha nna rigixxi'abe nu ankaba gwalí. Benneha yube deki nu gwalíba anka nu rinneeha kini anágaba lebi'i tsia lele ge nu rigixxi'eha. <sup>36</sup>Kumu aníha uka ki gwado tisa ge nu ra lo ka yetsi ge Tata Do Yebáha ata dia ra: “Ni ttú sitta lati benneha labí ilha'akana.”<sup>q</sup> <sup>37</sup>Rágaba attu lisia lo ka yetsi ge Tata Do Yebáha: “Tse'ebakana ugiákana benne utitikana lhitteha.”<sup>r</sup>

### Jesús-ni bekatsike bie

(Mt. 27:57-61; Mr. 15:42-47; Lc. 23:50-56)

<sup>38</sup>Iki de nuha nna José benne lhe'esi Arimatea ugié gwannabe len Pilato-ni kini ugwelhane elhide Jesús-ni lo ya kurusiha kini ukatsie benneha. José-ni uke ttu ka benne bedhetini Jesús-ni, meskiba labí bele'e looe deki uke ttu ka

<sup>p</sup> 19:29 Lo yetsi-ni ata dia ra: “Bedokana xunu lo ttu iyyaxtila”, lo adí ka yetsi nna ra: “Bedokana xunu lo ttu yaga tee lání hisopo.”

<sup>q</sup> 19:36 Éxodo 12:46; Números 9:12; Salmo 34:20

<sup>r</sup> 19:37 Zacarías 12:10

nu bedhetini benneha kumu de rasinie ge ka nu loni ge ka nu Israel-ni. Pilato-ni nna gwa begwelhabana José-ni kini dechebie benne yattiha. <sup>39</sup>Anágaba Nicodemo-ni, delába benne ugíe ttu lo rela gwanne lenie Jesús-ni, bisingaba benneha denie ttiba rerua (30) kilu seti nu rure ixixxi. <sup>40</sup>Laxkala José-ni lhe Nicodemo-ni lhe bottesike Jesús-ni lhe'e ttu lari nu chi ulu'u taake seti nu rure ixixxiha. Benbake attiba chi labini ka benne Israel-ni ruinke tti rukatsike ka benne yatti geke. <sup>41</sup>Ata betákana Jesús-ni lo ya kurusiha, niha tee ttu yu yadakinna ka ya xixxi loni. Lhe'e yuha do ttu baa kubi, ttu baa lanú nu chi bigatsi lhe'eni. <sup>42</sup>Niha-ruba bekatsikana Jesús-ni, kumu de chi ga'a sá tti reyaka le ka benne Israel-ni lhe kumu yieru baaha-ruba nuha do gaxxa ata uttieha.

### Jesús-ni beyaka benbie lo elhuttiha

(Mt. 28:1-10; Mr. 16:1-8; Lc. 24:1-12)

**20** <sup>1</sup>La sá tti bedú ni'a xumanuha, delába duminku, dila tteba gwankaru chulha ugía María Magdalena-ni gwalannina lo baaha. Tti bilenna chi bitua íyya yaya ro'o yieru baaha, <sup>2</sup>nianna ruxunnibana beyekina besinna ata do Simón Pedro-ni lhe attu ka benne bedhetini Jesús-ni, delába benne ukarunie geha, nianna tti utixxi'enna ka benneha, rana ke:

—Chiba bebeakana Tata Xisiha lhe'e yieru baaha nna labí yutu gá g wattixxakane.

<sup>3</sup>Pedro-ni lhe attu benneha nna bexunni ttebake diake ata do yieru baaha. <sup>4</sup>Tu tulapaba diake ruxunnike, ttaka attu benneha nna unerube lo Pedro-ni, laxkala benneha bisine lade'a tte ro'o yieru baaha. <sup>5</sup>Tti bisine ro'o yieru baaha nna biyette beká loe lhi'u, niha-ba bilánie ka lari bitesi benneha, ttaka labí uta'abie lhi'u. <sup>6</sup>Tti chi bisin Simón Pedro-ni nna uta'a ttebe lhe'e yieru baaha nna bilánie ka lari bitesi benneha se'ekana niha. <sup>7</sup>Lari nu bitesi iki Jesús-ni nna labí re nuha ata se'e adí ka lariha, ta subila tesi nuha rena. <sup>8</sup>Nianna tti uta'agaba benne bisin lade'a tte ro'o yieru baaha. Tti ute'eha nna bilánie iyá nu chi ukaha, nianna tti ugía lebie. <sup>9</sup>Kumu lake labí chi ute dákane nu dia lo ka yetsi ge Tata Do Yebáha ata ra deki teeki eyadha ben benneha lagwi ge ka benne

chi uttiha. <sup>10</sup>Nianna tti beyekike besinke lhe'e yo'o ata reya'ankeha.

**Jesús-ni bele'e lobie len María Magdalena-ni**

*(Mr. 16:9-11)*

<sup>11</sup>María-ni nna sa dube ro'o yieru baaha ribesie. Laka due ribesie nna biyette beká loe lhe'e yieru baaha. <sup>12</sup>Nianna bilánie chupa ka anjeli ge Tata Do Yebáha se'eke ata utta Jesús-ni, nukuke xo sitsi. Ttúbie re daka ata utta ikieha nna attubie re daka ata use'e ka ni'eha. <sup>13</sup>Nianna tti belisake María-ni, ráke bie:

—¿Beaka ribesilu xa nuila?

Lee nna ree ka benneha:

—Ribesia kumu bebeabakana Tata Xisi to kia nna labí yua gá gwattixxakane.

<sup>14</sup>Nuha-ba ree nna tti bodeki loe daka kwe'ebie, nianna bilánie Jesús-ni due niha, ttaka labí yue deki Jesús-niba nuha.

<sup>15</sup>Jesús-ni nna ree bie:

—¿Beaka ribesilu xa nuila? ¿Nú regilalu?

María-ni nna ukanie ganna nu ruyúna lo yu ata yada ka ya xixxiha-ba nuha. De nuha nna ree nuha:

—Ganna luba dechelu benneha xa tata, utixxi'a gá gwattixxalue kini echea bie.

<sup>16</sup>Jesús-ni nna ree:

—María.

María-ni nna bodeki loe unnebie tisa arameo, ree:

—¡Raboni! (“Raboni” dienna innána maestru.)

<sup>17</sup>Jesús-ni nna rabie María-ni:

—Bittu udaxxulu neti kumu labí chi beyapia ata do Tata kiahá. Beyyala nna usi ka betsi to kiahá, delába ka benne bedhetiniaha, usi ke: “Chiba eya'aya ata do Tata kiahá, benne anka gabe Tata geleha. Benneha anke Diosi kia nna anka gabe Diosi gele.”

<sup>18</sup>Nianna tti deyya María Magdalena-ni kini kixxi'anie ka benne bedhetini Tata Xisiha deki chi bilánie benneha lhe utixxi'agabanie ka benneha iyá nu ra Tata Xisiha bie lhe.

**Jesús-ni bele'e lobie len ka benne rudhetinieha**

*(Mt. 28:16-20; Mr. 16:14-18; Lc. 24:36-49)*

<sup>19</sup>Tti chi ulha sá bedú ni'a xumanuha, ka benne rudhetini Jesús-ni yayabakanie yo'o ata tupakeha de rasikanie ge ka nu

loni ge ka nu Israel-ni. Nianna tti uka xxe Jesús-ni nna udúbie lagwi geke nna rabie ke:

—¡Bittu gasinle! ¡Xen su lasi gwaltse'e!

<sup>20</sup>Nuha-ba ree nna tti bele'enie ke ka neeha lhe bele'enie ke lhitteha lhe. Ka benne rudhetinieha nna ittaba bedú leke tti bilákanie Tata Xisiha. <sup>21</sup>Nianna tti redea Jesús-ni ke attu libe:

—¡Xen su lasi gwaltse'e! Kumu anába attiba udhelha Tataha neti, anágaba neti idhelhaa le kini kixxi'ale ka tisa kia-ni.

<sup>22</sup>Nuha-ba rabie nna tti belubie ikike nna rabie ke:

—Gwalidhí Espíritu ge Tata Do Yebáha. <sup>23</sup>Ka benne dhile elha xen lasi ge ka tulha ruinke, gwadígaba Tata Do Yebáha elha xen lasi ge ka benneha nna ka benne abittu dhile elha xen lasi geke, anágaba Tata Do Yebáha labígaba dhibie elha xen lasi ge ka benneha.

### Jesús-ni bodole'e lobie len Tomás-ni

<sup>24</sup>Ttu ka benne tsi'inu (12) rudhetini Jesús-ni, benne tee lábie Tomás, benne rágabake Kwachi, benneha lanúbie tee tti bele'e lo Jesús-ni len adí ka benneha. <sup>25</sup>Delola nna adí ka benneha utixxi'akanie Tomás-ni, ráke bie:

—Chi bilentu Tata Xisiha.

Ttaka Tomás-ni nna bekabie geke, ree:

—Ganna abíba iláti ka lasi nábie ata biyada ka clavuha lhe ganna abíba uga'a xubenáya ata biyada ka nuha lhe anágaba ganna abíba uga'a xubenáya lhe'e yieru do lhitteha, la'ania nna labí tsia lasia gele.

<sup>26</sup>Xxunu (8) ubisa chi ute tti uka nuha, nianna dedetupa ka benne rudhetini Jesús-ni lhe'e yo'oha. La'ania nna gwa duba Tomás-ni lenke. Dedeyabakanie yo'oha, ttaka Jesús-ni uka xxebie nna udúbie lagwi geke nna begwebie ke padiuxi nna ree ke:

—¡Xen su lasi gwaltse'e!

<sup>27</sup>Nianna tti rabie Tomás-ni:

—Belanni ka lasi náya-ni lhe kwittaa-ni lhe. Belhí nálu nna bega'a xubenálu lo ka gwe kia-ni nna ugá lelu, bittu akalu nu a ria leni.

<sup>28</sup>Tomás-ni nna bekabie ge Jesús-ni, ree bie:

—Lu baninlu neti lhe ankalu Diosi kia lhe.



(San Juan 20:24-31)

**29** Jesús-ni nna ree Tomás-ni:

—Ria lelu kumu de chi bilenlu neti, ttaka karubáru ka benne bittu chi bilákanie neti nna gwa riaba leke.

**¿Beaka ben Juan-ni yetsi-ni?**

**30** Ixeeru ka milagru ben Jesús-ni arlo ka benne rudhetinieha, ka nu labí diakana lo yetsi-ni, **31** ttaka ka nu chi dia lo yetsi-ni, ukakana lo yetsi-ni kini lebi'i tsia lele deki Jesús Xi'in Tata Do Yebáha anke Cristu lhe kini de tsia lele ge benneha nna gwaka benbale ttu dia lii arlo Tata Do Yebáha.

**Jesús-ni bodole'e lobie len gasi ka benne rudhetinieha**

**21** <sup>1</sup>Iki de nuha nna bodole'e lo Jesús-ni attu libe len ka benne rudhetinieha ro'o indatoo tee lání Tiberias. Aní uka nuha: <sup>2</sup>du Simón Pedro-ni lhe Tomás benne rágabakana Kwachi lhe Natanael ge lhe'esi Caná nu re daka Galilea lhe se'egaba ka xi'in Zebedeo-ni lhe a chupa ka benne rudhetini Jesús-ni. Turo'oba se'e iyábake niha. <sup>3</sup>Simón Pedro-ni nna ree ka benneha:

—Tsiaya sadaxxua belha.

Ka benneha nna ráke bie:

—Ri'itu dhágabatu.

Nianna diake ugwapike lo barcu daa niha, ttaka loolhaha nna birula belha biyaxxukanie.



<sup>4</sup>Tti chi daa tsaniha nna uka xxe Jesús-ni ro'o indatooha, ttaka ka benne rudhetinieha nna labí yuke deki labie nuha.

<sup>5</sup>Jesús-ni nna unnaba tise, rabie ke:

—Xi'ini to, ¿si bi gwa bedaxxule belha ki gori'i?

Lake nna bekabike gebie, ráke:

—¡Birula xa tata!

<sup>6</sup>Jesús-ni nna ree ke:

—Gwaludelharuga yexxa gele-na daka lhitta ben ge barcu-na nna uyúrugale gudaxxubale belha.

Aníha-ba benke bedelhake yexxaha, ttaka tti chi ebeake nuha, bi reyadhakanie yexxaha de chi desá xxatta belha lhe'eni. <sup>7</sup>Nianna ttu ka benne rudhetini Jesús-ni, benne rakarunie geeha, benneha ree Simón Pedro-ni:

—¡Jesús benne anke Xxanari'iha-ba nuná rinne!

Suna biyienbin Simón Pedro-ni deki Benneha-ba nuha, beyoku tteba xoe kumu uleabe ka nuha ki renie sina. Nianna uta'a ttebe lhe'e indaha. <sup>8</sup>Adí ka benne rudhetinieha nna dedá lenke barcuha dena'ayake yexxaha desá tíbana nuha belha, kumu ttiba ttu gayua (100) metru riyasa eriake ro'o indaha. <sup>9</sup>Tti beyadike lo barcuha dedáke, nianna betexxakake chi re gi. Lo giha chi xua ttu belha lhe chigaba tee yettaxtila lhe. <sup>10</sup>Jesús-ni nna rabie ke:

—Gwataxxí ttu chupa ka belha ka nu si bedaxxule-na.

<sup>11</sup>Ugwapi tteba Simón Pedro-ni lo barcuha nna gwaleabie yexxaha ro'o indaha desá tí nuha ka belha xeni. Ttu gayua tsieyona bixxi tsunna (153) ka belhaha deyu'u lhe'e nuha. Meskiba ixé ka belhaha deyu'u, labí bisú yexxaha. <sup>12</sup>Jesús-ni nna rabie ka benneha:

—Gwalibiga gwaligo ixtíle.

Ni ttú ka benne rudhetinieha a reyxakanie innaba tisake bie, gake bie: “Lu nna, ¿nú ankalu?” Kumu yúbake deki Jesús benne anka Xxanari'iha-ba benneha. <sup>13</sup>Nianna tti ubiga Jesús-ni bedaxxue yettaxtilaha nna utidhie benneha geke. Aníha-gaba benie len ka belhaha.

<sup>14</sup>Nuha beyonna lidú rule'e loe len ka benne rudhetinieha iki de chi beyaka banie lagwi ge ka benne chi uttiha.

### **Jesús-ni rinnebie len Pedro-ni**

<sup>15</sup>Iki de chi beyaka uto ixtíkeha nna ra Jesús-ni Simón Pedro-ni:

—Simón xi'in Jonás, ¿si rakaruinlu kia tti ka nu se'e-ni?  
Lana nna bekabina, rana:

—Ila xa tata. Lu gwa yúbalu gwa rakabati gelu.

Jesús-ni nna ree na:

—Biyú ka neru to kia-ni ganna.

<sup>16</sup>Nianna redeabie na attu libe:

—Simón xi'in Jonás, ¿si gwa rakinlu kia?

Lana nna bekabina, rana:

—Ila xa tata. Lu gwa yúbalu gwa rakabati gelu.

Lee nna redeabie na:

—Biyú ka neru to kia-ni ganna.

<sup>17</sup>Beyonna libeha redea Jesús-ni na:

—Simón xi'in Jonás, ¿si gwa rakinlu kia?

La'ania nna chi bedú si'ina le Pedro-ni kumu de beyonna libela rinnaba tise, ree na: “Si gwa rakinlu kia?” Lana nna rane:

—Lu iyába gwa yúbalu xa tata. Lu yúbalu, gwa rakabati gelu.

Jesús-ni nna ree na:

—Biyú ka neru to kia-ni ganna. <sup>18</sup>Netiru ria, tti ankalu kwitiha titúbalu redú tselu nna riabalu ataba rakaba lelu, ttaka ganna chi uxxuluha, la'ania nna udábalu ka nálu-na nna attu benne subila odú tsebie lu nna ichebe lu ata labí ru'u lelu tsiálu.

<sup>19</sup>Tti unne Jesús-ni aníha benna liibie gaxasina gatti Pedro-ni. Len elhutti sate Pedro-ni inná xxeni le Tata Do Yebáha. Nuha-ba unnebie, nianna tti ree na:

—Utá tenalha neti.

<sup>20</sup>Tti bodeki lo Pedro-ni nna bilenna danalha ttu ka benne rudhetini Jesús-ni, delába benne rakarunie geeha. Benneha-gaba nuha udobie daka litta Jesús-ni tti yu'uke go irseha nna unnaba tise Jesús-ni, ree bie: ¿Nútu nuní utetu lu lasi ná ka nu uttikana luha, xa tata? <sup>21</sup>Tti bilani Pedro-ni danalha benneha, nianna unnaba tisana Jesús-ni, rane:

—Tata, nuní nna, ¿bíla sate nuní ganna?

<sup>22</sup>Jesús-ni nna bekabie geni, ree:

—Neti ganna rakaba lasia anába dhona aka benna axtaliba ganna chi esiyaha, lu nna bila elha ralhalu nna rinnaba tsiálu. Utá tenalha neti.

**23** Nuní uyu'u naga adí ka betsi to geri'iha nna ráke deki benneha labí gattie, ttaka Jesús-ni laa rage Pedro-ni deki benneha labí gattie, sinuki sun rabe na: “Ganna neti aka lasia anába dhona aka benna axtaliba ganna chi esiyaha, lu nna bila elha ralhalu nna rinnaba tialu.”

**Ka nuní ka tisa daluxa rinne Juan-ni**

**24** Benne-niba nuha bedhetini Jesús-ni nna kwinaba labie rigixxi'e iyá nuní lhe benie na lo yetsi lhe. Ri'itu gwa yúbatu deki nu rigixxi'e-ni ankaba nuní nu gwalí, labí ruin lebie.

**25** Jesús-ni ixeeru nu ben benneha. Ganna kua ttu ttu ka nu benieha tsiakana lo yetsi, neti rakati labí akani yiesi lo yu-ni tsu'u ka yetsi ka nu tsia lokani iyá nu benieha. Amén.